

重刻缶鳴集序

洪武史官高季迪氏有詩千篇號缶鳴集其夫人之
兄子周立公禮嘗板刻于所居之甫里正統末燬于
火郡人徐用禮復取刻之增多倍于舊而姑蘇雜詠
在焉按缶鳴公自爲序云自戊戌至丁未之作得七
百三十二篇及公歸田後又益以戊申至庚戌之作
蓋得二百廿八篇乃合十三年之詩而成此編序又
云自此而後著者當別自爲集蓋明年辛亥作雜詠
甲寅公死于泐矣今考雜詠統百廿二篇而用理



增僅三年之詩也凡九百篇一何多哉嘗觀謝翰林元懿序謂公初爲四集刪改會粹始成缶鳴則今所增入豈多管所弃去者猶存于世錯置其間歟不然作于一年者悉取而未及刪歟讀者頗以爲病則欲侈其詩適所以累其才歟周暄仲英者甫里人也老而好文謂缶鳴爲里中故物而公之手也慨然重刻又以舊版缺公自序更補之汲汲走予請一言予憶爲童子公之詩往往成誦稍長弃去遂忘其詞仲英雖有諱安能知太史之所至哉惟蘇文忠公有言詩

至于杜子美故近代學詩者多以杜爲師而尤得其三尺者虞楊范三家而已然文忠又謂子美以英偉絕世之資凌跨百代古今詩人盡廢狀魏晉以來高風絕塵亦少衰矣世以爲確論若李廸生值元季非不知有子美者獨其胸中蕭散簡遠得山林江湖之趣發之于言雖雄不敢當乎子美高不敢望乎魏晉然能變其格調以彷彿乎韋柳王岑于數百載之上以成

皇明一代之音亦詩人之豪者哉所恨早死未見其

所止何如君子爲之慨歎故廬陵楊文貞公評諸詩
獨誇其樂府擬古及五言律爲勝其意亦可識矣是
集又聞嘗刻于建寧郡齋未見行世若雜詠脩有諸
體知詩者以爲工則有板在郡中云

鄉後學吳寬撰

缶鳴集自序

古人之於詩不專意而爲之也國風之作發於性情
之不能已豈曰爲務哉後世始有名家者一事於此
而不他疲殫心神蒐刮物象以求工於言語之間有
所得意則歌吟蹈舞舉世之可樂者不足以易之深
嗜篤好雖以之取禍身罹困逐而不忍廢謂之惑非
與余不幸而少有好含毫伸牘吟聲不絕于
口吻或規以廢事而喪志然獨念才疎力薄旣進不
能有爲于當時退不能服勤于畎畝與其嗜世之末

利汲汲者爭鶩于形勢之途顧獨事此豈不亦少愈哉遂爲之不置且時雖多事而以無用得安于閒故日與幽人逸士唱和于山顛水厓以遂其所好雖其工未敢與昔之名家者比然自得之樂雖善辯者未能知其有異否也故累歲以來所著頗多近客東江之渚因間始出而彙次之自戊戌至丁未得七百三十二篇題之曰缶鳴集自此而後著者則別爲之集焉藏之中笥時出而自讀之凡歲月之更遷山川之歷涉親友睽合之期時事變故之蹟十載之間可喜可悲者皆在而可考固不忍棄而不錄也若其取義之或乖造辭之未善則有待於大方之教焉

缶鳴集目錄

共十二卷
詩凡一千首

卷一

擬古一十二首

樂府六十四首

上之回 君子有所思行 李夫人歌 古

別離 燕歌行 短歌行 白馬篇 宛轉

行 長門怨 班婕妤 閭闔篇 塞下曲

折楊柳詞二首 箜篌引 將進酒 雨

雪二首 羅敷行 當爐曲 遊俠篇 關

國家圖書館 NATIONAL CENTRAL LIBRARY, TAIWAN, R.O.C.

山月 鞠歌行 古詞 王明君 烏夜啼
行路難三首 劉生 怨歌行 雉子斑
蒿里 薊門行 巫山高 上畱田 董
逃行 碧玉歌 堂上歌行 隴頭水 少
年行二首 芳樹 放歌行 空城雀 相
逢行 妾薄命 神仙曲 結客少年場行
長相思 君馬黃 團扇郎 楊白花
門有車馬客行 估客詞 權歌行 雞鳴
歌 華山畿 長安有狹斜行 雙桐生空

井 征婦怨 襄陽樂 飲酒樂 鳳臺曲
卷二

樂府八十五首

美女篇 將軍行 長安道 洛陽陌 悲
歌 邯鄲郭公歌 車遙遙 楚妃歎 神
絃曲 白苧詞二首 阿那環 江南意
銅雀妓 猛虎行 湘中絃 獨不見 艷
曲二首 羽林郎 燕燕于飛 浮遊花
野田行 邯鄲才人嫁爲廝養卒婦 壯士

行 秋風引 涼州詞二首 虞美人曲

築城詞 永嘉行 神女宛歌二首 東門

行 秦箏曲 從軍行 大梁行 東飛伯

勞歌 春江花月夜 踏歌行 子夜四時

歌 寒夜吟 戍婦詞 羈旅行 小長干

曲 春江行 寄衣曲二首 廢宅行 青

樓怨 聞角吟 刺促行 牧牛詞 捕魚

詞 養蚕詞 射鴨詞 伐木詞 打麥詞

采茶詞 賣花詞 洞房曲 待月詞 措

花歎 照鏡詞 田家行 憶遠曲 金井

怨 送客曲 里巫行 主客行 春夜詞

新絃曲 竹枝歌六首 宛轉詞二首

五雜組二首

卷三

五言古體六十九首

寓感二十首

詠隱逸十四首

向長 周黨 王霸 梁鴻 法真 韓康

陳畱老父 龐公 王績 朱桃雄 武

攸緒 盧鴻 秦系 陸龜蒙

吳越紀遊十五首

始發南門晚行道中 渡浙江宿西興民家

早過蕭山歷白雀柯亭 次錢清謁劉寵

廟 登蓬萊閣望雲門諸山 聞長槍兵至

出越城投龕山 夜抵江上候船至曉始濟

登鳳皇山尋故官遺跡 宿湯氏江樓夜

月起觀潮 過奉口戰場 泊德清縣前

舟次敢山阻風累日 過峽石 謁雙廟

登海昌城樓望海

春日懷十友詩十首

余司馬堯臣 張校理羽 楊署令基 王

隱君行 呂道士敏 宋君咨堯 徐記室

賁 陳孝廉則 僧道衍 王徵士彝

停君白玉卮 讀史 雜詩 池上雁 題

綠綺軒 荅張山人憲 澄景閣夜燕 贈

馬冠軍 送劉明府 暮歸

卷四

五言古體七十四首

感舊謝宋軍咨

蕭鍊師

鷹窠絕頂

顧榮廟

答衍師見贈

謝周架閣移送菊花

早

過南湖

送蕭隱君

過立公房

賦得桃

塢送別

東園種蔬

聞張著作值雨宿陳

山人園

靈岩寺響屨廊逸

鄭隱君秀野

軒與諸公飲綠茗園送上海石明府

逢靈岩僧元實

舟歸雨中

秋夜會飲送

劉別駕

送陳博士歸番禺

渡吳松江

無言上人丈室逢李道士

贈陶蓬先生

賦得真娘墓送蟾上人之虎丘

友竹軒

遷婁江寓館

雪夜懷周著作

登西城門

樓期家兄不至

送陶兵曹之越

豐茂

余君夢彩堂

過束氏廢園

送倪雅

徐山人訪王主簿

題帶經漂麥二圖

日山中

宿幻住樞雲堂

送賈鳳進士

寄王七孝廉乞猫

送客之海上

冬至夜

坐懷周記室 賦永土人紙帳 初開北窗
晚酌時寓外舅周隱君宅 夏日與高廉遊
無量佛院還憩王隱君池上 曉起春望
陳氏秋容軒 瞻水軒 雨中遣興 題方
崖師聽秋軒 與內兄周思齊思義同過僧
浩西竺夜酌 萱艸 月林清影 春艸堂
次韵內弟周思敬秋夜同飲白蓮寺池上
聞鐘 詠雨酌張進士羽 徐隱君陋居
西園曉霽 題回應得笑字 哭王隅 池

上晚 醉歸夜醒聞雨 夏夜起行西園
師子林池上觀魚 和張羽懷吳興舊遊之
作效其體 送沈徵士歸海上 重午書事
東白軒 賦得姑蘇臺送賈文學麒 聞
晚鶯在圍城中 西齋池上三咏 遊城西
得艷字

卷五

五言古體六十八首

卞將軍墓 綠水園宴集 答宋南宮見寄

夢梅室 送程校理遊江上 僧齋聞雨

送劉使君 送周將軍歸耕 夜登南樓

觀月 西臺慟哭詩 見耕者 雨中書湖

上漁家壁 同杜氏進士晚登潘氏樓 送

家兄西遷 至蓮村 雨中登白蓮閣望故

園 尋照公 江上過丁校書宅畱飲 遊

靈岩賦得越來溪 立春前一日喜雪 移

家江上別城東故居 雨中客僧舍 看花

隱憶亡女書 東坡路上阻水 獨酌 同

杜二徵士過南渚赴朱七丈招 始聞夏蟬

贈斲苓者 我昔 將往海上舟行雨阻

暫歸鳴珂里舊宅 江上晚晴 與王隱

君宿寧真道院 送珪上人 冒雨莫歸過

白沙湖 送袁憲史 泛南溪二首 宴顧

史君東亭 夢遊仙 獨遊白蓮寺池上看

雨 贈薛相士 曉臥丁校書西軒 水上

與手 贈漫客 晝睡甚適覺而有作 秋

日端居 夢鍾離兩兄 雨中畱徐七賁

看刈禾 晚步遊楮家竹潭 召修元史將
赴 京師別內 早行土橋 車過八岡
寓天界寺雨中登西閣 送陳四秀還吳
送聯書記東歸 送禮部傅侍郎赴浙西按
察 對園柳 僕至得二女消息 菊鄰
出城東見古松汭水 夜坐天界西軒 京
師嘗吳粧 爲因師題松梢飛瀑圖 送內
兄周四孝廉 答內寄 真氏女

卷六

五言古體二十一首

送李架閣赴山西行省 送王哲判官之上
黨 登句容僧伽塔望茅山 贈楊榮陽
寺中早秋 天界疏月 寄題鄞縣青山寺
鍾秀樓 曉出趨 朝送顧式歸吳 御溝
觀鶩 夢姊 答定水寺芭公 酌謝翰林
畱別 過白霍溪 至吳淞江 始歸園田
二首 睡覺 與王徵士訪李鍊師 雨夜
宿東齋 效樂天

七言古體一十六首

唐昭宗賜錢武肅王鈇券歌 李白三章
送顧使君 中秋翫月張校理宅得南字
送王太守遷雲間 書夢贈徐高士 劉松
年画 送葉卿東遊 九日與客登虎丘至
夕放舟過天平山 夜發錢清 草書歌贈
張宣 獨遊雲岩寄周砥 練圻老人農隱
嘗蒲萄酒歌 送高二文學 贈李外史

卷七

七言古體二十七首

聽教坊舊妓郭芳卿弟子陳氏歌 床屏山
水圖歌 方隱君山園 觀顧蕃所藏宋賜
進士絲鞭歌 憶昨行寄吳中諸故人 明
皇秉燭夜遊圖 黑河秋水引 期張校理
王著作徐記室遊虎阜 廣陵孫孝子愛日
堂 贈胡校書奎溫陵節婦行 答余左司
沈別駕 江上晚過鄰塢看花 兵後逢張
孝廉 夜飲丁二宅聽琵琶 曉睡 東池

看芙蓉 謝廬山宋隱君寄惠所製墨 美人撲蝶圖 次韵周思義秀才對月見寄 初入京寓天界寺西閣對辛夷花懷徐記室 答余新鄭 玄武門觀虎圈 許先生歸越 送證上人住持道場 送王孝廉省其父後歸金華 穆陵行

卷八

七言古體一十三首

天閑青驄赤驃二馬歌 同謝國史遊鍾山

逢鐵冠先生 喜家人至京客舍雨中聽江

卿吹簫 北山觀猿 謝友人惠兜羅被歌

題美人對鏡圖 會宿成均汲玉兔泉煮

茗諸君聯句不成戲呈宋學士 送曹生歸

新安山中 曉出城東門聞櫓聲 詠中秦

吉了 夏珪風雪歸莊圖 始歸江上夜聞

英生歌因憶前歲別時

長短句體一十八首

登陽山絕頂 張節婦詞 興客飲西園花

下 吳山逢王才 戎王追菟圖 茅士陳
士臥雲所 贈醉樵 雷雨獲嬰圖 青丘
子歌 醉贈宋卿 潘隱君月樓歌 約諸
君看范園杏花不果 番人移帳圖 夜聞
謝太史誦李杜詩 贈金華隱者 登金陵
雨花臺望大江 春日客園無花偶感 白
下送錢判官岳

五言近體四十一首

詠夏水 題黃雀山人画 賦得履送衍上

人 聞蛙 效唐人贈邊將 送董湖州

晚次西陵館 送別駕之邊郡 送僧恬

歸靈隱 江上寄王校書行 送越將罷鎮

送王楨赴大都 送孫主簿之德清 畱

別李侯 寄熹公 送王才歸錢塘 送長

洲周丞陞吳縣令 冬至夜喜逢徐七 送

史丞之海門 夜訪芭蟾二釋子 錢塘送

馬使君之吳中 與劉將軍杜文學晚登西

城 和周山人見寄寒夜客懷之作 哭臨

川公 過胡博士郊居 草堂夜集 送茅
侯 孤雁 曉步園池 次勻過建平縣
送姚架閣 送胡鉉遊會稽 月夜遊太湖
送陳則 莫夜送陳卿出守 送楊從事
從軍 送王員外遷崇教 吳中送顧生歸
海陵 園中 城西客舍送周著作砥 兵
後出郭

卷九

五言近體一百二十首

聖壽節早朝 洪武二年十月甘露降賦詩
頌之 冬至 車駕南郊 禁中雪 封建
親王賜百官宴 送安南使者杜舜卿還
國應制 送高麗賀正且使張子溫還國
送鮑修撰出官關中 送恩公還江心寺
喜楊滎陽赴召至京過宿寓館 早春待皇
太子遊東苑池上呈青坊諸公謝賜衣 西
清對 夜宿太廟齋宮 送秦主客遷侍儀
使 春日退直呈禁署諸公 送張司勳赴

寶慶同知 寓天界寺 送前進士夏尚之
歸宜春 早出鍾山門未開立候久之 雪
夜宿翰林院呈危宋二院長 自天界移寓
鍾山里 夜逢故郡賀冬至使胡普二博士
同宿 至日夜坐客館 送鮑翰林遷官陝
右 送曾簿之平樂 桓簡公廟 送前國
子王助教歸臨川 送潘巡檢之閩中 送
思上人 宴王將軍第 送朱從事之吳興
和友人過采石 謔柳 無題 京師寓解

三首 送舒徵士考禮畢歸四明 送周復
秀才賦行李中一物得紈扇 送流人 贈
張省郎 送瀚公住靈岩 送宿衛將出守
鄧州 甘露寺 送張羽後坐西齋 徐山
人別墅 客館秋懷 秋夜宿周記室草堂
送王才 江上雨 送賈二進士歸省 贈
演師 送錢氏兩甥度嶺 送客歸閩省覲
圓明佛寺訪呂山人 答宗人廉 賦得蟬
送別 何隱君小墅 贈張明府 送唐博

士肅移家醉李 贈妓 送顧倅之錢塘

答高廉同飲後見寄 沈徵士鉉野亭 題

鑿師王隱君墓表後 贈朱山人 溪上

次韵楊儀曹雨中 寄錢塘諸故人 送烏

程馮明府 喜了上人見過 病目 病目

不飲 賦得蟹送人之官 江上早發 客

舍喜侄庸至 哭周記室 過永定廢寺

楓橋送丁鳳 盜發漢侍中許或墓 過海

昌贈李侯 送易從事 題張居画 夜懷

王校書 答陳則見寄 煮藥 夜投西寺

送石明府之崑山 過城西廢塲 送范

采閣赴嘉禾兼簡李史君 喜呂山人見過

江館 贈鄰友 宿道王蘭若 與詩客七

人會飲余司馬園亭 登西澗小閣 江上

答徐卿見贈 除夕客中與家兄守歲 南

溪晚歸 丁孝廉惠冠巾 西園閑興二首

送謝恭 步至東皋 郊墅雜賦十六首

答胡博士畱別二十韵

卷十

七言近體一百首

大駕親祀方丘選射齋宮奉次御製韵 奉

迎車駕享太廟還宮 觀登南岡二首 奉

天殿進元史 九日陪諸閣老食賜糕 送

沈左司 吳僧日章講師東歸送別二首

清明呈館中諸公 金陵喜逢董卿併送還

武昌 送易左司 送王檢校 京師秋興

次謝太史韵 送祠江瀆使者 送葉判官

衍師見訪鍾山里第 寄題安慶城樓 送

鄭都司 送朱謝二博士 送丕上人 送

吳生赴汴 客舍夜坐 送鄭山人 春來

送貢文學 休沐日期衍公遊北山不果

獨臥齋中 送內兄周思義還江上 夜聞

吳女誦經 送趙使君致仕歸別業 遊南

峯寺 送鄰僧淡雲 次韵楊署令雨中臥

疾 送呂秀才入道 送胡簿之陽朔 謁

甫里祠 送恩禪師弟子勤歸開元寺 送

何記室遊湖州 江上寄丁校理昆季 送

顧軍容歸梁溪 白蓮寺次韻杜進士喜予

見過之作 期徐七遊雲岩 賦得寒山寺

送別 聞朱將軍戰歿 送何明府之秦郵

過野寺次韻 送滎陽公行邊 登涵空

閣 婁江寓舍喜王士隅見訪 送葉卿

西塢 過海雲贈及長老送錢塘守 張山

人見訪畱宿草堂 陪臨川公遊天池 客

舍歲莫 江上晚睡懷王著作 答徐記室

病中作 遊雲岩值雨 送張徵君南遊

宿張氏江館 再遊南峯 送李使君鎮海

昌 賦得惠山客送客 寄題張著作隱居

送胡孝廉 雲岩訪蟾公 送任兵曹赴

邊 秋日江居寫懷七首 寄倪隱君元鎮

與杜寅登白蓮閣 喜宋山人見過 與

侄常遊東菴 謝周四秀送酒 上已有懷

徐記室見訪 被召將赴京師畱別親友

過故將第 雨中寄劉沈二別駕 丁校

書見招晚酌 杜二年四十須已多白戲作
是詩 梅花九首 辭戶部之命東還 歸
至楓橋 送徐山人還蜀山人寄張靜居
寄題內弟周思敬野人居

卷十一

五言絕句一百十七首

觀軍裝十詠 題畫十二首 効陰常侍

嘆墻下草 草堂梵僧 新月 尋胡隱君

西寺晚歸 淵源堂夜飲 和陳左司夜

泊桐江 過師子林 薔薇露盥手 西陂

園中梨花惟開一枝 江上酒家 過舊

送別處 懷陳寅山人 畧上人房竹 聞

雁 晚坐水上 聞謝恭夜詠詩 天平山

五丈石 別呂隱君 林下 不寐懷徐記

室 雪中自雲岩晚歸 西村客舍二首

立春前十日寄會稽周軍啓 柳燕圖 隔

簾聞歌 訪周司馬不值 壺中插緋碧桃

花 優人李州僑乞米二首 黃氏延綠軒

燒笋 端午席上詠美人綵索釵符二首

江寺雨中訪杜二 喜從兄遠歸 寒夜

與家人坐語 題楞伽山寺壁 贈僧本空

聞霰 江上漫成 雨中過玉遮山二首

画花鳥 種瓜 摘瓠 得家在遠消息

懷蜀山人 諸君會宿鶴瓢山房題画賦詩

山中夜月 赴京途中逢還鄉友 泐禪

師室中晚坐 白葵花 馬氏東軒 得家

書 期陳則不至 碧筍飲 曉發山驛

焚香 榴花 為外舅周隱君題雜詩五首

階前苔 題徐廸回犬 僧舍訪呂隱君

為學上人題墨竹 題孫卿家小画二首

久別幼文偶見其画遂題 叢竹圖 題張

來儀画贈張伯醇 次勻及禪師懷王水曹

二首 夜聞雨 題方壺小画 題大癡小

画 扇上竹枝 外舅周隱君齋竹 又齋

前芭蕉 吳仲圭枯木竹石 題倪雲林画

題徐山人画贈内弟周思恭 訪因師

題張校理畫 題畫贈別 龍門飛來峯

待渡 西澗訪衍上人 送人遊湘中

蔡村田家 夢中作

七言絕句六十九首

馬周見太宗圖 聞舊教坊人歌 山中別

寧公歸西塲 秋柳 送賈麟歸江上 秋

夜同周著作宿婁江 方崖師畫 送陳秀才

送呂卿 答陳校理 諸君飲吳別駕園

舟中聞歌 題畫雨竹 挽楊隱君 春

思 入郭過南湖望報恩浮屠 廢宅芍藥

登江閣遠懷徐記室與杜進士同賦 夏

夜宿西園二首 靈岩琴臺 聞笛 慰周

著作悼亡 山寺冒雨還西郭 蘇李泣別

圖 江上偶見 過休聖寺 王七招飲余

遊紫藤塲值雪失期 江上送客 期諸友

看范園杏花風雨不果 宮女圖 逢張架

閣 山中春曉聽鳥聲 與親舊飲散出抵

城西客舍賦寄 過山家 雲山樓閣圖

始自西山移寓江渚夜聞雨有作 晚過浦

西橋 歎庭樹 雨中春望 夜齋見螢火

湖上見月憶家兄 逢吳秀才復歸江上

送劉將軍 次韻春日慢興四首 奉酬

外舅達翁 回文 春日憶江上二首 醉

仙圖 觀奕圖 江村卽事 偶睡 舟歸

江上過斜塘 西齋庭前海棠 次韻張仲

和謾興 與內弟周思敬晚過雁蕩僧舍

白傅湓浦圖 陶穀驛亭圖 客夜聞女病

秋江晚渡圖 夜中有感二首 徐記室

謫鍾離歸後同登東丘亭 將赴金陵始出

閶門夜泊二首 舟次丹陽驛

卷十二

七言絕句七十六首

正月十六日夜至京師觀燈 夜聞雨聲憶

故園花 早至闕下候朝 春日寄張祠部

送哲明府之新淦 左掖作 雨中登天

界閣 吳中新舊寄酒二首 宿圓明寺早

起 寄丁二侃 題虞文靖公詩後 逆旅

逢鄉人 葛省郎東歸二首 四月朔日休

沐雨中 戴叔鸞入江夏山圖 客中憶二

女 晚晴遠眺 寄徐記室 寄家書 聞

人唱吳歌 雨中過蕭山 題画 得故人

書 題王翰林所藏画蘭 不見花 寒日

逢杜賢良 風雨早朝 讀韋蘇州詩 晚

過青溪 黃荃子母兔 西園卽事 吳別

駕宅聞老妓陳氏歌 出東郭舟中避雨樹

下 巳酉初度 二高觀兵書圖 期袁卿

見過因出失值寄詩謝 宿蟾公房 陌上

見梅 東歸至閭門 江行 和徐七見寄

臥聞隣槽酒聲之作 見燕至 背立美人

圖 對梨花 和楊余諸君在謫中憶往年

西園聽歌 重過南寺尋悟公不值 過北

塘道 四首 夜雨江館寫懷二首 金徵

士雨中見過二首 過流通院二首 丁孝

廉之錢塘就簡張著作方員外 遊幻住精

舍 效香奩二首 江上逢舊妓李氏見過

四首 東皋林下 九月八日對菊 舟行

晚過張林 送葉山人 冬盡無雪連日大

雨苦寒 慰徐叅軍喪子 看梅漫成三首

夜至陽城田家

六言詩八首

夫差女瓊姬墓 江村樂四首 讀道旁舊

家碣 楊氏山庄 陶秘書廣陵送別圖

聯句詩五首

舞劍聯句 病柏聯句 風雨聯句 虎丘

聯句 蓮房聯句



國家圖書館, NATIONAL CENTRAL LIBRARY, TAIWAN, R.O.C.

五十四年六月

三
分

缶鳴集卷之一

古吳 高啓季迪 著

同里 拂雲居士 校

擬古詩一十二首

其一

慕慕牆下李芄芄
陂中麥泔浩望迤塗
悠悠思行客
客行歲已盈紆鬱
傷我情
安知失群鴻
不若求友鶯
登山知天高
臨流識川
逝不還
護同心
那知別離苦
別離不可久
寂寞不可守
酒傷紅顏子
相思成皓首

朝日如不晚行人會當返

其二

嵯峨雲間樓俯視層城陰綺戶相洞開清廳拂羅襟
上有離居婦哀歌撫茲琴不知中怨誰掩抑一何深
初爲郢中唱再奏邯鄲吟不惜努力歌寫作絕代音
風吹落君耳萬里知愁心曲盡思寂寥青天日西沈
安得化彩鳳飛去巫山岑

其三

出郭見丘墓纍纍滿山阿四海能幾人逝者何其多
封樹日蕭條狐狸走蓬科英靈無人弔牧兒暮來歌
浮華一世中倏若飛鳥過主時不肯飲死沒將如何

其四

離離白雲翔悠悠清川逝天地如傳郵閱人以爲世
良時難再得游樂咸陽中咸陽名都會衣冠集王公
南山對魏闕嘉樹何龍葱九衢十二城逶迤迴相通
衛霍開上第車馬爭春風娛意勿自惜當至百年終

其五

東井不可飲威弧孰能張虛名竟何用千古同悲傷

與君初結驩金石比中腸
恩情忽乖分相望阻川梁
閨門尚難越况彼道路長
不如雲中鴈迴飛自隨陽

其六

促織何嘖嘖空庭寒露白
蘭蕙辭故芳高梧銷華澤
閨中覽物變感歎當此夕
引領望遠人天河西南隔
舟行詎離水針運恆依石
君雖有棄捐妾心誓無易

其七

置酒北堂上歡言宴嘉賓
嘉賓復爲誰相過盡朱輪
中庖炙肥牛登俎悉異珍
左右燕趙姝羅綺驕上春
清謳雜哀吹響激迴高旻
主勸客復酬中抱各以伸
盛年易傾謝爲樂願及辰
請看舊同遊半作泉下人
無爲苦刺促長憂賤與貧

其八

美人一相見遺我白玉環
上有雙雕龍游戲在雲
持此感深意佩結無時閒
土以比貞潔環以明
雲龍永相從誰能使離別

其九

秋至衆芳歇芙蓉獨鮮妍
朱華照綠水日暮涼風

采折難遠贈相看自嬋娟孤艷豈足賞後影良可

其十

明星爛東方北斗亦已旋獨宿悲夜徂空牀藉蘭荅
雞鳴整環珮思奉君子筵君子行未歸新妝爲誰妍
意疎覺去遙指尺越與燕含情乏彤管何以寫中悁
君如綆上瓶妾若井底泉不垂汲引惠澄瑩徒終年

其十一

人生一漚水所欲乃無涯志意苦未畢容華忽然衰
天地有終壞誰能待其期聊爲一日歡勿作千載悲
神仙俱好飲得醉復何疑

其十二

黃鳥鳴春陽流芳滿西園攀條日已暮悵惋不能言
禦寒必重裘涉道須雙轅離居非君子何以解憂煩
煩憂日已積佳期日已失思君如蓬萊可望不可卽
區區儻見察憔悴甘自畢

樂府

詩六十四首

上之回

聖主重行幸六蚪法乾旋北巡初避暑東祠已祈年

群官從清塵粲若星麗天前揚豹尾竿左靡魚須旃
瀚海通漢月蕭關絕胡煙願奉千齡樂皇躬長泰然

君子有所思行

騁望京輔地金城千里餘峩峩松栢陵靄靄桑柘墟
明堂表青陽飛觀切紫虛况有戚里第高樓夾清渠
愛妾舞羅縠嬖奴鳴珮琚東園賜秘器上林乘副車
玄運有恆旋盛時無久居勿嗤城南巷寂莫楊雄廬

李夫人歌

延年罷歌少翁望蘭芬淒淒銷復帳臨歿最難忘歎
獻不相嚮陳杯觴列燈火是耶非幄中坐新宮漏殘
星欲墮

古別離

他人豈不別所別諒有由嗟君今何營輕薄好遠遊
遙遙京洛車汎汎江漢舟君身非賈胡所至自輒留
徽音已冥邈思懷尚綢繆露滋紅蘭春霜變綠桂秋
此時望歸來含情上高樓川途本無限君去焉得休
願令中斷阻化彼山與丘

燕歌行

清商變節朱火違嚴霜塗庭卉木腓邊城早寒未授
衣念君退征不能歸涼風時來動中闈蠟燭在戶熠
燿飛賤妾宵興歎無衣簪珥不施減容輝欲寫憂思
撫瑤徽君今不在聽者稀啟明未出燈已微愛而不
見徒歔歔

短歌行

置酒高臺樂極哀來人生處世能幾何哉日西月東
百齡易終可嗟仲尼不見周公鼓絲拊石以永今日
歡以別虧憂因會釋燕鴻載鳴蘭無故榮子如不樂

白髮其盈執子之手以酌我酒式咏短歌爰祝長壽

白馬篇

白馬銀鏤鞍流光皎如練龍沙積雪裏一去誰當見
昨日羽林兒獨拜建章殿天子親賜與騎向交河戰
疾驅不辭家恐獲逗遛譴萬里倏若飛神速虜難變
前收日逐屯右斷康居援事定入關來箠中有餘箭

宛轉行

宛轉復宛轉宛轉日幾迴君腸鹿盧斷我腸車輪摧

長門怨

憎寵一時心塵生舊屋金苔滋銷履迹花遠度鑾音
暮雀重門迴秋螢別殿陰君明猶不察妒極是情深
班婕妤

微誠雖可守妙舞却難工已別增成舍初來長信宮
扇歸秋篋裏燭滅夜帷中莫忌爭新寵曾辭玉輦同

閭闔篇

天門迎旭開紫霞八表洞達春無涯閣道縈迴度鸞
車羽旗揚彩鐘鼓擗後宮三千人秀色掩盡世上花
宸遊時過廣成家瑤觴再壽盛露華一仁興萬福加

何須慕神僊辛勤鍊丹砂小臣微詞欲拜獻帝德自
大非爲誇

塞下曲

日落五原塞蕭條亭堠空漢家討狂虜籍役滿山東
去年出飛狐今年出雲中得地不足耕殺人以爲功
登高望衰草感歎意何窮

折楊柳歌詞

二首

高枝拂翠幃低枝垂綺筵春風千萬樹此樹妾門前

其二

江頭橫吹悲北客休南去聞道武昌門愁人無別樹

空侯引

濁流赴海東若傾津卒刺船朝不行公平提壺徑欲
渡大聲呼公公不顧饑鯨饒蛟肆啖吞竟以深淵作
高墳貪生惡死誰不有公獨不然果狂叟二十五絃
彈且歌公今渡河將奈何公今渡河將奈何

將進酒

君不見陳孟公一生愛酒稱英雄君不見揚子雲三
世執戟徒工文得失如今兩何有勸君相逢且相壽

試看六印盡垂腰何似一卮長在手莫惜黃金醉青
春幾人不飲身亦貧酒中有趣世不識但好富貴亡
其真便須吐車茵莫畏丞相嗔桃花滿溪口笑殺醒
遊人絲繩玉缸釀初熟搖蕩春光若波綠前無御史
可盡歡倒著錦袍舞鸚鵡愛妾已去曲池平此時欲
飲焉能傾地下應無酒壚處何苦寂莫孤平生一杯
一曲我歌君續明月自來不須秉燭五岳既遠三山
亦空欲求神仙在杯酒中

雨雪二首

雨雪暗桑乾深愁沒馬鞍臨關將月認覆積作沙看
不阻胡兒獵聊供漢使餐春風消不得二月戍袍寒

其二

雨雪暗龍沙愁陰入漢家恨迷青冢草驚見黑山花
夜積檀廬重朝隨羽旆斜空思鳩鵲觀柳色變年華

羅敷行

陌上三月時柔桑多綠枝携筐行采葉日暮畏蠶饑
君來駐車馬相逢在桑下謾說同心言不是知心者
君貴多輝光妾賤無紅妝自信田園婦難從天上郎

長安畫樓宇無限如花女使君當早歸莫共羅敷語

當壚曲

光豔動春朝妝成映洛橋錢多自解數箠澀未能調
花如秦苑好酒比蜀都饒深謝諸年少來沽不待要

遊俠篇

遊俠向何處蕩蕩長安城城中暮塵起殺人無主名
所殺豈私讎激烈爲不平新削安陵刀光奪衆目明
不畏赤棒吏里閭自橫行灌夫託爲友袁盎事以兄
負氣不負勢傾身復傾情笑顧少年輩瑣瑣真可輕

關山月

月出遼海東朔雲卷胡風纔升榆塞遠復照柳城空
影滿雕弧外光沈金柝中思家舉頭望今夜一軍同
鞠歌行
玉蘊彩劔闕鋒牛鐸之音混黃鍾俾神奇作妄庸揚
微察陋世罕逢物有合勢必從如魚得水雲與龍夷
吾囚伊尹農二主舉之享萬鍾嗟古人孰繼踪女子
猶爲悅已容

古詞

妾刀不斷機郎行當早歸還將機中錦作郎身上衣

王明君

都門塵拂春風面臨別看花淚如霰君王惆悵惜蛾
眉不似前時畫中見白髮呼韓感漢恩寧胡謾號關
支尊羶裘肉食本異俗不如但嫁巫山村黃沙白雪
無城闕手冷鴟茲夜彈歇相隨萬里到穹廬只有長
門舊時月妾語還憑歸使傳妾身沒虜不須憐願君
莫殺毛延壽畱畫商巖夢裏賢

烏夜啼

啼鳥驚多棲未久半起疎桐上高柳燈下佳人顰淺
眉機中少婦停織手月入空閨夜欲深數聲猶似聽
君琴

行路難 三首

君不見盤中鯉暫失風濤登俎几君不見枝上蜩纔
出糞壤凌雲霄推移變化詎可測勿謂明日同今朝
出乘高車入大馬半是當年徒步者范叔曾逃客溺
餘衛青亦在人笞下悠悠行路莫相欺爲雌爲雄未
可知

其二

危莫若編虎須險莫若觸鯨牙行路之難復過此前
有瞿塘後褒斜杯酒朝驩矛刃夕加恩讎反覆間楚
漢生一家釣弋死雲陽鴟夷棄江沙所以賢達人高
飛不下避罔宜行路難堪歎嗟

其三

雕牀玉案刺繡茵宜城酒多光照春坐畱北方之上
客謠侑南國之佳人盛時徂流若川水榮貴長存竟
誰是魏帝高臺碧瓦空梁王故苑黃塵起世人傾奪

首未迴可憐不飲冢纍纍

劉生

結客諸陵下平生好排難
鵝瑩白楊刀鵲驚黃柘彈
投瓊遠邸夜擊筑高樓旦
念無可報恩空椎車壁歎

怨歌行

妾始充下陳嬌容常自持
上宮三千妓一一妒蛾眉
絃急有斷聲鏡暗無妍姿
遂令開時花遽作落後枝
昨夕歌吹歡今夕蟲語悲
從來班婕妤不勝趙昭儀

雉子班

子班雉朝陽低飛蓬蒿隱
文章五步一啄于彼山
梁爭雄決鬪憤氣張好勇
守介性之良安能受馴畜
斂翼自摧傷

蒿里

素驂駕廣柳蕭蕭出城闈
玄廬儼象設猶恐死有神
古原閉愁冤荒草不得春
一作泉下客長違室中親
昔興每待旦今臥焉知晨
斂衣已成灰含貝仍作塵
家門諒不遠欲歸竟何因
平生所愛物娛玩由他人
哀哉此里中同逝壯老均
聖賢亦豈免聞道庶可珍

薊門行

行行光祿塞望望單于臺天寒水草盡萬里孤軍來
中國多荒土窮邊何用開

巫山高

巴江西上巫峽深奇峰十二江之陰陽雲高臺不可
尋但見丹楓碧樹攢幽林昔聞瑤姬在其下月爲環
玦風爲襟空山久獨居偶感襄王心楚宮閉秋夢彷彿
來同衾神仙會遇當有道豈效世俗成荒淫千秋
遺賦應多恨暮雨瀟瀟猿自吟

上畱田

有弟兄不見憐上畱田行泣念彼先人上畱田弟寒
衣不蔽身上畱田兄富出乘華軒上畱田死而棺槨
不全上畱田他人爲葬古原上畱田我行見此孤墳
上畱田白楊一何翻翻上畱田人生孰無弟昆上畱
田爾獨大義不敦上畱田鄰人之歌悲不可聞上畱
田

董逃行

史侯稱臣董侯立山東義師烽火急羌兒夾輦奉西

遷百姓驅隨棄村邑華圭苑中高作營千里不復聞
雞鳴舊宮焚燒無片瓦黃金盡出諸陵下長安城頭
日欲晡董逃歌殘歌布乎

碧玉歌

碧玉小家女初無珠翠妝感郎相顧重朽質自生光

堂上歌行

堂上歌歌南山主人爲歡仰客顏翠帷夜卷出兩鬢
移尊更飲花樹間花樹間有明月客不醉歌不歇

隴頭水

人間何處無流水偏到隴頭愁入耳夜雜羌歌明月
中秋驚漢夢空山裏隴坂崎嶇九迴折聲隨到處長
嗚咽欲照愁顏畏水渾前軍曾洗金創血回頭千里
是長安征人淚枯流不乾

少年行

二首

官侍長楊拜夕郎况憑內寵在椒房賜金十萬身無
用乞作胡姬一日妝

其二

下直平明出禁門笑提博局伴王孫寶刀不敢將輸

却明日沙場欲報恩

芳樹

歲蕤映華闈窈窕臨清沼風姿巧弄春露氣微含曉
垂條拂過騎翳葉畱歸鳥忽憶共攀人徘徊行獨遶

放歌行

泰山玉檢書成功芝房正奏甘泉宮漢家五葉號全
盛有似白日初當中雄雞天上啼清曙春滿咸陽萬
家樹諸侯客子盡西來只道明時苦難遇褐衣不脫
見至尊立談一刻皆承恩賡詩已上栢梁殿獻賦還

過金馬門大道易登平若砥始信青雲纔尺咫共喜
嚴徐得寵榮未容絳灌生讒毀丹詔仍聞訪草萊皇
心務欲攬群材嗟君猶在新豐邸日暮空歌歸去來

空城雀

空城雀何局促城頭飛城下宿百匝得一枝千啄逢
一粟衆雛隨啾啁所欲各易足不須羨彼珍羽禽翻
翩高集珠樹林一朝身陷虞羅裏回首空城不如爾

相逢行

沽酒渭橋邊平陵俠少年相逢各有贈寶劍與金鞭

妾薄命

寂莫復寂莫秋風吹羅幕玉階有微霜桂樹花已落
昔爲卷衣女承歡在瑤閣棄魚感淚多當熊慙力弱
寧知色易老難求黃金藥宮深去天遠憂思將何託
君恩非不深妾命自輕薄微軀願有報和親死沙漠

神仙曲

上清真人杏仙子保神鍊魄從無始眉上霜毫如髮
長幾見金烏日中死東遊不肯居蓬萊滄海頃刻飛
黃埃金輿玉座儼何處鬱藍天上彌羅臺碧桃落盡

花無數一笑虛空卷烟霧烏篆玄文世莫窺茂陵還
掩蓬科露

結客少年場行

結客須結遊俠兒借身報讎心不疑千金買得利七
首摩挲誓許酬相知白馬縵胡纓行行人盡止朝遊
洛北門暮醉秦東市感君在一言不惜爲君死朱家
曾脫季將軍田光終酬燕太子君不見魏其盛時客
滿門自言一一俱銜恩魏其旣罷誰復見養士堂中
塵網遍始知結客難徒言意氣傾南山食君之祿有

弗報何況區區杯酒間結客不必皆薦紳緩急叩門
誰可親屠沽往往有奇士慎勿相輕閭里人

長相思

長相思思何長愁如天絲遠悠揚搖風曳日不可量
未能絆去足唯解結離腸關山碧雲看欲暮空幃坐
掩荃蘭香長相思思何長

君馬黃

君馬黃我馬玄君馬金匱匣我馬錦連乾兩馬喜遇
皆嘶鳴何異主人相見情長安大道可竝轡莫誇得

意爭先行搖顛共踏落花去燕姬酒壚在何處

團扇郎

團扇團且潔人言似明月明月豈得如長圓不曾闕

楊白花

楊白花太輕薄不向宮中飛却度江南落美人踏踏
連臂歌山長水闊奈爾何奈爾何春欲晚何不飛去
仍飛返洛陽樹多啼鴉愁殺人楊白花

門有車馬客行

門有車馬客乃是故鄉士昔別各壯顏今見不相似

上堂敘情親拜跪出妻子對案未能食歷歷問桑梓
當時同遊人十有八九死松栢長新墳荆棘生故址
歡言方未終悲感還復始因思興謝端歎息不能止

估客詞

上客荊州商小婦揚州娼金多隨處樂不是不思鄉

櫂歌行

溶漾漢潭清寒荷趁浪平船輕知體弱簪滑見鬟傾
落日懸江思浮雲結浦情去從千葉隱歸愛一花迎
吳歛并子夜誰似棹歌聲

雞鳴歌

北斗城頭北斗低萬家夢破一聲雞馬蹄踏踏車
輓闕下連趨市中逐雄雞安得噤爾聲利名少息世
上爭漫漫夜長人不驚

華山畿

華山畿牛車止不同生可同死棺開棺開與郎去來

長安有狹斜行

長安有狹斜狹斜僅容騎路逢兩俠童迴鞭問君第
君第渭橋西易覓復難迷長子侍溫室次子籍金閨

少子備宿衛光耀與兄齊三子每來返雜沓擁輪蹄
大婦彈鷓鴣中婦舞前溪小婦勸杯酒能唱白銅鞮
丈人莫遽起庭樹未烏棲

雙桐生空井

交生碧玉樹竝覆黃金井根通夕潤深葉帶朝光冷
應有感秋人時來鑑愁影

征婦怨

良人不願封侯印虎符遠發當番陣幾夜春閨惡夢
多竟得將軍軍覆信身沒猶存舊戰衣東家火伴爲
收歸妾生不識邊庭路尋骨何由到武威紙幡剪得
招魂去只向當時送行處

襄陽樂

門前黃柳鴉雛宿羅幌低垂婢擎燭懸璫結珮略粉
成日莫相邀漢江曲水靜花寒月小明舟中樓上鬪
歌聲腸斷年年大堤路南商行過北商行

飲酒樂

七絃五絃角奏一觴兩觴羽行且樂眼中人聚莫憂
頭上天傾

鳳臺曲

飛裙織霧秋痕薄
星漢低宮花漠漠
瓊臺夜寒閉
高窗
女鷺管參差隔烟語
瑤京舊侶招遠遊
人間帳冷鴛鴦
鴛愁海影無塵月
如夢仙骨不欺鸞
背重衰蘭泣露
空秦苑
敲玉聲微彩霞遠

鳴集卷之二

樂府

詩八十五首

美女

美女婉清揚白晳纖且長
豔色照上國不殊古姬姜
巧笑發令姿芳詞吐柔腸
耀首有何物黃金作釵梁
璫懸礫珂珠褱帶霍納香
新服製羅紈光輝麗青陽
工袂繡蛺蝶下裙織鴛鴦
姍姍步春風乍見驚欲翔

古吳 高啓季迪 著

同里 佛雲居士 校

雖有楚大夫善賦焉能詳豈徒騁妍媚况乃持貞良
豕居闢高門宛在城中央過者共傾慕日晏停上襄
伯問誰氏子無非金與張蹇脩豈不勤通辭重珪璋
下懷非所託鴈幣徒相將永宵歎遲回起倚東西廂
石子苟未得年徂諒何傷

將軍行

羽軍結髮從鞍馬新領前軍號橫野而謾不數屠狗
兒負勇曾擒射鵬者狼星掃天芒角斜大旗獵獵吹
沙黃金傾盡養部曲匈奴未滅何爲家前日賢王
五千騎直入朝那殺邊吏天子初聞怒赫然出師誓
奪河南地五營材官元自多詔書未須徵七科已御
明堂推畫轂還開武庫授彫戈灞陵原頭軍晚發北
出雲中與高闕單于一夜六騾逃大漠無人唯漢月
塞下從茲烽火稀朝臣共賀震皇威人生寧似功成
樂白日長安鼓吹歸

長安道

長樂鐘聲動平津樹色閒中郎長戟衛丞相小車來
新成賜將第更築候神臺誰念公車客空懷作賦才

洛陽陌

九陌看春光紅塵起相接白玉車中郎綠珠樓上妾
柳迷臨水影花暎當墟頰日暮過銅駝相逢盡豪俠
悲歌
征途險巖人乏馬饑貧少不如富老美遊不如惡歸
浮雲隨風零亂四野仰天悲歌泣數行下

邯鄲郭公歌

郭公舞郭公舞天子無愁亦無苦醉後君臣一笑看
鄴宮長夜鼕鼕鼓郭公郭公爾莫舞不解平城圍竟

長安虜高山推爲一抔土

車遙遙

鷓鴣啼霜海城白征夫趣裝牛上輓天生兩轂轉長
途那得令君不爲客出門已遠第一程耳中鳴鐸漸
無聲房戶寧嗟寂寞守山川唯念苦辛行欲車不行
車覆還愁損我車中王安得身如芳草多相隨千
里車前綠

楚妃歎

章華臺前楚江水月色墮烟鳥欲起六宮不敢解羅

衣獵火照山君未歸

神絃曲

秋燈畫壁熏烟埃石馬汗流神下來花衫娑娑絃切
切旋風吹幡愁百結雌狐學拜戴髑髏鬼箭射創血
灑秋老鴉飛散巫姬泣苦篁嘯雨溪幽幽

白苧詞

二首

白苧出自吳女工著來色與素體同舞時偏向江渚
宮長袖拂起微有風觴催管促四座中攬裾徘徊慘
曲終玉階夜寒零露濃

其二

後閣臨前楹舞衣皎皎潔且輕飄如白雲向空行
腰流目君已領華燈吐燄欺月明喧譁不聞遺珮
朱萸實紅蘭葉紫千秋懽樂長如此妾身得向君
死

阿那瓌

羊草漫野大帳天山下十萬控弦兒聞箏齊上馬
江南意

本南國姝父母愛如珠貌豈慙明鏡身纔稱短襦

成采蓮唱曉出橫塘上舟小復身輕隨風兩搖蕩
時曲岬傍恰見貴遊郎輟歌欲轉棹花淺不堪藏
將嗔却成哂相問那能隱雖憐郎意深終嫌妾家近
回首各盈盈南湖月又生烟波三十里都是斷腸情

銅雀妓

鄴宮已罷幸歌舞尚如期誰知看月夜却是望陵時
鄴澤銷羅薦松風吹總帷妾身未得死寧當憂色衰

猛虎行

風吹林鳥鵲悲猛虎欲出人先知日光燿燿當路
坐將軍一見弧矢墮幾家插棘高作門木到日沒收
加豚猛虎雖猛猶可喜橫行只在深山裏

湘中絃

風嫋嫋月粼粼竹色蘭香秋水濱一夜猿聲流淚
血黃陵祠下泊舟人

獨不見

白日沉大荒北風下天霜羅幃猶苦冷何況戍遼陽
小時秦槐青今復胡草黃紅淚常自滋非因效啼妝
烏機促夜響龍鏡掩晨光相思獨不見時久愈難忘

豔曲 二首

白莫淇水上折花行見歡鴛鴦蘇合彈驤裏鏤衢鞍
其二

當時贈芍藥今日歎薜蘿少年不相顧惟愛執金吾
羽林郎

十五能挽弓入衛蒲萄宮武皇深假借父有沒邊功
禿衿綉羅短馬逸雙銜斷纜出鬪雞坊還過射熊館
笑擲朱提銀娼樓爛醉春歸時衝市過辟易九衢人
橫行自無避司隸休相忌明日浚稽山爲君遮虜騎

燕燕于飛

燕燕何處飛相見江南路鶯香細雨春柳色芳烟暮
纔從箔外歸復向舟前度莫入未央宮身輕有人妒
浮游花

大宛庭中花狂風忽吹去無涯上八逍遙之雲天下
慘淡之泥沙開落本同何足歎升沈偶異自堪嗟
野田行

白楊樹下誰家墳火燒野草碑無文路傍尚臥雙石
馬行人指是故將軍當時發卒開陰宅千車送葬城

陌子孫今去野人來高處牧羊低種麥平生意氣
衰在哉棘叢暮雨棠梨開百年富貴何足恃雍門之
良可哀

邯鄲才人嫁爲廝養卒婦

妾能擬趙瑟舊得君王眷更衣直夜房侍酒登春殿
宮井故顏里婦猶相羨鼓臺罷往夢破屋流螢見
路多若斯紛紛貴成賤

壯士行

險非高山無勇非壯士半夜殺風來劍寒燈欲死

秋風引

嗟爾秋風胡爲來哉奏商律兮瑟颯而悲哀叩喬柯
而墮葉掃廣路以清埃入班姬之永巷過襄王之高
臺瑤琴自鳴羅幃齊開馬蕭蕭而嘶起鴻噉噉以翔
迴使崩雲駭浪振蕩於白日兮忽欲去而徘徊客有
懷鄉失職而對此者恨盈襟而難裁但欲變天地之
搖落不知感節序之摧頽秋風生歸去來

涼州詞 二首

蓬婆城下淨無花慘慘黃雲漠漠沙卷葉誰將番曲

奏白頭都護亦思家

其二

關外垂楊早換秋行人落日旆悠悠隴山高處愁西
望只有黃河入漢流

虞美人曲

明月帳中泣悲風營外歌彷徨夜驚起何事楚人多
迴燈擁綠髻向劍蹙青蛾效命自無恨君王其奈何

築城詞

去年築城卒霜壓城下骨今年築城人汗灑城下塵
大家舉杵莫住手城高不用官軍守

永嘉行

帝衣濺血忠臣死五部初興屠各子宣陽門外曉吹
笳持戟誰爲衛宮士滿城草綠胡馬嘶內家散作軍
中妻六壘相隨渡河去月明歸夢遂成迷萬里中原
非典午至今人說王夷甫

神女宛轉歌 二首

吐君舟相見盡綢繆已遣大姬傾鑿落復令小婢進
三侯歌宛轉宛轉意何長願爲灰與火同泛玉爐香

其二

呀妾珮相貽慰離異愁逐朝霞天際生歡隨秋水江
逝歌宛轉宛轉情相續願爲絃與軫共奏瑤琴曲

東門行

東門暮歸來入室四壁空突中無烟甑生埃弱妻
延頰稚子瘦使我心下忽有哀安能學東方生空抱
四寸才身長七尺齒編貝索米不得取笑哈雞鳴東
門早欲開仗劍當遠去不乘駟馬不復迴妻前挽衣
言君可棄妾奈此呱呱孩君莫憂無糧田中已生稜
君莫憂無裳機中布成尚可裁不須苦慕富貴富貴
多有害蓄賤妾與君生同居死卽共作山下灰吾欲
行爲徘徊仰視蒼天重咄哉

秦箏曲

嬌絃細語發砑羅壁動玉釧鳴相和關雲隴月愁思
多愁思多聽此曲停蜀_王今罷燕筑

從軍行

關中惡少年占募去防自透匈奴入寇塞將軍下自天
揚旌三道出列格五營_王理龍城望兵氣馬邑斷人烟

星攢烽夜舉月偃陣朝圓渴飲疏勒水饑餐屬國糒
名勇單于憚功多天子憐寧令竇車騎獨擅勒燕然

大梁行

大梁四面平如砥西去咸陽一千里魏王此地昔爲
都宮闕中天碧雲起車聲鞦韆夜未休帶甲十萬名
蒼頭撞鐘列鼎宴上客奉金走幣連諸侯信陵真是
賢公子富貴不驕天下士已訪侯嬴到里門復迎朱
亥經屠市傾身折節世莫同緩急竟賴斯人功邯鄲
秦軍一椎破七國雲必動聞英風古城重過爲搔首幾
度秋風落楊柳沼上雁無鴻鴈來苑中只有狐狸走
立馬塵沙日欲昏悲謔感慨向夷門豪華多少同銷
歇獨有高名今尚存

東飛伯勞謔

前飛蜻蜓後飛蝶桃葉楊枝每相接誰家李女弄春
妍披烟映日窻戶前金雀雙釵翠羽扇纈屏繡帳文
羅薦嬌羞年幾十五多妝初呈復隱奈愁何流暉倏沒
百花暝空持可憐誰作並

春江花月夜

皓月金波滿奇花玉樹新浮輝與流艷併弄一江春
還持誰可比結綺閣中人

踏歌行

香塵和露踏成泥花下風寒鬢脚低夜靜高樓有人
聽起頭一句唱教齊

子夜四時歌

白白復朱朱芳條罽綉襦摘來隨女伴賽鬪不會輸
紅妝何草草晚出南湖道不忍便回舟荷花似郎好
堂上織流黃堂前看月光羞見天孫度低頭入洞房

空幃擁爐坐夜冷微紅滅郎意似殘灰無因得重熱

寒夜吟

月下凍痕生綠井隔簾霜片飛無影樹枝風息轉凝
寒愁人如鳥棲未安夜短夜長應獨覺熒熒殘燭鳴
鳥角

戍婦詞

在當奉姑郎行當報君男女各有役死生從此分

羈旅行

馬頭北風吹地白手冷時驚墮鞭策隻堠欲來雙堠

過客程不盡關山多狐狸縱橫古城壞旗折官亭無
酒賣土風處處殊故園鄉音只聞僮僕言天涯歲晚
無相識囊金已空歸不得暝投人家自炊黍土屋青
燈鴈啼雨此時暫解羈旅憂夢與家人夜深語人生
出門卽苦辛何況長爲萬里身遠遊縱得功名好不
如貧賤鄉中老

小長干曲

郎采菱葉尖妾采荷葉圓石城愁日暮各自撥歸船
春江行

春江南北疑無岼綠草綠波連不斷一女紅妝出浣
紗恰如鏡裏見桃花袂衣猶冷過寒食雲度春陰半
黑浦口風多潮正深輕舟搖蕩似人心鷓鴣暮啼
歸路遠飛絮茫茫楚王苑

寄衣曲

寒甚妾寒持衣向燈泣不是手縫遲綿多針線澀
其二

戎袍非不煖妾製稱郎身寄去龍堆遠端愁到已春
廢宅行

鳴珂坊裏將軍第列戟齊收朱戶閉里媪逢人說舊
時有廬被奪廣園池今年沒入官爲主散盡堂中義
宅兒厨烟久斷無梁肉群鼠饑來入鄰屋官封未與
別人居日日閒苔雨添綠曲閣深沈接後房畫屏生
色暗無光尋常不敢偷窺處守卒時來拾墜璫春風
多少奇花樹又有豪家移得去

青樓怨

浴金熏爐鏤玉奩蘭香今夜爲君添烏棲黃昏烏起
曙纔見道來還道去

聞角吟

驚起黃榆塞下鴻一聲鳴軋戍樓空此時吹動關山
意十萬征人歸夢中玉帳尋弓夜初起月白不知霜
似水餘聲散作滿天愁風吹不入單于壘

刺促行

刺促復刺促天高白日速黃鵠長苦饑烏鳶飛食肉
促刺復促刺長途多荆棘但見今人行不逢古人跡

牧牛詞

爾牛角彎環我牛尾秃速共拈短笛與長鞭南隴東

岡去相逐日斜草遠牛行遲牛勞牛饑唯我知牛上
歌牛下坐夜歸還牛邊臥長年牧牛百不憂但
願租賣我牛

捕魚詞

網初沈前網起夫婦生來業淘水忽驚網重力難
引得長魚滿船喜不教持賣去南津且向江頭祭
神願得年年神作主無事全家臥烟雨不論城中
買賤換得酒歸儂不怨

養蠶詞

東家西家罷來往晴日深窓風雨響二眠蠶起食葉
多陌頭桑樹空枝柯新婦守箔女執筐頭髮不梳一
月忙三姑祭後今年好滿簇如雲繭成早簷前繰車
急作絲又是夏稅相催時

射鴨詞

射鴨去清江曙射鴨返迴塘晚秋菱葉爛烟雨晴鴨
群未下媒先鳴草翳低遮竹弓殼水冷田空鴨多瘦
行舟莫來使鴨驚得食忘猜正相鬪觜啞啞毛襪襪
潛機一發那得知

伐木詞

竹簷挑多兩肩赤礪斧時尋澗邊石老夫氣力秋漸衰
心所喜有枯林枝白雲無人暗空谷遠聲丁丁如啄木
暮歸待伴不獨行前途虎多荆棘生長年不曾到城府聞比
山中路尤阻

打麥詞

雉雛高飛夏風煖行割黃雲隨手斷疎莖短若牛尾
垂去冬無雪不相宜塲頭負歸日色白穗落連枷聲
拍拍呼兒打曬當及晴雨來怕有飛蛾生臥驅鳥雀
非愛惜明年好收從爾食

采茶詞

雷過溪山碧雲煖幽叢半吐槍旗短銀釵女兒相應
歌筐中摘得誰最多歸來清香猶在手高品先將呈
太守竹爐新焙未得嘗籠盛販與湖南商山家不解
種禾黍衣食年年在春雨

賣花詞

綠盆小樹枝枝好花比人家別開早陌頭擔得春風
行美人出簾聞叫聲移去莫愁花不活賣與還傳種

花訣餘香滿路日暮歸猶有蜂蝶相隨飛買花朱門
幾迴改不如擔上花長在

洞房曲

洞房香吐合昏花月轉勾闌啼乳鴉今宵有酒畱君
醉不信娼家勝妾家

待月詞

漏板敲愁夜驚冷露井桃花溼無影海風吹星銷碧
烟羿妃妝遲鏡未懸素鸞不來桂香死雲外紫篁呼
夢起瓊樓欲開天半紅徘徊望拜娥池東蘭閨未返

燈後恰似前宵待郎久

惜花歎

惜心不是愛花嬌賴得花開伴寂寥樹樹長懸鈴索
華鼓頻引鹿盧澆幾回欲折花枝喚心恐花傷復
向來花下每題詩不到花前不持酒準擬看花
春今未盡已愁人纔畱片萼依前砌全落于
也別鄰懊惱園中妒花女畫旛不禁狂風雨流
殘香一夜空黃鸝魂斷無言語縱有星星在蘚衣
來已覺損光輝口應獨背東窓臥夢裏相隨高下飛

照鏡詞

君家青銅鏡價重比黃金空持照人面不持照人心
田家行

草茫茫水汨汨上田蕪下田沒中田有禾穗不長
籍只供鳧鴈糧雨中摘歸半生溼新婦春炊兒夜泣

憶遠曲

楊子津頭風色起郎帆一開三百里江橋水柵多酒
壚女兒解歌山鷓鴣武昌西上巴陵道聞郎處處經
過好櫻桃熟時郎不歸客中誰爲縫春衣陌頭空問
琵琶卜欲歸不歸在郎足郎心重利輕風波在家自
少行路多妾今能使烏頭白不能使郎休作客

金井怨

照水羞見影汲水嫌手冷閒立梧桐陰烏啼秋夜永

送客曲

送客車在門勸客杯在手明日長安花今夜宜城酒
願客飲此勿復辭我無黃金爲客壽人生無處無弟
兄鄉里刺促誰知名賣書買得百金劍有身須向關
山行馬四蹄車兩轂行人欲發休躑躅嚶嚶雞鳴赤

日旭

里巫行

里人有病不飲藥神君一來疫鬼却走迎老巫夜降
神白羊赤鯉縱橫陳男女殷勤案前拜家貧無殺神
勿怪老巫擊鼓舞且誦紙錢索索陰風多巫言汝壽
當止此神念汝虔賒汝死送神上馬巫出門家人登
屋啼招魂

主客行

主人楚歌客楚舞落日黃雲鴈聲苦笑拂腰間寶劍
光美人滿堂色如土大兒北海人中奇小兒能讀曹
娥碑相逢且莫歎貧賤但願有酒無別離君不見平
原墓上生秋草國士無窮道傍老

春夜詞

杏烟溼鬢秋遷下銀蟾光寒曲屏畫數漏閒過每睡
時月明微見墮游絲欲歸自踏娉婷影風動玉釵花
亦冷屋貯嬌愁鎖幔紗青絲嘶騎醉誰家管絃不動
空臺榭夢與烏衣語中夜

新絃曲

舊絃解新絃張冰絲牽愁六尺長寬急頻從指邊聽
金鴈參差移不定新絃響高調易促不如舊絃彈已
熟憐新厭舊妾恨深爲君試奏白頭吟他日愁如舊
絃棄泣向羅裙帶頭繫

竹枝歌

六首

蜀山消雪蜀江深郎來妾去鬪歌吟峽中自古多情
地楚王神女在山陰

其二

魚復浦上石纍纍恰似儂心無轉迴船歸莫道上灘
惡自牽百丈取郎來

其三

江水出峽過夔州長流直到海東頭郎行若有思家
日應教江水復西流

其四

躑躅花紅鴨鳩飛黃牛廟下見郎稀大船攤錢賣鹽
去短釵簪葉負薪歸

其五

妾愛看花下渚宮妾思沽酒醉臨邛春衣未織機中

錦只是長絲那得縫

其六

楓林樹樹有猿啼若個聽來不慘悽
今夜郎舟宿何處巴東不在定巴西

轉應詞

一首

雙燕雙燕去歲今年相見往來東舍西家
銜得泥中落花花落花落人在暮寒池閣

其二

疎雨疎雨綠滿蘼蕪洲
清江南相憶故人遠水遙山
暮春春暮春暮春風急畫船難渡

五雜組

二首


五雜組駝背羈往復還渡口船不獲已非少年

其二

五雜組錦繡旗往復還更戍兒不獲已遭亂離



國家圖書館, NATIONAL CENTRAL LIBRARY, TAIWAN, R.O.C.



岳鳴集卷之三

古吳 高啓季迪 著

同里 拂雲居士 校

五言古體

詩六十九首

寓感 二十首

天旋海水運日月馳奔輝不知此往來伊誰幹其機
諒由任元氣推遷不能違人生處宇內行止無定依
唯當乘大化逍遙隨所歸

其二

雞鳴一警旦陽烏已東升群動紛自起各欲赴其生
饑饉土中出棲禽林外驚蒼蠅一何微黻薨亦飛鳴
人生信多故安得免營營

其三

盛衰迭乘運大道果誰親自古箠中瘵白骨遍荆榛
乾坤動殺機流禍及蒸民生聚亦已艱一朝忽胥淪
陽和既代序嚴霜變肅晨大運有自然彼蒼非不仁
咄咄堪歎嗟滄溟亦沙塵

其四

美女生貧家光艷人未識遠聘入楚宮揚蛾欲傾國
朝遊瓊臺上夕侍金輿側奉歡擬千齡秋風失顏色
銜恩歸永巷貞意徒寂默高高天上星墮作水底石
人事盡如斯推移歎何極

其五

叢蘭生路隅馥馥有奇香路隅多行人采掇成摧傷
深林雖幽獨秋至靄餘芳托根在得所君子蹈其常

其六

蚩蚩此群氓幾人出其儔誰云抱智慮乃足資勞憂

晨秣思遠騁宵披務窮搜懷古復慨今百念紛相投
膠擾得喪間若與方寸仇安知廣成子冥臥昆侖丘
無營亦無想八表獨神遊

其七

大道本夷直末路生險巇盃酒出肺肝須臾起相疑
田蚡排竇英趙高誣李斯傾擠不少假權寵實蓄基
鑿井當得泉種桑會成絲禍福皆自致天道信難欺
出亡無所舍千載使人悲

其八

志士狗功業貪夫詫輕肥亦有逃群子矯矯與時違
彼此更共笑不知誰是非達人體自然出處兩忘機
浮雲游天表舒卷有餘輝

其九

攬轡登大行遙望洛北州崑函正西峙黃河復東流
百城無遺堵雲烟莽相繆朝作冠蓋塲莫爲狐兔丘
昔人爭此地干戈迭相讎當其得意時連陌擁鳴騶
百年奄忽盡魂魄空來游曷見采芝叟冥栖無所求

其十

桃李初不語鳳皇豈長喧末俗矜辯議窮口禍之源
所以國武子殺身由盡言妙哉無爲謂默默道斯存

其十一

人言異草木不若松栢壽欲於百年間辛苦圖不朽
形質天所畀名姓吾自取形名兩未立誰我竟何有
不能知我先奚暇恤我後遺臭與流芳冥然付杯酒

其十二

短褐乘羸輅狐裘駕文車西門與北宮窮達一何殊
彼達矜已智此窮媿身愚東郭發至言兩惑各以祛

厚薄有定命巧拙果誰歟歸臥掩蓬室道存何所吁

其十三

駑馬放田野志本在豐草偶遇執策人驅上千里道
顧非乘黃姿豈足辱君阜負重力不任哀鳴望穹昊
奈何相逢者猶羨羈絡好

其十四

頽陽在川上玄蟬夕鳴悲嫋嫋風起波翻翻葉辭枝
曠望天宇內沈寥此何時朱火已盈謝清商屆其期
覽鏡忽自嗟綠鬢生素絲萬物有榮悴造化豈吾私

其十五

躑躅遠遊子驅車上高山高山多隴坂悲哉路何艱
其顛摩蒼穹欲上不可攀日暮牛刀疲前征未能闕
雙輪忽中摧一墮深谷間引領望黃鵠失路何當還

其十六

蜀琴有奇紋本是枯桐枝一彈舞鸞鶴再彈下靈祇
曾持薦黃帝雲中奏成池棄置久不調流塵被朱絲
終焉舍妙響未始有成虧

其十七

達人貴全生外物等秋草顧此七尺軀卽爲萬金寶
昧者營所嗜棄捐不待老豈無室中資他人是來保
何如餌金液長令鬢顏好

其十八

千秋取丞相一語悟君衷長孺多讜言白頭擯居東
人命有通塞主聽無違從失如魚去波得若雲遇龍
會合感冥相佳期諒難逢卞生未聞道無事涕沾胸

其十九

南山多浮雲北山有高樹因風暫來依風回復飛去

兄弟滿四海幾人此相遇握手交百歡分襟滋千慮
踪跡不可常無爲嗟去住

其二十

鴻鵠橫四海鷦鷯戀蓬榛長松凌風烟小草亦自春
各稟造化育逍遙適其真無將赫赫者下比棲棲人

詠隱逸 十四首

向長

子平謝累辟雅志在隱居家貧或有饋取足反其餘
讀易深自悟謂賤貴不如敕言嫁娶畢家事毋關余

同好有禽生肆意相與娛茫茫五嶽去孰得回其車

周黨

世祖初厭武開觀在東都使者遍巖藪旌帛召賢儒
伯况亦暫起綃頭詣尚書引見伏自陳始願不敢渝
周興有恥食堯禪亦羞汗士固有本志聖主焉能拘
范生乃見毀咄爾何其愚

王霸

儒仲有清節始一應徵命造廷抗高辭不肯臣萬乘
歸來自耕野蓬蒿掩門逕翩翩故人子相遇容服盛

一念兒曹羞客去臥如病賴有賢婦言不失初守正
嘉邈遂終身清輝兩相映

梁鴻

伯鸞古賢人乃在杵臼間夫婦共守志逃名入深山
淒涼五噫歌東出過帝關齊魯復荆吳長往遂不還
爲傭豈無勞顧已少外患終葬烈士旁高風邈誰攀

法真

高卿關西儒好學賤榮祿閉門不交世弟子相誦讀
太守者何人欲以吏見錄誓在南山南胡肯勞案牘

連徵終不就皦皦離垢俗郭子有頌高玄德久愈甚

韓康

伯休始賣藥志將晦當時如何不二名乃爲女子知
玄纁強見聘使至焉得辭凌晨自先發不駕安車馳
亭長遠迎候未識徵君誰脩道奪其牛解與不復疑
中途遂長逝踪跡竟莫追乃知超雲驥塵轡何由羈

陳畱老父

漢衰黨獄起朝柄在刑餘皇皇外黃令去官返鄉閭
班草逢故人涕泣語路隅邦危德無援忠良恐遭誅

有叟過其傍植杖爲踟蹰之歎且言何悲二大夫
鸞鳳不隱羽安能免置翠欲問不肯顧飄然邁長途
賢哉此老翁嗟嗟乃誰賢

龐公

南陽有龍鳳乘時各飛翮鴻鵠獨深棲不肯居籠樊
皤皤隴上耕遠辱刺史軒豈不念子孫遺安乃名言
采藥不復返亭亭空鹿門

王績

無功始亦仕季代邁亂屯投劾乃徑歸不作嬰網鱗

結廬河渚北喜與瘖士鄰相逢雖多言不若無語真
種黍養鳧鴈逍遙度秋春乘牛過酒家畱連或經旬
嗜飲豈沉湎醉鄉可逃身北門與樂署暫屈誠此因
賢哉焦史妻相饋不厭勤酣歌自遺世稽阮其能倫

朱桃椎

祭酒絕俗者曳索復被裘自匿林莽間不入城都遊
織屨易米茗於人又何求偲偲高長史延見禮甚脩
瞪視雖不言默教意已周欲使如曹參無事治一州
忽去返山谷避寢安可畱

武攸緒

孽后移寶鼎同姓咸折珪獨去謝親寵龍門事冥棹
澹泊如素嘗衣褐復茹藜賜器不肯御牀頭委塵泥
族人豈不華回首已粉齏荀榮禍必集達識乃弗迷
蟬蛻衆濁中名與嵩高齊

盧鴻

巖然守秦一高臥在幽壤開元始求治賢哲勞夢想
詔書赴巖扃宸意勤挹仰入京遽還山孰得縻以鞅
天子遂其高營室致安養爵祿不可加貪士應泚顙

秦系

公緒避時亂不駕戎府車南安大松間卜築聊可居
穴石爲巨硯坐衍老氏書刺史致羊酒歲時造其廬
不拒亦不謝偃息每自如懷道誠可稱工詩乃其餘

陸龜蒙

魯望好任散心與太古期俗夫晨叩門不肯一見之
下田與江通終歲恆苦饑菘刺不告勞常師禹胼胝
酒酣發長歌猶有憤亂悲寧不念枯槁行哉豈其時

吳越紀游 十五首

始發南門晚行道中

歲暮寒亦行征人有常期辭我家鄉樂適彼道路危
酒闌別賓親驅車出郊岐我馬力未痛已越山與陂
回頭望高城落日雲樹滋遭亂旣少安謀生復多饑
途逢往來人孰不爲此驅遠遊亦吾志去矣何勞悲

渡浙江宿西興民家

挂帆無天風到岬日已夕捨舟理輕裝欲問古鎮驛
淪淪灘聲迴莽莽山氣積僕夫夜畏虎告我勿遠適
望林投人家炊黍旋敲石寒眠多虛警言我體若畏席

誰云別家遙數日已在客今宵始驚歎東西大江隔

早過蕭山歷白鶴柯亭諸郵

零起何太早村荒絕雞鳴况時江雨晦不得見啓明
菱菰度高關山空縣無城隔林聞人呼已有先我行
側身避徑滑聚足防厓傾衣寒復多風聒聒遠水聲
千峰霧中過不識狀與名嵐開見前郵始覺歷數程
越禽啼楓篁冷日傍午晴烟生沙墟寂葉落澗寺清
登臨亦可悅但恨時非平

次錢清謁劉寵廟

亭亭樹間祠落日小江口停舟拜孤像開幔蒼鼠走
憶公治邦時德感山谷叟臨行謝其饋清風在茲久
我方東征急不得奠杯酒惆悵出烟扉殘村夜聞狗

登蓬萊閣望雲門秦望諸山

旅思曠然釋置身蒼林杪群山爲誰來歷歷散清曉
奇姿脫霧雨奮首爭欲矯氣通海烟長色帶州郭小
曲疑藏啼猿橫恐截歸鳥流暉互蕩激下有湖壑繞
佳處未遍經一覽心頗了秦皇遺跡泯晉士流風杳
願探金匱篇振袂翔塵表

聞長槍兵至出越城夜投龕山

列藩過戎亂駐鉞實此州如何經大將王師自相讎
我來亂始定城郭氣尚愁又聞有鄰兵君卒豈敢畱
促還出西門天寒絕行轡一城隨雨雪海嶼暮悠悠
野屋閉不守澤田棄誰收若人且奔逃房子安得休
透迤蒼山去泱泱玄雲浮人虎爭夜行氣慄喘巖幽
我徒戒相親一夫未易求饑於谷口果寒燒鷄中慙
神迷路多迂再宿達海陬雖嘗登頓勞空亮迫辱憂
聖尼畏於匡嗟我敢有尤但慙去越早不遂名山遊

夜抵江上候船至曉始行

夜辭西陵館霜谷後叫歇津卒未具舟天險不可越
漁商雜候渡寒立沙上月蒼烟隱遙汀益覺潮漲闊
開橈散驚鳧海色曙初發灑灑雨山來稍稍後嶺沒
中流聞鼓角隔岸見城闕客路寄奇觀臨風悶俱豁

登鳳凰山尋真宮遺跡

茲山勢將飛宮殿壓其上江潮正東來朝夕似奔轡
當時結構意欲敵汴都壯我來百年後紫氣愁不王
烏帝壁門穴落葉滿空林
樂榭占羅嚴仗
行人悼降王故老怨姦相蒼天何悠悠未得問興喪
世運今復衰淒涼一回望

宿湯氏江樓夜起觀潮

舟師夜驚呼隔浦亂燈集潮聲若萬騎怒奪海門入
初來聽猶遠忽過顧無及震搖高山動噴灑明月溼
霜風助翻江蛟龍苦難螫應知陰陽氣來往此呼吸
登樓覺神壯憑險方迴立何處望靈旗烟中去波急

過奉口戰場

路迴荒山開如出古塞門驚沙四邊起寒日慘欲昏

上有饑鳶聲下有枯蓬根白骨橫馬前貴賤寧復論
不知將軍誰此地昔戰奔我欲問路人前行盡空村
登高望廢壘鬼結愁雲屯當時十萬師覆沒能幾存
應有獨老翁來此哭子孫年來未休兵疆弱事併吞
功名竟誰成殺人遍乾坤愧無拯亂術佇立空傷魂

泊德清縣前望金鼇玉塵二峰

歸遠行不緩頗失眺山水獨憐茲峰秀欲去舟且穢
層巒迴長溪日落蒼霧起寒城動遙炊晚渡罷孤市
豈唯地景幽况乃民俗美牛羊散樹下曖曖舊墟里

田腴收穫富縣靜爭訟止畏途遇樂境我意方一喜
嘯歌逐漁翁暫宿浦煙裏篠疎風條條月偃波瀾瀾
旅顏在塵中逢人固多恥安得託此居長年息行李

舟次敢山阻風累日登近岬荒岡僧舍

高岬鳴枯桑湖陰北風厲寒濤洶我前幾日不得濟
孤舟恐漂蕩石根暮牢繫憂來厭閒臥近寺聊獨詣
雀饑殘林空人倦危磴細年荒無居僧樹死石門閉
神傷却欲返微霰灑征袂窮冬已崢嶸故國尚迢遞
仰看浮雲馳東路阻歸計長歎復何言吾生信多滯

過硤石

硤石頗奇壯長河出連山絕壁兩岬開行舟過其間
高處誰解登陰藤裊難攀旁垂雨痕古仰露天光慳
不知真宰意隨地設險艱一夫據蜀閣二世憑秦關
賴此非要區爭奪得少閒徘徊佇望久日暮飛雲還

謁雙廟

維昔天寶末君王寵姦虜雄邊委強兵遺患同養虎
叛聞遽西幸骨肉棄榛莽河北二十州義士誰禦侮
兩公起誓衆慟哭告玄祖橫身遏其衝江淮保安土

孤城無全堞百戰霜月苦力窮援不來齧齒罵益怒
殘兵日饑疲秋風仆旗鼓男兒不生降一死冠今古
故鄉有遺廟俗祭巫屢舞丹青網塵中爽氣猶可覩
嗟今屬喪亂戎馬正旁午臨危肯捐軀如公未多數
獨立爲悲傷斜陽下寒楚

登海昌城樓望海

百川浩皆東元氣流不息混茫自太古於此見容德
積陰漲玄濤萬里失空色鴻鵠去不窮魚龍變難測
朝登茲樓望動盪豁胸臆始知滄溟大外絡九州域

日出水底宮烟生島中國寬疑浸天爛怒欲吹地曩
常時烈風興海若不受職長堤此宵潰頻勞負薪塞
况今艱危際民若在墊溺有地不可居瀕洞風塵黑
安得擊水遊圖南附鵬翼

春日懷十友詩

十首

余司馬堯臣

列戟衛嚴關應無休沐暇群英罷追遊餘香掩空榭
飛花北郭晚華月南園夜清景不能同蹉跎恐年謝

張校理羽

端居養恬素獨詠聖人篇夕景臨池酌春寒掩閣眠
芳藥初翻雨新篠稍披烟累日虧幽訪慙余塵務牽
楊署令基

詞苑擅高步早歲許追隨屢在瑤華句長依瓊樹姿
齋居積冲抱園賞過芳時暫闕今朝會勞人耿耿思
王隱君行

共此一里居誰令阻良覲惆悵步芳園山櫻還獨摘
風含駐花意雨散流池跡尊酒不來同茲晨端可惜

呂道士敏

同謂在塵境獨能依道門園齋坐永日庭綠靄初繁
觀妙夙有契悟靜自無煩晨策思頻往聆君超世言
宋軍咨克

看花西澗寺憶子昔同行蘭入華觴氣波汎綠琴聲
茲歡隨節逝離恨坐相嬰安得重聯騎射雉出東城

徐記室賁

晨興理櫛罷禽聲悅清旭雨餘嘉樹新色映春塘綠
闕景感幽棕步陰思往躅携手此逍遙須君慰心曲

陳孝廉則

徂春多心慰復此轉孤寂鶯啼遠林雨悵望鄉園隔
客舍換衣辰僧齋聽鐘久知君志正紛雜英共如積

僧道衍

楞伽曾往問緣澗冒嵐汗殘雪寒山暮幽扉閉竹林
欲寄袂禪跡尚違捐俗心別後空遙念迢迢雙樹陰

王徵士彝

遠客歎畱滯對雨臥閒房江上歸舟阻蘼蕪春自芳
微痾偶見侵勝賞坐成妨斯章亦何取持擬釋離腸

停君白玉卮

台詩集 卷三
停石白玉卮聽我前致辭家本吳門市英風慕要離
少年貧無行鄉里不相推喜過毛公舍懶下董子
偶從岍頭候跨鞍赴邊陲欲邀深入勳終然計無奇
歸來冠側注始學窺書詩稍通鄒魯生盡謝燕趙兒
焉知事益謬空言竟難施布衣走路傍但爲衆所嗤
廷中忌質誼門下誣張儀二子豈不辯未能免讒疑
嗚呼今之人孰解容不羈我將棄浮名垂釣東海湄
長笑調魯連高歌酌安期素心儻有合豈要餘子知

讀史

周衰禮樂廢大道成榛菅羸秦任商君王制欲盡剛
厚賦山澤空亟戰原野殷頽波目茲靡千秋去無還
誰云重華駕邈矣難仰攀於焉誦其書如造揖讓班
安得鳳凰鳥飛下浮雲間

雜詩

朝臨高堂上俯視崇岡下春暉何悠悠清川自東瀉
陽和發卉物時澤均播灑如何及芳辰蕭條但空野
願言釋拘局登高騁吾馬曠途不見人憂心何由寫
興謝固其常吾將尤誰者

池上鴈

野性不受畜逍遙戀江渚冥飛昔未高偶爲弋者取
幸來君園中華沼得遊處雖蒙惠養意飽飼貸庖煮
終焉懷慙驚不復少容與耿耿宵光遲撼撼寒響聚
風露秋葢陰孤宿斂殘羽豈無鳧與鶩相顧非舊侶
朔漠饒燕雲夢澤多楚雨遐鄉萬里外哀鳴每延佇
猶懷主恩深未忍輕遠舉儻令寄邊音申報聊自許

題綠綺軒

幽抱時欲寫帷中有鳴弦一彈落一葉庭樹坐蕭然

寂寂山水夜迢迢河漢天憶聽烏啼起南軒秋未眠

答張山人憲

聽君辛苦詞感我艱難情百年自有爲安用文章名
雞鳴海光動車馬塵滿城相逢無新舊言合意自傾
奉觴置君前長歌發哀聲時乎苟未得飲此全其生

澄景閣夜宴

王孫喜畱宴開閣望明河是夕月微暈涼風池上多
樓禽翻暗叢駭魚動圓波清景厭絲竹雅咏答高歌
尊酌願勿間良宵易蹉跎預憂別在旦車馬層城阿

贈馬冠軍

一騎東方來相逢新豐市自言讀父書出身良家子
名在伏飛籍蘭纓懸鹿盧曾爲魏其客不作平陽奴
欲行渡狼河直擒射鵬將壯志忽蹉跎秋風臥孤障
解裝出我筑歌作變徵聲壚頭落日在歌闋酒再行
相君本鳶肩豈是沈淪者我亦方薄遊低頭向人下
有志事竟成古人不欺余畱將一白羽待射魯連書

送劉明府


賤士寡諧世放居江海邊朋儔漸乖睽憔悴不自妍
顧影鮮懽趣惡離倍當年他人亦以悲况復如子賢
荒途風霜交歲晏增慨然亂雀噪葦葦棘驚鴻逝長天
斗酒豈足陳薄意聊以宣出處道旣殊不得長周旋
誰謂非遐方浮雲阻山川何以慰渴饑令名期可傳

暮歸

朝出雞始啼暮歸鳥欲棲我身本無役胡爲亦東西
徒步二十年風埃面空鷲入門聞鄰杵秋氣凜以凄
又尋歷古沼絡緯鳴中閨有無了不問歌吟夜燈低
官貴固有日我志焉能迷笑向細君迫勿爲翁子妻



國家圖書館, NATIONAL CENTRAL LIBRARY, TAIWAN, R.O.C.



岳鳴集卷之四

古吳 高啓季迪 著

同里 拂雲居士 校

五言古體

詩七十四首

感舊訓宋軍咨見寄

我酒且緩傾聽君放歌行君歌意何苦慷慨陳平生
少爲鬪雞兒鮮裘奮春明走馬出飛彈撒擻誇身輕
氣服諸俠徒不倚父與兄落花錦坊南美人理妝迎
綠雲晚不度樓上鳴瑤箏酒酣迸五木脫帽呼輸贏

及壯家已破狂遊恥無成太白犯紫微三辰晦光精
余鏡偶淪照干戈起紛爭中原未失鹿東海方橫鯨
遂尋鬼谷師從之學言兵石室得陰符龍虎隨權衡
業成事燕將遠戍三關營巖谷雨雪霏哀獸常夜鳴
撫劍起流涕軍中未知名奇勳竟難圖迴臨石頭城
石頭何壯哉山盤大江橫黃旗想王氣玉樹聞歌聲
晚登臨滄觀惻愴懷古情覽時談禍機不因憶尊羹
飄然別戎府震澤還東征歸來訪鄉閭亂餘掩蓬荆
舊宅人已改荒池泉尚清瘦妻倚寒機正歎伊威盈

從茲謝行役閒園事躬耕懶求薦辟書傲然揖公卿
衰蕙弔蟋蟀柔桑喚鸚鵡閉門節屢變壯魄空潛驚
昔同徒步人十年擁麾旌鴻毛獨未順蹭蹬違霄程
知音竟爲誰四海嗟惻惻齊竽不解奏楚璞何由呈
顧余雖腐儒當年亦崢嶸小將說新侯捧槃定從盟
大欲千萬乘獻策登蓬瀛洪濶阻川途浮雲蔽天京
終焉困澤畔日暮吟薜蘿賤貧此時居復與喪亂并
何殊九月中嚴霜折枯莖頗聞君子心道窮貴益貞
已志未獲施安用軒裳榮今晨喜逢君有壺對前楹

風日初澹沲櫻桃作繁英適意不一醉屑屑徒悲
達人若相遇大笑絕冠纓

蕭鍊師鷹窠絕頂丹房

人間不可住混濁同腐腥一落三十年塵夢無由
稍聞方士說恍惚通仙靈羨門與偓佺相期餌芝苓
自顧真病鶴秋風墜疎翎碧霄不得渡烟霧愁冥冥
師從天姥來身徧豁落經不邀五利寵深棲鍊神形
東觀鷹窠峰中天插孤青其下吐浴日其高望飛星
昔有學道侶并曰遺巖肩愛茲絕俗地遂爾留軒

太鼎生紫烟丹成衛天丁金骨坐可蛻騎龍駕風霆
積水浮方壺東望類點萍紫臺白玉榜中有真人庭
飛遊願從師往讀新宮銘

顧榮廟

有引

晉侍中顧彥先有墓并祠在長洲之東久而
廢爲淫祀縣令周君復之爲賦是詩

軍司吳國秀機神夙超朗弱冠遊洛師已蒙南金賞
崎嶇諸王慕沈湎務遵養中罹廣陵艱計服匪誠枉
風雲一揮扇義旅臻同響事成恥言動飄然理歸鞅

晉社始東遷群賢悉收獎道謁真感會矯翼丹霄上
德聞一代稱跡泯千齡往時屯乏良佐英謨益堪想
墳祠托荒郊蕭條竝榛莽童侵雨隧淫巫闖塵幌
大夫過停轅式瞻爲含愴衣冠復故貌筵几陳新享
寡劣忝鄉人因歌表遐仰

答衍師見贈

衍師本儒生眉骨甚疎峭軒然出人群快若擊霜鷁
罕嘗垂長紳挾冊誦周邵欲陳興壞端往應乞言詔
乾綱會中頽四海起攘剽仰頭望天扃氛祲匿義曜

藩邦日尋兵纁玉罷朝頽木顛豈繩維長往遂淪耀
披緇別家人欲挽首屢掉超哉休遠徒高躅願追紹
初來北城剝駐錫問宗要相逢共宵哦篝火樹間照
漏成出叩鉢鋒疾驚楚僮我或勸之冠不答但長笑
雷連忽中離名山赴佳召頗知此行樂夙志酬歷眺
吳峰戴襍登楚水投文弔江秋雨鳴瀨海曙霞發嶠
靈竒務窮蒐不憚躡遐徼東歸始安禪幽谷斬蓬藿
坐敷雲中衾薛屋一澗繚前年逐戎旂野出事田獠
是時陰飈作山黑捲狂燒不畏猛虎過車宿傍楓廟

南師隔烟嶺無寐聽猿叫晨興雪滿壑衣濕寒木燎
空林斷樵踪兀兀見來轎相邀至巖扉山竹穿窗窸
深房煮山藥乾葉燄風銚頓釋行旅顏瓢綠欣欣醕
徒還不能淹喧寂歎殊調邇來竟何成三十匪年少
恨無關弧力結束從嫖姚開坊借書披危坐似持釣
行憂釜見奪謁恐冠遭溺逢人戒談時澀縮刀在鞘
軍葦五月急市粟無暇糶壯氣漸欲磨妻孥困纏繞
夢途宿履疎暑夕行熠燿師來贈長句有譽無鄙誦
舊章眩芬塲金奏聆要眇據梧起豪誦心疾渾可療

回顧平生吟真咽蚯蚓歎上天宰玄化亂治方巨料
性命如窮鱗儻獲脫醫寮卜居計已決不待龜灼焦
過湖就稻蟹靜處容不自安能效群女倚恃鬪妍妙
泳風或鳴撓耕月還荷蓀師當重見尋東臯一舒嘯

謝周架閣移送菊花

杪秋始授衣我歸視南園荒逕久廢鉏舊菊今不蕃
節臨乏采翫何以慰憂煩東鄰幸分致離離擢深根
幽馥辭別圃佳色羅前軒愧無樹灌勞獲此英翹繁
日出寒意祛孤蝶來飛翻我亦愛其芳繞叢咏微言

安得與君子飲泛同一樽霜露懼遙殞歲晏空籬藩

早過南湖

湖黑月未出蒹葭露淒淒榜人識浦溆不畏荒烟迷
殘夢詎可續舟搖櫓聲齊開篷望天邊斗柄插水低
津遙未見樹村近纔聞雞自嗟遠遊人中宵走東西
不如沙頭鴈宛頸猶安棲

送蕭隱君自句曲經吳歸維揚

適從江東來復作江北去來去逐江雲蕭蕭舊巾屨
身帶烟蘿雨初下大茆峰孤帆拂楚樹遙聽廣陵鐘

去家忽來歸憐君似黃鶴日暮眇相思淮南桂花落

過立公房

空院閉深竹幽花有孤妍春陰鳥語寂風磬時泠然
非茲絕俗地何以寄高禪

賦得桃塢送別

何地芳菲滿吳趨曲陌西藏經非漢壘種樹似秦溪
木曙忽霞起過春猶雪迷葉聞渡江唱花憶映門題
折時或傍水遊處每成蹊偶來因送客腸斷有鶯啼

東園種蔬

我非適世材學圃乃所宜種蔬 東園鋤灌敢告疲
夏來風露繁衆綠俱紛披朝餐 我菘暮餐芣我葵
此味賤所嗜蔓草勿害之慨彼主父言鼎食何其危
聞張著作值雨宿陳山人園因寄

芳月抱深惻佳遊闕追攀聞君獨命駕遠造幽人關
春園花絮稀啼鳥池上閒雷連宿烟閣尊酌解離顏
遙想清夜徂鳴弦竹林間非因雨成滯興慙自忘還

鄭隱君秀野軒圖

江晚洲渚交雨晴草菲菲前山鷲欲闔習師渡水歸

望烟知君家花竹隱半扉已休田中耒猶響林下機
此鄉卽桃源亂後世有稀開圖若身到不知塵境非

與諸公飲綠茗園

金塘環勝墅緹騎會芳時雀乳依桐葉魚翻罾芰絲
詩流洛下詠歌豔郢中詞一念交歡厚觴至詎能辭

送上海石明府

三月熟桑椹四月落棗花布穀樹下飛塘轉村路斜
東塍擊耕鼓西林擲縲車但言此地樂不聞此地嗟
雖無夕烽驚尚苦秋賦加煩君始到日爲我問田家

逢雲巖僧元實將赴湖上賦以送之

早懷塵外想每訪林間踪
空齋哦夜雪共聽雲巖鐘
西澗已久別東城忽相逢
還當布袈裟去坐湖上峰
喧寂既殊調無因復追從
倚閣一遙送秋山紅樹重
舟歸雨中
猿鳴楚雨急江岼孤舟次
前山到非遠已見烟中寺
寒景暮蒼然歸人獨愁思

秋夜會飲送劉別駕得星字

征馬已歸阜哀鴻方過庭
何期當別夜還得水寒廳
春醉誦明月僕興瞻落星光
銷帷中燭響動車前鈴
甯連豈有極之子不遑寧

送陳博士歸番禺葬親

汎風海欲冰凜此窮陰時
問君歸何亟親葬不可遲
遙遙望郭門慘慘投山陂
僧房拜遺柩瓦燈照塵帷
遠當卜玄宮遠託瘴水湄
日夕旣封樹慟哭行繞之
幽來青楓林猿鳥吟相悲
化者苟得安萬事無足爲
奈何割裾子尚忍生違離

渡吳松江

稍離城郭喧遠適滄洲趣乘潮動旅榜霧散寒江曙
蒼蒹靡靡出白鳥翻翻去不識隱人村舟中望高巖
遺時歎有棘拯物慙無具不向此鄉居飄零復何處
無言上人丈室逢李道士

竹間失舊蹊落葉紛已積閒來繙經院戶揜諸蟲寂
本尋釋門子偶值仙家客景清林意秋慮澹池光夕
相對總忘言誰云纍名跡

贈陶篷先生

連豈趙客子房非漢臣出處愚莫測自是神仙人

中解龍虎鬪飄然去難親夫千古鬚眉恍惚乃後身
長安昔縱酒叩閣通平津豈爲慕珪組但欲陳經綸
白壁棄路傍舉世不見珍歸來棹扁舟烟波復誰馴
豈無一杯水爲君灑風塵空將釣國手老坐東海濱
逢余向滄洲笑落頭上巾謂余有僊契泥滓非久淪
花源罷通世烟霞閉千春便從夫子歸雞黍會四鄰
持謝漁舟子休談晉與秦

賦得真娘墓送蟾上人之虎丘

色相終懷滅佳人能久妍斷碑山寺裏小冢竹林邊

蘭葉春風帶苔花莫雨鈿情畱吳苑客夢逐楚臺仙
高僧方宴坐身在散花天

友竹軒

世人務結託車馬紛交馳言笑雖強歡衷懷詎相知
中林有君子淡然夙與期虚心兩無阻榮悴焉可移
朝尋披烟逕暮對褰風帷非君此爲偶誰共歲晏時

遷婁江寓館

寓形百年內行止固無端我生甫三九東西宜未諳
去年宅山隴今年徙江干野性崇儉陋經營唯苟完
開窓俯平疇幽扉臨遠湍豈忘大厦居弗稱非所安
披榛始來茲霜露淒以寒誰云遠親愛弟子相與歡
室中有名酒歲暮聊盤桓

雪夜懷周著作

燈照竹林雪寢齋寒更空窓間成獨坐遙想故人同
不有孤吟興寧度此宵中

登西城門

登城望神州風塵暗淮楚江山帶睥睨烽火接樓櫓
莽吞何時休百骨易寸土向來禾黍地雨露長榛莽

不見征戰場那知邊人苦馬驚西風笳鳥散落日鼓
鳴鳴城下水流恨自今古

期家兄宿東湖民家不至

東湖欲上月寒鳥已棲煙何處相期宿柴門汀樹邊
未嘗新漉酒猶望遠來船誰信姜肱被今宵還獨眠
送陶兵曹之越

高齋掩林雪獨臥玄景暮夫君定何聞此日勞我顧
清言一歡然孰云昧平素方期締深約幽抱終以布
胡爲遽嚴裝明發首東路手持三公檄新辟當遠赴

祿豈足羈知君爲親故况茲句踐邦山水夙所慕

湖月夕棹來谷迥寒鐘度畱滯自成悲無因共遊鶩

豐城余君夢彩堂

楚客身未歸悠悠念庭闈濤江雖云廣莫阻魂夜飛
秋陰天無星猿叫楓樹稀家山倏已到不失舊路微
宛然上高堂獻笑試舞衣焉知空館曙鐘動殘燈輝
難追夢中歡益發覺後唏誰能傳爾翼遠去成相依

過東氏廢園

人間樂事變池上高臺傾歌堂杏梁壞射圃菜畦成

不見妓釵影詎聞賓履聲來斯欲攄抱今昔反傷情
送倪雅

交游結深歡離別生遠念聊持毛子檄暫脫劉生劔
南風柳下亭杯動江色灑山遙馬望驛日落蟬鳴店
此去漸成名驅馳君勿厭

同徐山人賁過妙蓮佛舍訪王主簿欽

逸人如高僧傲吏同隱尉閒房對清夏共挹池荷氣
烟帷棲鴿馴風鐸驚禽畏明日雨還來山櫻當熟未
題帶經漂麥二圖

朝鋤東臯上暮鋤西陂側釋耒讀遺經欣然此休
因觀舜稷事耕稼寧辭力

其二

田中刈麥罷把卷忘其疲風雨忽云至千穗漂無遺
於書苟有得歲晏何憂饑

秋日山中

山澤含霧雨偶來若居夷我無遠遊志何與親愛離
暑退初可喜秋來轉堪悲壯顏豈草木憔悴同此時
中心與百憂日暮如有期悄悄出空宇悠悠適荒陂

阮窮勿復歎天欲昌吾詩

宿幻住棲雲堂

窻白鳥聲曉殘鐘度溪水此時幽夢迴獨在空山裏
松巖畱佛燈葉地響僧履余心方正寂無使群動起
送賈鳳進士

新逢洛陽客握手共遊般如何異鄉土乃得此交歡
相逢既不易相違亦良難驅馬夕云返北風野多寒
登高望山川浮雲杳漫漫群獸相號呼哀音摧心肝
遊子念高堂歲晚身得安人生如蓬萍飄流無定端

重合諒有日長歌聊自寬

寄王七孝廉乞猫

鼠類固甚繁家有偏狡猶厥質亦陋微朋聚工造怪
舞庭欲呈妖憑社期免敗饑同善飯頗暴比橫行噲
倉偷自詫肥穴竄寧辭隘唯思淮南舉不悟河東戒
嗟余守窮僻有屋如弊廨公然肆相欺遠告來別界
嚶嚶鳴橐頻窸窸綠幙快伺暗忌燈然聞腥喜餐餲
空牀印凝塵高壁墮墮隕墮核遺繁果亡汁覆鬕虿蝥壞
轟霆駭怒鬪急雨疑流暈書殘費補妝裊澆煩烘曬

入厠客驚吁守舍奴憂誠豈無老烏圓昔壯今何憊
不脩司捕職垂頭象瘖贖難求許邁符莫具張湯械
尋蹊漫設機薰隧徒吹韞遂令不眠人終夜長抑噫
君家產銜蟬許贈不以賣願得縱驅擒淨若刈菅蒯
盡殺豈匪仁去害容少懈高枕幸無苦君惠當再拜
送客之海上得誠字

臥廐困田子抱關老侯生豈無一時辱終有千載名
子亦屈身者薄祿非所榮結驪誰云淺一杯吐衷誠
艱難我何託所託在友朋平生不傷離此離骨爲驚
白日川上沒歌作變徵聲明朝欲觀海浩蕩逐東風

冬至夜坐懷周記室

夜聞驚鴻來一室寒且靜明朝日長至夜漏方最永
淒淒霜塗階皎皎冰入井故人昔同宿杯酒笑相領
年運方重周歡事忽盡屏別離孰無有爾獨限殊境
達曙恨難裁殘燈兀孤影

賦永上人紙帳

剡藤裁素幃坐使諸塵隔冬室自生溫寒窓屢驚
不隨直省被長覆棲禪篔簹思曾雪夜時宿伴山中客

初開北窻晚酌時寓江上外舅周隱君宅

春暄罷淒風朝始開北牖青山入吾座不異延故友
自掃榻上塵琴冊列左右悠然坐其間傲兀醉杯酒
況當江花落微雨斜日後遠見帆度川高聞鳥鳴柳
孰云非吾廬居止亦可久人生處一席累榭復何有
幽懷悟澹泊末事辭紛揉更擬長夏眠風期結陶叟

夏日與高廉遊無量佛院還憩王隱君池上

久臥困炎燠煩抱思一浣霽雨畱暫涼言出欣子伴
悠悠去景得稍稍來迹斷已尋名僧廬復謁高士館

蒲荷共南風池上新葉滿步陰覺衣輕汲冷嫌綆短
幸無塵中役樂此林下款鳴啁嚶斜陽歸駕猶可緩

曉起春望

今朝有春意原野晴始綠疎花未破烟新禽稍鳴旭
物情各欣榮客意胡刺促居閒厭寂寞從仕愁羈束
兩事不可齊人生苦難足安得長放歌花開酒醅熟

陳氏秋容軒

西郊莽迢遞川樹凝烟景雨過落紅蕖斜陽半江冷
蟬鳴山欲暗鴈去天逾永孤客對蕭條應嗟鏡中影

瞻木軒

有引

道士李玄脩所居庭有凌霄花依樹而生近
樹伐而凌霄獨存因以名室求予賦詩

凌霄託高樹引蔓日已長纏綿共春榮幽花藹敷芳
高樹忽見伐無依向風霜亭亭還自持柔姿喜能強
君子貴獨立倚附非端良覽物成感歎爲君賦斯章

雨中遣興

積雨坐無悶端由便寂寞好鳥不頻啼閒花最遲落
行園每度徑望岫時登閣只此可終朝何當有樽酌

題方厓師聽秋軒

西澗獨趺處涼飈度虛閣秋從夜深來流音滿林壑
初鳴忽澎湃稍定還蕭索月下暗禽翻窻間危葉落
上人習靜定談籟笑南郭喧寂兩無聞星河在寥廓
與內兄周思齊思義同過僧浩西齋夜酌

雨過月在花疎鐘閉禪舍幽僧與逸人對酌明燈下
園樹稍辭春池蛙正鳴夜嘉會莫蹉跎流年易傾謝
萱草

不見堂上親空樹堂下草夏來風雨繁離披數叢老

日暮欲忘憂，辜芳轉傷抱。

月林清影

疎林逗明月，散亂成清影。流藻舞波寒，驚蚪翔壑冷。
雲來稍欲翳，風動紛難整。圓魄忽西傾，愁看墮空境。

春草堂

靡靡堂廡草，託根近華楹。膏露旣灌芳，惠風亦揚馨。
匪蒙陽和力，孰使微物榮。中天駛景流，青節坐易盈。
但憂德澤遠，豈惜憔悴并。願言相蔓結，遮彼春逝程。
寸心雖難報，拔去還當生。

次韻內弟周思敬秋夜同飲白蓮寺池上

月出露已白，荷花香滿池。高僧愛清夜，畱客坐題詩。
竹動鳥驚夢，草涼蟲語悲。閒齋一瓢酒，應不負幽期。

聞鐘

迢迢烟際發，隱隱巖中應。初來覺寺遙，乍歇看山暝。
惆悵未眠人，空齋幾迴聽。

詠雨酬張進士羽見寄

珠碎復絲輕，飈迴乍拂楹。望中來曉峽，愁裏度秋城。
沙濕蛩應冷，荷響鷺還驚。聽絃知瑟潤，臥簟覺幃清。

一覽停雲句離抱轉難平

徐隱君陋居

脩途息往駕環堵老所依蕭條窮巷中故人亦來稀
交交風雨侵翳翳蓬藿圍局促不苟厭暫出復來歸
名都列飛甍煥耀朝日輝爽塏豈不慕終憂蹈危機
心舒體自適道在願無違茲焉樂飲水回賢良可希

西園曉霽

積雨淹半夏始晴園景饒高林上初日遠水泛迴颺
餘晴萱際蝶新響樹間鶯詎必勞觴詠煩憂坐已銷

題畫鷹得嘯字

高風動古壁竦立見蒼鷁軒然欲飛揚嗟此粉墨妙
秋筋束老骨天寒勢逾矯腦枯草中兔氣盡櫪上驃
健鶻雖百餘凡材豈同調乾坤正肅殺怒氣號萬竅
大野平開蕪悲臺落殘照荒城有妖狐夜作猛虎嘯
爲君試一擊壯士慙勇剽安能飽拳肉側翅隨年少

哭王隅

車行一輪摧鳥奮一翼傷人生失輔友誰當共提將
相逢豈無人不獲如子良朝遊羣彥林夕棄萬鬼鄉

春風吹南原百草萋以長呼君不歸魄割我欲斷腸
豈不悟生滅情至諒難忘

池上晚

春晚思悠悠閣前池水流新蒲風葉響如對野塘秋
野塘前歲路已隔歸舟度鳥下獨回頭青山杳然暮

醉歸夜醒聞雨

覺來聞雨聲燈輝耿殘夜窻間有危葉暗助瀟瀟下
不記醉歸時寢齋如客舍

夏夜起行西園

夜熱不能寐起步中庭前舉頭望高旻離離衆星暉
欲推理亂象天道幽且玄長歌來涼颺驚鳥止林顛
此時層城閉悄悄萬室眠誰復相與娛淡月孤光懸

師子林池上觀魚

穿蒲尾獨掉唼賓口群仰波平沒見痕池靜跳聞響
漁鼠已免捕僧孟每分養落日意無驚識我臨流賞
和張羽懷吳興舊遊之作效其體

城貫綠川長朱閣映飛梁鶯嬌山唱度蓮豔水嬉張
花童搦翠管桑婦挈銀筐若溪酒脂碧顧渚茗旗香

擇勝事未厭驚亂意俄傷回看舊遊地秋草變淒涼

送沈徵士鉉歸海上

我友張國士短若婁君卿家無一金產所結皆豪英
去年東方來向我道爾名相逢真甚都座客爲之驚
高標華月出雄辯流泉崩時方尚權謀處士皆振鐙
諸侯致幣聘公子將車迎爾獨念滄洲扁舟問歸程
翩翩冥飛鴻影過海上城儻見魯連子殷勤煩寄聲

重午書事

采蒲臨綠波團扇送涼過越客爭標渡荆巫弭節
家醕隣浮玉宮衣憶賜羅今年兵氣惡朱符佩更多

東白軒

昔宿東峰顛長夜何曼曼起看玄景晦冰雪積未泮
翻翻驚濤瀾黝黝失星漢悲風吹木石澎湃而凌亂
太陽淪未光陰火吐微煥山精與罔象乘暗出遊翫
前巘挂猴猿後嶺起鴉鶴一時互號叫哀厲客腸斷
芒芒禹九州下視莫能判如身墮幽都涉水濟魚畔
金烏在地底其出疑可喚雄雞棲高樹凍噤不振翰
君家有層軒不異泰山觀扶桑拂簷楹咫尺海東岬

酒醒四鼓發暘谷已昇半紛紛物象出稍稍涼暄換
如盲得復明毫末皆可看山中舊所聞寂默應屏竄
何當此借榻夙興不待盥共賓義和車一觀天下旦
賦得姑蘇臺送賈文學麒

城上聞啼鴉臺前見遊鹿悠悠畫簾影薄暮澄潭曲
雲隨歌舞散日與興亡促美人不歸來湖水春更綠
思君別後登應盡天涯目

聞晚鶯時在圍城中

昨歲聞孤轉綠陰山院行今朝寢齋雨重聽獨舍情

西澗多喬木何爲亦到城

西齋池上三詠

葵花

豔發朱光裏叢依綠蔭邊夕同山薜落午竝海榴燃
幽馥流珍簞鮮輝照藻筵羣芳已謝賞孤植轉成憐

荷葉

楚服新裁得吳冠舊製成圓應間荇菜密欲翳蓮莖
聲中亂雨至陰下一魚行桂棹還思折江南日暮情

桐樹

晴粉朝英墜涼瓊夏葉舒鳥啼高樹早蟾轉薄疏虛
朱茲未薦曲彤管屢題詩坐恐銷華澤商吹起前除

遊城西得豔字

軍旗表山柵商鼓喚津店稻黃雲有香楓赤火無焰
賞懷誓飲償眺目擬窮占思叟已檠招欲賦更橫槩
烟開象極泮波溢類洪墊壞宮茨被垣棄壘葑漫塹
晨唳鷗鴻多秋腥鱸蟹膽吼鯨報僧粥臥獸衛官窆
揖道訛語談映籬陋救隄池開沐女盆石拔鬪夫劔
竿危鬧鈴響紗古冪燈豔時艷遊總稀歲稔酌饒醞

探囊出奇蒐扞弩脫浮念一覽一興嗟再到再忘厭
吟將嘯猿賡歸用棲鶻驗壑虛哀商叩嶺豁初魄閃
睿睿聽鳴鐘翻翻戒還轡興清逼林淒醉纈眩湖灩
顧標山已違入郭塵復染幽景慮遂逋拙詞紀姑僭

岳鳴集卷之五

古吳 高啓季迪 著

同里 拂雲居士 校

五言古體 詩六十八首

卞將軍墓

胡馬飲洛川 皇輿寓江左 宰輔失良圖 國門屢興禍
惡木不可植 猛獸終難馴 冠軍歷陽來 白日飛黃塵
兵叩西陵關 火焚大桁口 虎旅方敗奔 六宮竟誰守
卞公仗戎鉞 勇氣超常倫 立朝素正色 臨難仍捐身

落日百戰餘，裹創領殘卒。父子誓除兇，一朝共淪歿。
當年尚浮虛，風俗變縉紳。誰知効節者，不在清談人。
石頭義旗來，天狼夜流血。冊贈極哀榮，千秋表忠烈。
六朝卿相冢，無數青山根。至今行人過，但拜將軍墳。
馬鬣封未平，龍泉氣猶發。惆悵望松楸，一盃奠寒月。

綠水園宴集

平居寡良會，艱哉況茲時。幸逢金閨英，中筵接光儀。
名園過脩楔，景麗春陽燠。綠芷榮曲沼，朱華敷廣墀。
情宣寄高文，憂懌爲之披。觴來不敢訢，慮此朋歡虧。

何以淹返旆，頽光願遲遲。

畬宋南宮見寄時寓江上

棲寓豈高遁，偶家南渚濱。雖欣遠物累，終悲寡交親。
拏舟近入郭，言欲訪故人。叩門子不在，思懷竟難伸。
歸來掩蓬廬，幽臥屬始春。風暄柳意動，雪霽禽聲新。
孤遊盼芳物，尊酌孰與陳。念昔文翰場，弱蹤繼清塵。
鳴絃東閣夜，飛蓋西園晨。茲歡與年徂，憔悴兩未振。
朝蒙枉瓊藻，慰我佇慕勤。深情寄妍詞，不殊握中珍。
居屯在守志，養素豈辭貧。裁章以少畬，此道願無淪。

夢梅室

寢齋掩殘雪幽慢燈微皎不知南澗濱魂與春縈繞
初迷月入樹忽斷風驚篠餘馥悵難尋空山鶴鳴曉
送程校理遊江上

風亭裊離管草綠江水暮送此南浦人孤帆雨中渡
別觴足自緩前驛花滿路春叢戀山鶯晚絮迷汀鷺
我今獨愁居芳月誰與度佇立望遙波相思積烟霧
僧齋聞雨

寂寂初罷語悠悠未成眠高齋有春雨夜半落燈前
已傷花委樹復念水盈田老衲獨無聽繩床方坐禪

送劉使君

去年送使君路遠已海濱今年送使君路遠復過之
路遠豈足言人遠自可悲夕宴鮮共懽畫出乏竝馳
君懷孰可語予過疇能規此行剖竹符東方撫惇嫠
王事正靡盬奚暇及爾私但令中弗遷庶以慰所思

送周將軍請老歸耕

鞍馬息戎役筋力喜尚全買牛西岡垂聊復治廢田
零雨何濛濛決流亦涓涓良苗及時新人情一欣然

甘此耕耘勞忘彼富貴妍心同老農夫閔閔望有年
家廩倘得高尚願輸資邊

夜登南樓觀月

迢迢海上樓月出常先見吐嶺乍分規臨波已澄練
蒼茫城闕閉歷落星河轉毋違中夜歡皓景應難戀

西臺慟哭詩

有引

越人謝翺嘗爲宋丞相文山公之客公死之
十二年登釣臺祭公以哭自爲文識其哀曰
西臺慟哭記東陽張兼持示求詩僕感其誼

遂賦一首

峩峩子陵臺其下大江奔何人此登高慟哭白日昏
哀哉宋遺臣舊客丞相門丞相旣死節有身恥空存
北望萬里天再拜奠酒尊陰雲暮飛來恍如載忠魂
所哭豈窮途中抱千古寃上悲宗周隕下念國士恩
淒涼當世事感慨平生言空山誰知哀惟有猴與猿
豈不畏衆驚聲發不忍吞人言天有耳此哭寧不聞
願因長風還吹此血淚痕往墮燕山隅一灑宿草根
田橫去已遠茲道不復論作歌悼往事庶使薄俗敦

見耕者

茲晨有佳興挈杖行遠墟春犁稍已出土脉向煖舒
嚶嚶鳥轉谷瀏瀏泉鳴渠歲功自茲始爲農亦良劬
而我惰四體偃息在弊廬饑匱固當爾無爲歎踟躕
雨中書湖上漁家壁

漁舍烟不起瀟瀟雨初暝孤客與群鷗寒依葦間聽
山昏望易失波動愁難定歸思滿蒼茫空憐去帆迥
同杜二進士晚登潘氏樓

靄靄川樹暝夕陽忽然收林間一鐘來隴上衆未休
維榜漁石邊尋我棲寓儔本期散憂懷携手登此樓
那知見遠色蒼茫轉成愁幸茲有尊酌雖晚爲君留
送家兄西遷

昔別歸有期此別去何極西遷屬事變咎責非已得
家貧無行資空橐辭故國怱怱逐徒旅宛宛謝親識
牽攀不能留慟哭野水側離鴻爲迴翔浮雲暮愁色
別時雖云苦未若別後憶願行勿憂家養視自我職
殊方氣候異炎霧秋未息委命母怨尤長年強殮食

至蓮村

昔愛茲里幽誓將構蓬廬孰云墮世網重到十載餘
喪亂喜獨完烟火靄舊墟柴門在深巷落日榆柳踈
鄰翁念契濶携筐饋雙魚苦問客何事顏色與昔殊
焉知涉艱難多戚長少娛貧賤非所恥中情在閭屋
願翁勿相誚終當遂吾初

雨中登白蓮閣望故園

亭亭高閣上渺渺清川曲日暮靄靄愁薜蘅雨中綠
聞鐘僧已返荷笠人猶牧歸棹獨難尋江南望雲木

尋照公

遠尋林下僧不識林下路隔雲孤磬響因到繡經處
相對竟忘言夕陽在祇樹

江上過丁校書宅留飲

迂權入浦洑言尋故人扉雞鳴村樹烟寒旭景尚微
子起罷理髮相延闕中闈雅詞旣云宣濁醕亦以揮
幸茲竟日歡一浣積慮非尚慙有羈牽暫會復遠違
臨流送我還迴颺夕吹衣亂來人情改高誼似子希
儻不終憚煩卜隣遂相依

遊靈巖賦得越來溪

越女遊未去越兵噫已來青山舊溪上無復見樓臺
過客空惆悵荷花秋自開

立春前一日喜雪

一冬纔見瑞三白詎須頻未嫌遲送臘唯憐預占春
積砌猶殘東粧苑已芳辰留更明朝落梅花欲鬪新
移家江上別城東故居

人情戀故鄉誰樂遠爲客我行豈得已實爲喪亂迫
悽悽顧丘隴悄悄別親戚不去畏憂虞欲去念離隔
雖有妻子從我恨終不釋出門未忍發惆悵至日夕

雨中客僧舍

客夢方暫適竹間風雨驚起登林端閣迢遞望層城
景寒川樹疎野晦原烟平不邀釋子語何以緩羈情
見花憶亡女書

中女我所憐六歲自抱持懷中看哺果膝上教誦詩
晨起學妙妝鏡臺強臨窺稍知愛羅綺家貧未能爲
嗟我久失意雨雪滿路岐墓歸見歡迎憂懷每成怡
如何屬疾朝復值事變時聞驚遽沈殞藥餌不得施
倉黃具薄棺哭送向遠陂茫茫已難尋惻惻猶苦悲

却思去年春花開舊園池牽我樹下行令我折好枝
今年花復開客居遠江濱家全爾獨歿看花淚空垂
一觴不自慰夕幔風淒其

東陂路上阻水

不覺去村遠蕭蕭柳間步江雨夜來多春流稍侵路
褰裳自可涉不待漁舟渡

獨酌

白日下遠川寒風振高柯蕭條掩關臥暮雀忽已過
我有羈旅愁鬱如抱沈疴起坐呼清尊獨飲還獨歌

一斟解物累再酌迴天和數觴竟復醺翻恨愁無多
所以古達士但飲不顧他回頭向婦笑戚戚終如何
同杜徵士寅過南渚赴朱七文招

五月燕雛飛絲成桑葉稀相逢總羈旅白苧未縫衣
扁舟喜同載晚度滄洲外樹失潮氣昏沙喧雨聲大
將迷路却通窈窕復蒙籠果熟皆梅子禽啼盡郭公
兵戈苦未息莫歎猶爲客此去醉誰家江邊主人宅

始聞夏蟬

翾翾纔得蛻咽咽未成喧翳葉誰能見南風綠繞軒

乍驚變節物還念別郊園何待當秋聽方今羈思繁

贈斲苓者

山田不生苗零雨空漑之歲晏窮谷中何以療我饑
青青萬長松兔絲絡其枝不知何樹下乃有千年脂
朝行西澗濱暮行東岡垂荷鋪偶遠樵言尋亦良疲
鑿彼土石間得此瓊瑤姿香因清飈發色藉玄泉滋
嘗讀炎帝編徵功實多奇天和滌煩滯靈味扶殘衰
詎必勞悲歌去采商巖芝歸來拾荆薪炊之作晨糜
八珍豈不美素餐懼有嗤服斯待輕舉往與仙人期

我昔

我昔在家日有樂不自知及茲出門遊始復思往時
貧賤爲客難寢食不獲宜異鄉寡儔侶僮僕相擁持
天性本至慵強使賦再馳發言恐有忤蹈足慮近危
人生貴安逸壯遊亦奚爲何當謝斯役歸守東岡陂
將往海上舟行值雨投僧舍

沙響聞雨來中途生旅愁遙尋晚林磬暫駐寒塘舟
窻下一僧老竹間諸鳥幽誰言阻遠去翻使得佳遊
暫歸鳴珂里舊宅

故廬在東里久出喜偶旋景物亂後非行觀一悽然
荒榛塞園逕流塵蔽堂筵念茲經營初勤苦唯我先
蕪壞棄不守顧已誠有愆雖懷首丘願未絕遊方綠
是主乃如客暫來靡留連日暮復遠去哀抱將何宣
江上晚晴
江虹斷雨脚返景明墟里宿鳥亂歸村幽人獨臨水
漁舟隔浦飯烟火蘆中起閒吟望遠岑緩步尋芳芷
此夕遇新晴憂懷偶然喜

與王隱君宿寧真道館

松下禮真罷鶴鳴暮壇空偶來古仙居欣與靜者同
玄言不知還遂宿琳館中蒸菌沃芳露焚蘭度微風
山瓢瀉未盡月出秋林東語化衆妙歸探元萬緣窮
不與至道俱何以超妄蒙願從希夷遊稽首青牛翁
送珪上人

曾來看江雨同倚香臺上師今西去遙還上香臺望
淮山暮鐘起楚水春帆漾來去本隨緣分携莫惆悵
冒雨暮歸過白沙湖

天寒滿湖雨獨棹東歸急遙望水邊村蕭條暮烟濕

家人應候我深映柴扃立

送袁憲史由湖廣調福建

只謂遠遊苦寧知遠遊樂君今萬里歸顏色殊不惡
自言楚帆開初別鳳凰臺采石月下過匡廬天際來
試沽彭澤酒憔悴陶家柳最愛小姑妍臨行復回首
遠逐繡衣遊聞登黃鶴樓千峰漢陽晚一鴈洞庭秋
西上荆門渚銀釵見巴女歌斷竹枝詞江陵夜風雨
看盡幾多山今朝始得還秋風吹驛騎又欲度閩關
閩關聞更好瘴霧晨收早椰子美如漿蘭花多似草
嗟余戀故鄉不肯涉津梁把酒看君去相思空斷腸

泛南溪 二首

山折水暫旋山開水仍往東陂匯初成秋色瀾然廣
碧蘿花茸茸月映石壁上此文試浴洄一理烟中舫

其二

清暉汎悠悠東與前溪合菱葉間荷花風來秋颯颯
久行愁寂境忽有人烟雜我欲發棹謳漁師肯相答
宴顧史君東亭隔簾觀竹下舞妓

美人竹下舞醉看隔簾櫳彷彿瑤臺子遊戲綠雲中

玉鈎正蕩月羅袖忽驚風莫逐青鸞去尊前樂未終

夢遊仙

夢騎蒼麒麟手持白玉鞭長風八萬里夜入通明天
正逢絳闕開謁帝陪羣仙飄飄紫霞珮杳靄青霓旃
命與衛叔卿共讀金藥篇玄文不可識謫歸一千年
驚寤忽長歎虛空但雲烟

獨遊白蓮寺池上看雨

輕衣忽變冷池雨來清夏圓文細細生密響條條下
荷披魚躍起樹靜禽鳴罷賞澹自忘還非因與僧話

贈薛相士

至正辛丑嘉禾薛月
鑑過余求詩因贈

我少喜功名輕事勇且狂顧影每自奇磊落七尺長
要將二三策爲君致時康公卿可俯拾豈數尚書郎
回頭幾何年突兀漸老蒼始圖竟無成艱險嗟備嘗
歸來省昨非我耕婦自桑擊木野田間高歌誦虞庠
薛生遠拏舟訪我南渚旁自言解相人視子難久藏
腦後骨已隆眉間氣初黃我起前謝生弛弓懶復引
請看近時人躍馬富貴場非才冒權寵須臾竟彼相
鼎食復鼎烹主父世共傷安居保常分爲計豈不自

願生無多言妄念吾已忘

曉臥丁校書西軒

窓月澹欲失矐矐逼初曙屋外鳥聲多應知有嘉樹
殘香掩幽寢未事澄紛慮頗似宿東巖僧齋竹深處

水上盥手

盥手愛春水水香手應綠汙汙細浪起杳杳驚魚伏
惻悵坐沙邊流花去難掬

贈漫客

畸人誠達生聳叟亦曠士漫客乃其徒放意在雲水

有山卽漫遊有竹仍漫止漫吟不求工漫飲不須美
與物無畱情所適皆漫爾人生本漫寄何事紛戚喜
與子作漫交逍遙論茲理

晝睡甚適覺而有作

閒居況懶拙盡日無營爲掩室聊自眠一榻委四肢
向暄思益昏南窓滿晴曦吾神誰能繫八表從所之
殷憂常苦縈茲焉忽如遺有身不自省此外安得知
覺來鄰鷄鳴已過亭午時如遊釣天還至樂不可追
我意在有適寧顧朽木啻猶勝夸毗于塵中爭走馳

秋日端居

秋意口蕭索郊園霜露餘出遊無山水聊復守吾廬
巷轍久已斷山瓢仍屢虛非甘寂寞者誰樂此閒居
夢鍾離兩兄

淮水去不極淮山與偕馳鍾離兩遷客路遠歸何期
孰云歸無期此夕乃見之握手說辛苦杯觴復同持
須臾忽驚別我夢方自知雖夢亦是喜況乃歸來時
雨中畱徐七賁

江寒宿雨在落葉滿村濕畱君繫君艇莫犯風潮急
試問欲歸城誰家借篔簹

看刈禾

農工亦云勞此日始告成往獲安可後相催及秋晴
父子俱在田札札鎌有聲黃雲漸收盡曠望空郊平
日入負擔歸謳歌道中行鳥雀亦群喜下啄飛且鳴
今年幸稍豐私廩各已盈如何有貧婦拾穗猶惛惛
晚步遊褚家竹潭

落日猶半野閒來潭上遊非因戀幽賞聊欲散煩憂
澄波魚噏夕荒竹鳥吟秋不是愚溪上胡爲吾久畱

召脩元史將赴京師別內

承 詔趣嚴駕晨當赴 京師佳徵豈不榮獨念與
子辭子自歸我家貧賤久共之閨門藹情懽寵德不
以姿天寒室仍罄何忍遠去茲 王明待紬文不暇
顧我私怱怱愧子勤爲我烹伏雌携幼送我泣問我
旋軫時行路亦已遙浮雲蔽川坻宴安聖所戒胡爲
守蓬茨我志願禪 國有遂幸在斯加餐待後晤勿
作悄悄思

早發土橋

空山遠無驛逆旅聊可宿懷征候鳴雞燃帶續我燭
僕夫昨行苦爛熳睡正熟呼之愧怱怱推車出茅屋
高巘尚懸斗深谷未升旭欲亟去返遲怪石暗屢觸
思當在家樂日晏始舒足胡爲此行邁霜露勞局促
王事靡敢辭非關狗微祿

車過八岡

上岡如登天下岡如決川勞哉挽車夫呀喘當我前
兩轅鬪欲摧土石厲且堅我行閔其憊時下息彼肩
雖非古羊腸實懼覆與顛如何道路子車來競連連

白日已傾仄我行尚迴遑安得駕逸足平野超飛烟

寓天界寺雨中登西閣

片雲出鍾山陰滿江東曉幽人閣上寒風雨啼鷺少
紅塵禁陌淨綠樹層城繞不爲怨春徂離懷自憂悄

送陳四秀才還吳

君是故鄉人同作他鄉住同來不同返惆悵臨分處
手把長干花回望長洲樹恐起憶家心愁題送君句

送禮部傅侍郎赴浙西按察

聖上想賢哲夫君歛來東姓名簡 睿聽召對 明

廷中彷彿似其先夢寐相感通秉綸坐西掖曳履遊
南宮復輟要近居往試澄清功糾郡握使節炎天凜
霜風顧余謬珥筆言笑獲屢同無端此分袂離抱何
忡忡

送聯書記東歸

旅寓古寺間得與名僧居時因簡牘暇共諦楞伽書
倚閣山暝後步廊月生初屢聞真詮妙一使羈縻舒
茲晨別同袍言旋舊精廬飛雲自無滯媿我焉能如
東浦秋正遙西齋夜應虛傷離固知望相送聊踟躕

對園柳

依依客園柳來時未堪折今看夏條長上有新蟬咽
芳序惜推遷家人念離別秋風莫遽起旅思方騷屑
僕至得二女消息

我僕持尺書來自我故鄉讀書意未了呼僕問彼詳
云我兩小女別來稍已長大女手搽搽窓前學縫裳
小女啼啞啞走索瓜果嘗喜爺有使歸迎門各踉蹌
我坐聽此言欲慰意反傷稍近尚爾思更遠何能忘

菊鄰

菊本君子花幽姿可相親清秋發孤艷似避東風塵
采采霜露餘繁英正鮮新車馬不過賞相看但幽人
幽人若愛菊自是柴桑倫閑陶誰與語叢栽四爲隣
入徑朝摘遠循籬暮觀頻一壺對酌折花插盈巾
殊勝處俗里歌呼醉遭喚

出城東見古溪流水坐憩久之

空潭寒無藻瑩淨涵青天長松百餘株扶疎繞潭邊
或行值幽絕坐賞忘歸旋清氣似相與西風忽溼然
水動松亦鳴紛抄復淪漣羣鷗盡驚矯疑是龍吟淵

微闌蕩餘暉流響散遠烟靜聽意已消何須撫徽絃
安得卜此居一謝塵中緣朝來潭上坐暮向松間眠
夜坐天界西軒

明月出東閣照我坐前軒諸僧夜已定寂寞與誰言
烟漫螢微度風條蟬罷喧清景雖堪悅終嗟非故園

京師嘗吳粳

新杭粳如玉遠漕來中吳初嘗愛精鑿想出官田租
我本東舉民少年習耕鉏霜天萬穗熟恣啄從飢鳥
日暮刈穫婦妻孥共嚙呼茅屋夜春急風雨江村孤
晨炊滿家香薦以出網鱸如今幸蒙恩遨遊在
南都門前半區田別來想已蕪長年盜寸廩補報一
事無投匕忽歎息飽食慙農夫

爲因師題松梢飛瀑圖

松風散飛瀑夜作濤聲急栖鶻起空山如驚鬼神入
定僧寂無聽任灑袈裟濕

送周四孝廉後酒醒夜聞雁聲

別時酒忽醒客去唯空舍風雪雁聲來寒生石城夜
遙憶渡江船正泊楓林下

答內寄

落月入曉閨相思不須啼我非秋胡子君豈蘇秦妻
風從故鄉來吹詩達京縣讀之見君心寧徒見君面
拔草不易絕割水終難開行雲會有時飛下巫陽臺
莫信長安道花枝滿樓好白馬繫春風離愁坐將老

真氏女


余在史館日談次有言姚文公承旨翰林時
嘗飲玉堂有侍妓問語者詢之乃真文忠公
裔孫也父爲筦庫負縣官錢鬻之以償遂流

于娼家公愍之白于執政落其籍以嫁院吏
黃逮逮後至顯官同館之士聞之多賦詩者
余亦爲作一首

妾恨非緹縈上書動天子自鬻償縣官幸得脫父死
誰知故相家失身居狹斜遂令園中柏翻作道傍花
富筵唱金縷朔客驚聞語相問忽相怜開籠放鸚鵡
棄置舞衣裳新理嫁時裝良人身作吏不是販茶商
花釵映羅扇初與郎相見貴賤古難常妾心那敢怨
願郎去作官莫掌官錢穀生子但生男家門免多辱



國家圖書館, NATIONAL CENTRAL LIBRARY, TAIWAN, R.O.C.



岳鳴集卷之六

古吳 高啓季迪 著

同里 拂雲居士 校

五言古體

詩二十一首

送李架閣赴山西行省

日暮踰大河北望古晉疆
萬里饒風沙地接戎與羌
翩翩并州兒躍馬能挽強
古來事爭奪百戰在此場
聖皇剗羣雄撫劔定八荒
瞻茲形勝都建侯樹藩方
披榛開幙府賓從皆才良
所期偃甲兵民物自此康

山河罷阻險沃野多耕桑君行願努力遠別庸何傷
送王哲判官之上黨

羣材萃京師有若奔川海盍簪向華館唯君最韶年
忽行佐名邦輟理金匱編朝辭

紫闕下暮宿黃河壩馬上看太行日落萬里烟峩峩
天井關高城鬱相連遺氓得少安時清罷戈鋌亟行
勿憚遠 聖意煩承宣

登句容僧伽塔望茅山

高登大士塔遙望仙人峯炫峯夫何如玉削三芙蓉
雲深句曲樹日落華陽鐘長君昔飛昇駕挾雙白龍
至今學道處洞府留靈蹤丹泉夜吐光瑤草春含草
仙應笑我愚塵世苟自容胡不鍊爾形歸來蔭長松
望仙指尺間不隔雲海重真訣倘肯授執鞭願相從

贈楊滎陽

嘉陵每山水亦復富文彥楊君產其邦材拔性高狷
布衣走名都早入藝林選客屈稷下談王邀鄴中宴
出門得名聲不假親舊援匣劍未久埋囊錐已先見
吐詞實瑰奇讀者心欲顛刀鳴鬪夫勇花妥笑女倩

如觀廣場中百戲張曼衍平生眼無人遇我獨相善
陌頭每竝出兩騎無後先喜從兔園遊慙受狗監薦
君歌我固服我賦君亦羨墮筵吟帽烏踏席舞裙茜
醉中共笑語往往雜諧諺有時出城西山水恣攀踐
岩眠曙猿驚澗飲夏鶯囀吳宮妓去榭蕭寺僧開殿
龍門剝陰苔高什記題徧歡遊正相耐世事忽驚變
朋儔半生死一世如激電我棹返江濤君車赴淮甸
旋聞逐流人居濠又移汴一身去何賫空橐唯破硯
危塗晚行疲欲進足如骨狼來樹杪避蝎走燈下見

渡河自撐篙水急船斷牽及至秋已深舊褐風裂片
難尋高陽飲空甲鄖陵戰 聖恩忽加憐收拔佐山
縣卑曹敢云辭執版謁府掾官庖盡炊藜民賦半輸
絹低飛蓬蒿間不異雉帶箭有親寓京師年老闕供
饌欲奉朝夕歡去職胡敢擅晨上宰相書得歸遂微
廟上堂具珍鮭呼婦賣釵釧我時別君久問詢愧無
便空題憶君詩細字書滿卷今春被 詔起前史預
編撰始來長干門楊柳正飛燕逢君風塵餘不改舊
顏面握手話苦辛悲喜雜慶唁客中雖無錢自寫賒

酒券邀來臥東閣月出初鎮院君言涉艱難壯志今
已倦回頭悟前非更名慕遠君近改名去非我聞棠谿金
不畏經百鍊胡爲暫失路遽欲老貧賤

神武四海始安奠棧通諭夷文驛走徵士傳

時巡抗霓旌肆覲冠星弁功成萬瑞集禮欲議封禪
君才適時需正若當暑扇手持照國珠胸出補袞線
便應上金鑾立對被天眷嗟余忝載筆鼠璞難自
衍幸茲際昌辰魏闕寧不戀但憂誤蒙恩不稱終
冒譴秋風楚湖滿歸舸恍欲轉君若念故交殷勤一

相餞

寺中早秋

秋風入寺早孤客驚離索斜日數蟲懸槐花雨餘落
砧聲起廢苑簾色淒高閣獨伶明鏡中玄髮猶如昨
天界翫月

洪武二年八月十三日元史成中書表進

詔賜纂修之士一十八人銀幣且引對獎
諭擢授庶職老病者則賜歸于鄉閱二日
中秋諸君以史事甫成而佳節適逢乃卽所

寓天界佛寺之中庭置酒爲翫月之賞分韻

賦詩以紀其事啓得懼字云

聖主念前鑒述作徵名儒羣來高館間
厠跡愧我愚孰謂此責輕毫端有褒誅
書成進丹陛召對共拜趨去畱雖不同
雨露均沾濡已淹三時勞可廢一夕
娛况逢端正月當空照眉鬚流光滿金
界境與人間殊廣庭布長筵嘉肴薦芳
腴豈唯多士集亦有名僧俱興酣貴形
忘諧笑不復拘觴行豈辭勤仰看轉斗
樞明辰卽分袂此樂誠須臾人生四海
間相見皆友

于不知誰使令流蕩無根株忽然此相遇旋復成天
隅願各崇令名逍遙步亭衢明年重見月相憶常長
吁

寄題鄞縣青山寺鍾秀樓

東湖秀可攬造化夙所聚聞有釋子居雲中構層宇
剝出辨遠岑帆迴識脩渚鳥外月上海虹邊樹含雨
願言此登眺去作逃禪侶西崦暮鐘時憑闌共僧語
曉出趨朝

正冠出門早杳杳鐘初歇嘶騎踏嚴霜驚鴉起殘月

透迤度九陌窈窕瞻雙闕長卿本疎慢深媿陪朝謁

送顧式歸吳

顧君野王孫與我生共縣故鄉未曾識却在他鄉見
畱連忽東還長揖袖詩卷自言吳中好稻熟湖鱉賤
欲臥烟雨舟醉讀三高傳余方謬通籍講帷近
清
殿故園豈不懷君恩正深戀遠欲謝鄉人殷勤附
君便

御溝觀鷺

白雪泛金塘群翻動曙光危棲翹獨趾亂唳引脩吭
池中鵠可竝廷內鷺難行自憐觀詠者江湖興未忘

夢姊

我家白頭姊遠在婁水曲昨夜夢見之千里地誰縈
不知別已久尚作別時哭覺來旅齋空風雪灑窻竹
田家有弟妹終歲喜相逐我非王事縻胡忍離骨
肉城東先人廬尚有書可讀何當乞身還親爲姊煮
粥

答定水寺芭公

日晏初出院閒齋一蕭然忽在名僧書始知在清泉

憶昔雲巖居共締林中綠夏陰繞澗吟秋霽開閣眠
睽合苦難常別來歲頻遷趣同貴道在跡異慙名牽
明月出東海想照空山禪無因荷衣襍往禮高峰前

訓謝翰林畱別

并引

啓與同郡謝君徽同徵又同官翰林洪武三
年七月廿八日 上御闕樓召對擢啓戶部
侍郎謝吏部郎中俱以踰冒辭卽蒙 俞允
賜內帑白金放還於鄉

江左稱謝家奕葉多名人君今復秀發瓊枝邁風塵

顧余忝鄉里才華敢論美 丹詔偶見徵雲蘿歛同
起謁 帝入九關咫尺瞻 天顏從茲謬通籍接武
諸公間朝侍 青坊讀夜陪玉堂宿講罷分 御羹
吟成刻官燭出入在 兩宮與君無不同自慙本鷗
鷺亦得隨鸚鵡朝朝禁門下聽雞共騎馬上國多故
人情親似君寡竝 命超列卿 寵極翻憂驚我叨
掌國計君佐持銓衡借辭向 明主叩 天聽 天
語勅賚內帑金東還特相許拜賜出 皇都人言似
兩疏月明照宮錦同棹入中吳吳中故鄉道雨歇秋

光好青山度水迎喜我歸來早落日下長洲分携忽
解舟如何到家喜却有別君愁別君去還邇只隔吳
江水離思與秋長蘆花三十里來往片帆通相期作
釣翁高歌雖鄙野猶可贊 王風

過白鶴溪

昨發白鷺洲今過白鶴溪溪流幾回轉只在晉陵西
月出女猶浣雲深猿自啼茅峰雖咫尺無計躡丹梯
至吳松江

江淨涵素空高帆漾天風澄波三百里歸興與無窮

心期弄雲月迢遞辭

金闕晚色海霞銷秋芳渚蓮

最久別釣漁磯今朝如拂衣忘機舊鷗鳥相見莫驚
飛

始歸園田 二首

辭秩還故里永言遂遐心豈欲事高蹇居崇自難任
清晨問田廬荒蹊尚能尋秋蟲語左右翳翳桑麻深
別來幾何時舊竹已成林父老喜我歸携榼來共斟
問知 天子聖歡然散顏襟相期畢租稅歲暮同謳
吟

其二

白露蕪草木荒園掩窮秋歸來一芟理始覺吾廬
高柳蔭巷疎清川映閣流落日望禾黍離離滿西
乍歸意自欣策杖頻覽遊名宦誠足貴猥承懼
早退非引年皇恩未能酬相逢勿稱隱不是與
侯

睡覺

爐熏霽宿潤秋澹林扉裏曙色透窓來幽人
未起
寒鴛露樹怯日出烟禽語却似候東華朝衣寒似
亦

與王徵士訪李鍊師遂同過師林尋因公

玄館啓真境紺園闕清香茲晨兩地遊乍出
巖煩鄉
身鳴桂花落澗戶秋風涼開士演金偈羽人
薦瑤觴
亦有詞苑英清芬吐華章愧我自徵起束帶
忝周行
山林久在念那期復來翔睽合固知妄去來亦
何常
誰言道各異妙契宜相忘

雨夜宿東齋

砌冷一蛩急窓空諸葉稀蕭條風雨夜幽臥掩
床悒
隣杵聽已歇齋燈看向微勿憂歲暮計聊食
故山薇

效樂天

誰言我久賤明時已叨祿誰言我苦貧空倉尚餘粟
舜闕是引退還鄉豈遷逐舊宅一架書荒園數叢
菊俗緣任妻子家事煩僮僕性懶宜早閑何須暮年
促猶著朝士冠新裁野人服杯深午醉重被煖朝眠
熟旁人笑寂寞寂寞吾所欲終老亦何求但懼無此
福功名如美味染指已云足何待厭飽餘腸胃生痰
毒請看畱侯退遠勝主父族我師老子言知足故不
辱

七言古體

詩一十六首

唐昭宗賜錢武肅王鐵券歌

妖兒初下含元殿天子仍居少陽院諸藩從此擁連
城朝貢皆停事攻戰岐王已去梁王來長安宮闕生
蒿萊天目山前異人出金戈雙舉風烟開羅平惡鳥
啼初起犀弩三千射潮水歸來父老拜旌旗醜酒搥
牛宴鄉里擊裘駿馬騎春風錦袍玉帶眞英雄詔書
特賜誓終始黃金縷字旌殊功虎符龍節彤弓矢後
嗣猶令赦三死盡言恩寵冠當時天府丹書未喻此

摩娑舊物四百年古色滿面凝蒼烟天祐宰相署名
在尋文再讀心茫然古來保族須忠節受此幾人還
覆滅王家勲業至今傳不在區區一方鐵人生富貴
知幾時泰山作礪徒相期行人曾過表忠觀風雨斷
蘇埋殘碑

太白三章

太白初升北斗落行人早起車鳴鐸豈願身離父母
邦山川路遠非不惡貧賤未知生處樂

太白正高北斗低行人出關雞亂啼他鄉無人是知
已欲歸未歸東復西弊裘愧見家中妻

太白猶懸北斗沒行人衣上霜拂拂下馬飲酒歌苦
聲新豐主人莫相忽人奴亦有封侯伯

送顧使君

秋江月滿秋潮大江上行人待潮過別離休說渡江
難半日順風船穩坐楚鄉茫茫葭菼平使君來時雄
雉鳴子弟從軍隔江去幾家猶住夕陽城水田雖荒
飯常足芡米夜舂三十斛誰道繁華不及前戶無征
稅官無獄渡江渡江君莫畱江北樂似江南秋

中秋詠月張校理宅得南字

八月望夜天如藍海色卷霧山收嵐玉盤元沉龍窟
底忽起萬丈誰能探初來空中光尚溼孀娥寒鬢風
鬢鬚人言一年此最好金精水氣秋相酒小星盡去
大星在芒角欲吐敢與叅天將洗眼照下土啖食肯
縱妖蠶貪穿深窺暗不遺隙罔兩忌影逃岩嵌前年
客中憶見之家人怨別方喃喃荒山不知佳節至垂
首凭案尋香蟬但怪流輝入敗戶油燈失燄甯孤龕
起行陰林不用炬剝啄獨叩峯西菴虺蛇亂踏心膽

悻怪影走石背楓楠卽呼道人共載酒放舟直下夫
容潭翻翻驚鶻落樹杪吹笛正和鳥飛南今年在舍
反寂寞暗室困臥如僵蠶乾愁無端負良夜月固不
言我則慙人無賢愚競翫賞況我清景性所耽忽憶
諸君臨河水持被就宿聆高談爲呼老婢掃庭宇一
席盤飴梨與柑江城重閉萬家寂樓鼓近聽纔搗三
空塔淒其覺露泫虛牖窈窕疑烟含婆娑欲畱月伴
影素鸞西下煩停驂明宵復出已難似動別經歲嗟
何堪尊前此月又此客世所難遇心應諳關山幾處

未解兵擊柝不寐愁丁男南隣歌舞北隣哭月雖同
照異苦甘何人爲我揮天戈乾坤多難俱平戡行者
得還居者樂清光所及恩皆覃懸知此願未易遂憂
來舉盞從沉酣須臾衆散曉蟲急古桂吹落青蕤蕤
送王太守遷雲間

書夢贈徐高士

真人高居紫霞房靈津夜灌通桃康其神不彫駐景
光名籍早入丹臺藏道成驂蚪面虛皇凌攝梵炁遨
穹蒼下視羣生墮迷方倏忽起滅更喜傷我嘗夢遊
至其傍廣庭淨發衆妙香仙媛神官儼成行坐考雲
笈披琳琅稽首歸依大鑿王願憫濁世同淪亡龍根
珍脯不可嘗但覺凡火燒飢腸身心俱病孰爲攘至
言授我何敢忘空山無人覺在床海月未落天蒼茫
佐卿化鶴來吾鄉朱冠縞衣頰而長篋中活人何所
將參苓木芍枳桂薑學仙曾聞道非常幸賜太藥和

陰陽誓叅飛楮上翱翔人間徧施甘露漿掃除熱腦
俱清涼痰苦不生壽無量

劉松年畫

樵青刺篙勝搖槳船頭分流水聲響青山渺渺波漾
漾白鷗飛過時一兩載書百卷酒十壺日斜出遊女
兒湖隣舟買得巨口鱸醉拍銅斗歌嗚嗚此樂除却
江南無

送葉卿東遊

問君辭家今幾年布衣綫斷芒屨穿江湖夢迴燈火
夜聽雨每憶山中田兵戈忽斷故鄉路雖有兩足歸
無緣上書願雪父兄恥畫地聚米籌山川居然無成
困逆旅白日但看孤雲眠時人不容稱生傲坐客豈
信毛公賢黃金已盡酒徒散壯士反爲兒女憐飢吟
倚壁氣未餒有似病鶻栖荒烟卻欲南遊探禹穴僕
夫整駕雞鳴前波濤翻江畏飢鱗霧雨連海愁飛鳶
相逢誰肯問憔悴山水自爲窟人妍乾坤無家去何
止飄泊不異迴風船區區願君自愛惜今古遇合無
非天亂離貧賤何足歎王孫亦在道路邊我今豈少

四方志讀書坐破床頭瓊恩讐兩無欲誰報送子空
歌寶劔篇

九日與客登虎丘至夕放舟過天平山

昨日風雨今日晴天意令人作重九登高未用憶龍
山弔古竟須尋虎阜秋清人稀葉滿寺屐齒無聲石
苔厚我來但欲問前王不知伯氣銷沉久下穿山骨
葬弓劔銀海夜寒空不朽樓臺荆棘今幾變英雄誰
似青山壽十年自歎在塵土雞鳴起逐途人走茲遊
喜出世網外相携況是同心友盤梯共上峯頂塔欲

觀東海攀北斗中原不見鴻雁來浮雲萬里空回首
鍾聲催送晚出寺栖鴉已滿祠前柳秋風吹林客醉
時夕陽下嶺僧歸後山畱好月續清景乘興夜過漁
村口放船不覺露沾衣滅燭始看星在罨金陵酒熟
來謫仙赤壁歌殘泣嫠婦人生此樂信難得夢幻功
名有時有它年何必問誰健但令不負持螯手詩成
底用刻山石爲寄龍門說空叟明朝來借白雲泉淨
洗從前千劫垢

夜發錢清

錢清渡頭船夜開黃茅苦竹聞猿哀客官醜酒水神
廟風雨滿江湖正來蒸飯炊魚坐蓬底不覺舟行兩
山裡棹歌早過越王城東方未白啼鴉起

草書歌贈張宣

昔聞汝祖東吳精醉傳草聖醒而驚汝今能飲不滿
杓逸氣欲與相崢嶸高堂把筆若把槊長綃一拂悲
風生陰垂大澤雷風過響破巨峽波濤傾颺颺遊絲
骨晴晝落落高斗廻寒更飲猿連臂深澗絕飢鶻捩
翅荒烟橫自言靜裡觀萬物故能變化窮其情嗟余

少本好劔舞學書晚方從父兄終焉嬾墮不得就塵
滿硯田常廢耕覽時撫事每有感胃次砢磳何由平
空齋徃徃出怪語吟聲相應飢腸鳴篇成請君爲我
寫墨瀋灑筆從奔崩是時黃雲閉歲暮返照忽出寒
江明手隨意到不畱阻正似突騎陰山行令嚴不聞
戈甲響一夜下盡名王城安得師行亦如此頃刻坐
見乾坤清嗚呼作歌聊贈汝愈使流淚沾衣纓

獨遊雲岩寄周砥

城西諸山非不奇我遊獨與茲山宜紅櫻春開山後

寺白水夏滿山前陂幽居況與山不遠鍾鼓每到空
齋帷雨餘烟中落日下曳杖往讀頭陀碑兩崖蒼蒼
石色古枇杷樹高陰滿池殿燈欲昏上羣鼠塔鈴已
靜蹲孤鴟興來卽遊興盡返迎送豈要山僧知困窮
喪亂豈無感正賴此境忘吾悲嗟君何爲乃自苦破
羈短策塵中馳挂帆能來亦能晚浦口三日南風吹

練圻老人農隱

我生不願六國印但願耕種二頃田田中讀書慕堯
舜坐待四海昇平年卻愁爲農亦良苦近歲征役相

煩煎養蠶唯堪了官稅賣犢未足輸米錢虬鬚縣吏
叩門戶隣犬夜吠頻驚眠雨中投泥東鑿塹冰上渡
水西防邊幾家逃亡閉白屋荒村古木空寒烟君獨
胡爲有此樂無乃地邇秦溪仙門前流水野橋斷不
過車馬唯通船秧風初涼近芒種戴勝曉鳴桑頭顛
短衣行隴自課作兒子饁後妻耘前白頭雖復勞四
體若比我輩寧非賢旅遊三十不稱意年登未具粥
與饘便投筆硯把耒耜從子共賦幽風篇

嘗蒲桃酒歌

西域幾年歸使隔漢宮遺種秋蕭瑟誰將馬乳壓瑤
漿遠餉江南渴吟客赤霞流髓濃無聲初疑豹血淋
銀鬕吳都不喜黃柑釀隋殿虛傳玉殫名聞道輪臺
千里雪獵騎弓絃凍皆折試唱羌哥勸一觴氈房夜
半天廻熱絕味今朝喜得嘗猶含風露萬珠香床頭
如能有五斗不將輕博涼州守

送高二文學遊錢塘君梁人與余異譜

我家本出渤海王子孫散落東南方只今遙承幾世
後坐棄戰陳談文章嗟君渡江此相遇知有遠族

居梁嘗聞四海盡兄弟況我同姓能相忘十年近舍
道南宅歲時拜父登高堂君年雖少志則壯不肯與
世相低昂讀書閉閤人罕識明月夜照聲琅琅欲將
古道共推挽豈顧薄俗譏迂狂君來不欲是王式我
行或止非臧倉亂離正在相慰藉何事遠別遊錢塘
錢塘舊國我所到江山自存人已亡雁鶩長雲暮陂
澹牛羊落照秋陵荒繁華銷盡莽蒼出君行見此能
無傷西風吹塵扇難障不如歸臥須時康一飢小事
何足道故園尚有霜英黃

贈李外史

仙人飄飄若雲風來去倏忽誰能窮豈唯上界足官
府往往亦在塵埃中我欲尋真向五岳亂後舊路迷
榛蓬天雞未鳴夜谷暗海鶴已去秋壇空丹厓碧澗
瑤草歇洞府一闕無由通陌頭驚逢李道士自說柱
史爲吾翁傍人相傳解起死袖裏有丹如日紅我聞
安期古榮士親見楚漢爭雌雄終然濁世不肯住渡
海徑去先飛鴻玄洲東望纔指尺彩霞幻結金銀宮
何當共赴食棗約三花醉折春濛濛廻看城郭烟霧

杏大笑下士真沙蟲

缶鳴集卷之七

古吳 高啓季迪 著

同里 拂雲居士 校

七言古體 詩二十七首

聽教坊舊妓郭芳卿弟子陳氏歌 時至正己亥歲作

文皇在御昇平日上苑宸遊駕頻出仗中樂部五千
人能唱新聲誰第一燕國佳人號願時姿容歌舞總
能奇中官奉旨時宣喚立馬門前催畫眉建章宮裏
長生殿芍藥初開教張宴龍笙罷奏鳳絃停共聽嬌

喉一鶯轉過雲妙響發朱唇不讓開元許永新綉陛
花驚飄艷雪文梁風動委芳塵翰林才子山東李每
進新詞蒙上喜當筵按罷謝天恩捧賜纏頭蜀都綺
晚出銀臺酒未銷侯家主第強相邀寶釵珠袖尊前
賞占斷春風夜復朝回頭樂事浮雲改瘞玉埋香今
幾載世間遺譜竟誰傳弟子猶憐一人在曾記寬堂
學得成出處家傳世世只九天聲落千人聽片風塵
前日只聽得馬嘶聲不信芳名在師下風塵
一旦無城萬里長聽歌者從此飄零出教坊

辭京國客殊方閉門春盡無人問白髮青裙不理粧
相逢爲把雙蛾蹙水調梁州歌續續江南年少未曾
聞元是當時供奉曲朝使今年海上歸繁華休說亂
未非梨園散盡宮槐落天子愁多內宴稀始知歡樂
生憂患恨殺韓休老無諫傷心不見昔人歌汾水秋
風有飛雁此日西園把一卮感時懷舊盡成悲合情
欲爲秋娘賦愧我才非杜牧之

林屏山水圖歌

畫工知余愛青山久墮塵網無由還故將列岫寫屏

障使我臥起於其間從此長如宿清境枕上分明見
峯嶺爐烟曉入帳中飛擁被驚和白雲冷丹崖碧樹
層層開江雨遠逐孤帆來就中樓閣是何處彷彿神
女巫山臺楚山修竹瀟湘水似有清猿忽啼起江南
千里夢遊歸半床落月高堂裡

方隱君山園

吳興城南山水勝竹樹參差萬家映幽深誰似隱君
園車馬不來雞犬靜兩溪迴通柳港曲一峯立對紫
門正東西別墅恰更好孤棹往來隨晚興總令種菜

不種桃新製長鑿木爲栢家童頗解候天時鄰叟還
能論地性交交林路翳復開活活野泉流不定清晨
聞鳥欣獨往濃綠潑晴畦色淨老葉垂根孤蚓號殘
英綴梗羣蜂競乍縈新蔓喜籬長欲逆晚芽嫌土硬
此時採擷自足飽肯爲食肝煩縣令古來名園悉可
數金谷辟疆誇獨盛鑿石圓開弄月池買花深作行
春徑愛妾宵陪秉燭宴狎朋晝接流觴詠長年歡樂
豈知極迴首芳菲屬它姓只今誰解問遺蹤斷臂摧
垣無一剩乃知厚業要德守那得衰榮但言命君能

勤儉遺子孫應有佳名書郡乘

觀顧蕃所藏宋賜進士絲鞭歌

臚傳殿下呼名字進士新充探花使內人縮結綵鞭
成恩與宮袍一時賜不用頻將柳下揮馬蹄得意自
如飛影裊夕陽何處去曲江園裏宴初歸天街直拂
花枝過擇堦樓高彩毬墮令人把玩憶當時零落春
風幾縷絲

憶昨行寄吳中諸故人

憶昨結交豪俠客意氣相傾無促戚十年離亂如不
知日費黃金出遊劇狐裘蒙茸欺北風霹靂應手鳴
彫弓桓王墓下沙草白彷彿地似遼城東馬行雪中
四蹄熱流影欲追飛隼滅歸來笑學曹景宗生擊黃
獐飲其血皋橋泰娘雙翠娥喚來尊前爲我歌白日
欲沒奈愁何迴潭水綠春始波此中夜遊樂更多月
出東山白雲裏照見船中笛聲起驚鷗飛過片片輕
有似梅花落江水天峯最高明日登手接飛鳥攀危
藤龍門路黑不可上松風吹滅岩中燈衆客欲歸我
不能更度前嶺綠峻嶒遠携茗器下相侯喜有白首

楞伽僧館娃離宮已爲寺香逕無人欲愁思醉題高
壁墨如鴉一半欹斜不成字夫差城南天下稀狂遊
累日忘却歸座中爭起勸我酒但道飲此無相違自
從飄零各江海故舊如今幾人在荒烟落日野鳥啼
寂寞青山顏亦改須知年少樂事偏當飲豈得言無
錢我今自算雖未老豪健已覺難如前去日已去不
可止來日方來猶可喜古來達士有名言識說人生
行樂耳

明皇秉燭夜遊圖

華亭樓頭日初墮紫衣催上宮門鎖大家今夕燕西
園高藝銀盤百枝火海棠欲睡不得成紅粧照見殊
分明滿庭紫燄作春霧不知有月空中行新譜霓裳
試初按內使頻呼燒燭換知更宮女報銅籤歌舞休
催夜方半共言醉飲終此宵明日且免羣臣朝識憂
風露漸欲冷妃子衣薄愁成嬌琵琶羯鼓相追續白
日君心歡不足此時何暇化光明去照逃亡小家屋
姑蘇臺上長夜歌江都宮裏飛螢多一般行樂未知
極烽火忽至將如何可憐蜀道歸來客南內淒涼頭

盡白孤燈不照返魂人梧桐夜雨秋蕭瑟

黑河秋雨引賦趙王孫家琵琶蓋其名也

胡天夜裂天垂泣雲壓鷹低翻翅溼髯王醉影抱寒
驚瓊殿嘈嘈箭鳴急紅水淚落衰燈下倒卷河流入
絃瀉瘦駝臥磧歇鈴車朴朔陰沙鬼行野漢魂私語
鬢風淒都護營荒咽凍輦蘭山木葉連愁起散入塞
門至萬里夢斷金蟾隔煙小青冢埋聲秋不曉

期張校理王著作徐記室遊虎阜

前身似是雲水僧餘習愛覓名山登最怜虎阜在平

一丘勢敵千峻嶒缺崖深深翳密葉欹石兀兀纏
危藤昔年無事恣幽賞拄杖叩門來屢曾風廊聽竹
移廣簾雪屋煨芋明高燈禪堂素壁醉題滿老衲喜
客無嗔憎別來三載困塵土散落略盡同遊朋谷猿
清叫烟霧隔宵夢欲往天曹曹幽懷鬱抱不得寫一
月雨聲眠枕肱相親尚有北郭友材盡齊楚慙曹膝
張君名駒稟神駿王子快鶻生鋒稜並淹客館校遺
籍雲路萬里違騫騰徐卿亦是瑚璉器遠役又欲行
擔簦明朝山鵲定明霽跬步可遊何不能一林一澗

幽景在遙想與昔無、虧增朱櫻綠筍雖已過、正愛夏
木陰層層欲營此行况甚易、婦有藏酒魚新罾出城
不必借車馬已辦布韞青行、勝吾儕雖窮自有樂相
聚豈比蟲薶薶亂離撥棄且勿道願賦妙語畱傳謄

廣陵孫孝子愛日堂

昔自中原兵甲動志士愛時久心痛、千村殺戮雞狗
無骨肉誰家保相共揚州受禍聞最深、徒恃堅城鐵
爲甕城中義丁一百萬坐委溝谿不成用、至今草長
彌叢臺月黑精靈尚哀慟、君時負親獨窺匿何異網

魚逢脫縱遠道秋風舊橐空、長江暮雨孤帆重、搗來
吾鄉今十年孝友爭傳比張仲、雖嗟故里未能歸却
喜新堂還可奉盡歡唯啜小人羹、致養寧須大官俸
識愁老景苦駸駸羲馭西馳疾飛鞚、書看花影願遲
移晚聽角聲驚早弄長繩未解繫、飛鳥每計餘年憂
且恐嗟余少已失庭闈宰木亂來無地、重欲娛詞夕
難再得誰惜流光去如夢自慙不及君、慶多灑淚蓼
莪空廢誦寸心猶願時早平、重爲河清作歌頌萬國
同看化日長生能養親死能送

贈胡校書奎

我初遇子東海濱
苧衫蓆帽凌風塵
登城觀濤共艱
息見者不識何如人
歸時憶近看燈節
孤舟夜過黃岡雪
書來書往道加飧
幾日相逢百年別
再會之計何悠哉
我未及去君能來
秋風吹殘太湖水
乘興上得吳王臺
吳王臺前白楊柳
西施去後吳娃醜
四海同爲比地人
百壺獨買誰家酒
更尋豪客作夜遊
簾弄明月琵琶洲
有愁爲君亦蕩滌
何況我輩元無愁
醉中狂談君可恕
且共周旋莫歸去
秋光已筭逼重

陽好爲黃花三日住

溫陵節婦行

泉州陳氏婦夫泛海溺死守志

妾家溫陵近南浦
嫁得良人業爲賈
良人長年愛遠遊
不敢新在映門戶
販寶遙聞去百蠻
朝朝海上望青山
不仁無那蛟龍橫
漂沒孤舟不得還
君非渡河老狂父
波濤如山何不顧
尋屍便欲赴窮淵
膝下嬌兒誰與哺
十載空闈守寸心
滄溟水淺恨情深
願身不化山頭石
化作孤飛精衛禽

答余左司沈別駕元夕會飲城南之作時在園

中

青帝行春氣初播雲沍餘陰苦難破江頭碧草生未
長戰馬寒嘶斃殘莖炊烟冷落雨中溼隣屋時聞有
啼飢我愁鬱鬱但欲眠宵以案書勤自課却思去歲
屬無虞元夕共歡人幾箇高堂細聽落梅歌手擘黃
柑香噴座客酌主勸總忘曉看盡繁燈逐星墮祗今
照市但羣烽樂事淒涼誰復作故人念我有二子省
內郎官府中佐別離兩月不相逢身佩弓刀從戍邏

欲尋舊賞慰勞役弄拂尊前且安坐老兵析間走相
呼笑我閉門無乃懦黃昏遠就向城南敢惜春衫凍
泥澆軍中有會異尋常牛肉麕肥酒卮大胡奴帳下
出琵琶復拊銀箏與相和燭殘未聽荒雞號絃斷忽
驚哀雁過須臾顏熱起叫噓不紀亂離仍轍軻更聲
析析繞旗門劔匣揩頭容醉臥歸來又辱寄新詩錦
水湔腸珠落唾豪吟自欲繼燕歌悲調豈將同楚些
覽之幾度感深情曲高和難非嬾惰我生無方本何
用衣食自來供馬磨雖蒙鄉曲假虛名正似南箕不

堪歎君才於世俱可珍周賈東遊抱奇貨艱危壯氣
喜彌激利器未施寧忍挫頗聞原野多殺傷風雪呻
吟苦無邨吾儕斯樂豈易得應愧皇天恩獨荷明年
此夕會昇平把酒相邀更相賀

江上晚過鄰塲看花因憶南園舊遊

去年看花在城郭今年看花向村落花開依舊自芳
菲客思居然成寂寞亂後城南花已空廢園門鎖鳥
聲中翻憐此地春風在映水穿籬發幾枝年時遊伴
俱何處祇有間蜂隨繞樹欲慰春愁無酒家殘香細

雨空歸去

兵後逢張孝廉醇

前年遠別君父子遭亂相傳皆已死今朝南陌忽逢
君爲識人中語音似君言從親渡海濤欲避兵禍辭
官曹問關僅得返鄉里脫命羅網真秋毫問我胡爲
亦惟悴十月孤城陷圍內艱難兩地得俱全政荷皇
天憐我輩相看握手非偶然痛飲豈得愁無錢城中
故舊散欲盡君來使我忘憂情還思當年事未改車
馬紅塵浩如海等閒列第化秦灰試問主人誰復在

請君看此應感吁世間富貴皆空虛客遊且莫更彈
鋏讀書歸臥先人廬

夜飲丁二侃宅聽琵琶

江月未出明星懸主人飲客夜不眠坐呼伶兒撥四
弦龍頭高撚玉軫圓轉關未奏濩索先勞嘈咽切斷
復連澀如清澗溜凍泉細若碧樹吟秋蟬忽然繁急
何轟闐風沙滿把撒四筵雁行驚起飛不聯浮雲落
葉俱綿綿一聲抹斷萬里烟夢入紫塞愁胡天問渠
怨恨有幾千口不能說指爲傳令人悵望思往年梁

園楚榭長周旋惟中曲宴羅綺鮮夜遣飛騎走婵娟
低鬟出拜絳燭前文絲香綃搭左肩曲項紫鳳抱半
偏楓香一調妙入玄好手正可羞紅蓮座間家客皆
詞仙舉杯邀我賦長篇贈之醉寫蜀錦牋可當十萬
纏頭錢如今遠客江海邊欲聞絲音久無緣故人已
散陵谷遷生死汨落俱堪怜今宵聽此真偶然顧影
憔悴非昔妍長河欲曙落遠川暫當歡娛反憂煎向
隅無言涕淚漣此身如在潯陽船

曉睡

野夫性慵朝不出弊簣蕭然掩閤室村深無客早敲
門睡覺長過半簷日林聲寂寂鳥鳴少窓影交交樹
橫密此時欹枕意方恬一任床風亂書帙昔年霜街
踏官鼓欲與羣兒走爭疾如今只戀布衾溫悟從前
計應多失厨中黍熟呼未起妻子嗔嘲竟誰恤天能
容老此江邊無事長眠吾願畢

東池看芙蓉

江天搖落逢秋杪滿日殘荷與枯蓼東家喜有木芙蓉
幾樹繁開依綠沼體艷低將流水映寒香遠逐迴

風裊半愁霜露倚蒹葭老去徐娘猶窈窕天公似厭
秋冷淡故發芳叢媚清曉莫嗟不及見陽春車馬塵
埃相汗少吳王宮廢斷行客湘女祠空掩啼鳥何如
此地獨來尋靜對婵娟散憂情蘭舟雖無美人採日
暮孤吟自行繞明朝重到恐銷魂零落紅雲波渺渺

謝廬山宋隱君寄惠所製墨

瓦篝白掃烟埃溼風雨空山杵聲急香爐峰前五粒
松燒成片玉玄香濃寄我團團未磨缺有如蝕盡天
邊月陶泓日暖水滿池雲氣忽起秋淋漓茅屋光寒

客心懼上有蛟龍欲飛去便思寫檄驚天驕夜磨楯
鼻冰不銷又思作賦獻 天子曉出洛陽價增紙我
今年少才不多兩事未能如墨何但學顛狂如醉旭
頭髮可濡秋未禿

美人撲蝶圖

花枝揚揚蝶宛宛風多力薄飛難遠美人一見空傷
情舞衣春來綉不成乍過簾前尋不見却入深藜避
鶯燕一雙撲得和落花金粉香痕滿羅扇笑看獨向
園中歸東家西家休亂飛

次韻周誼秀才對月見寄

空林鶴鳴草堂靜桂影亭亭月初正憐君幽臥對中
秋尊酒無人起相命夜深詩成遣寄我自訴窮愁兼
疾病嗟余比君愁更多舊感新憂來每併前年看月
綠茗園賓客當筵一時盛自吹橫笛倚清歌痛飲不
知瓶屢罄去年園中在北郭何異孤豚落深窰登樓
強欲攬清輝刁斗連營不堪聽今年旅寓向江渚暫
喜東南亂初定閒來未厭戶張羅貧去唯愁室懸磬
牧兒耕叟共來往那得衣冠解相敬久居村野坐自

郵銷盡豪懷與狂興風塵無復舊時顏
偶見相逢問名姓朋友凋零江海空
弟兄離隔關山迥良宵佳月雖可賞
羸影窗間竟誰並迢迢河轉漏初長
城鼓乘鳴風稍勁此時倚壁自孤吟
只有蛩聲與相應初疑此月定非月
應是人間照愁鏡還恐人愁月豈知
何苦多愛損情性一生能幾見此月
盛年若去尤難更明宵圓景未便虧
落盡芙蓉江色淨君能強起從我歡
共入空明恣遊泳真如枕簟向舟中
不管遙天垂斗柄

初入京寓天恩所閣對辛夷花懷徐七記室
去年寺裏閣辛夷
生來憶我曾題詩
今年我來君已去
思君還對花開時
尋花下君行迹
日暮空庭古杏碧
殷勤把酒問花枝
看過春風幾行客

答余新鄭

前年吳門初解兵
君別故國當西行
有司臨門暮驅發
道路風雨啼孩嬰
倉黃不敢送出郭
執手暫立懷安驚
我時雖幸脫鋒鏑
亂後生事無堪營
移家江上託地主
閒園借得親鉏耨
耕春朝起沐日照
屋野卉雜

發鳴鷓鷃思君萬里不可見對此涕淚如盆傾有壺
當軒忍自酌有句在卷邀誰評走役北郭門消息一
客爲我言分明君初隨例詣 闕下有 旨謫徙鍾
離城資無囊金從無僕棄家獨去何惇惇長淮粘天
趣前渡牙眼怖客浮鼉鯨到州鞠躬謁太守脫去官
籍儕編眠城荒無屋寓來客旋乞廢地誅蓬荆異鄉
何人恆同患喜有楊子兼徐卿日高破窰烟未起閉
戶不絕哦詩聲去年 聖恩念逐客特賜投拭加朝
纓 救君赴汴聽銓濯路算舊驛猶千惺沙河無雨

夏雲熱茅葦夾岸蚊蠅舟中感癘得下泄刃攪腸
腹聞呶嚶荒途無藥相救療伏枕兩旬幾殞生終藉
神明佑吉七疾勢漸脫身強輕一官署作新鄭簿捧
檄已去詢田更我雖歷歷聽客語虛實未察憂難平
初春 天子下明詔欲纂前史羅儒英非才亦辱使
者召辭謝不得來 南京日斜出局訪君舍草滿陋
巷春泥晴入門小女識父友延拜學訴艱難情且云
父意念家遠新遣兩卒來相迎須臾出君寄我札上
有秀勻如瑰瓊自陳前事頗一一與客舊說無虧盈

讀終呼卒問彼士卒言幾年經戰爭河山蕭條縣雖
小民少奸詐多淳誠春秋古稱節子國漆洧水活魴
魚頰雌兔咻咻草間走雄雉角角桑顛鳴谷深稀逢
種田者時有射戶棲山棚霜大赤棗收幾困剝食可
當江南杭官來撫民務無事鞭挂壁上無敲榜寒廳
吏散獨坐肅遠對嵩少當簷楹聞之離抱頓舒豁如
吸清露醒朝醒便因卒還寄君語此邑小鮮聊試烹
幸逢 昌朝勿自棄願更努力修嘉名吾 皇親手
擡高筭酒掃六合氛塵清海中夷筐已入貢隴外戶
版初來呈大開明堂議禮樂學士濟濟登 瀛大廟
冬烝薦朱瑟千畝春藉垂青紘用材不肯略疎賤銖
寸盡上天官衡况君磊落抱奇器不異一鸚秋空橫
豈容久屈簿領下天道始塞終當亨文章期君歸黼
黻借問報政何時成

玄武門觀虎圈

目光燿燿臥深圈羽林獵士初擒獻腥風一嘯猶辟
人况在空山道中見莫憶橫行藜藿間且隨玄豹守
天關垂頭食肉嗟何補漢家將軍乃真虎

送許先生歸越

天子下詔徵賢良多士競逐風雲翔先生亦隨使者起
闕下再拜陳封章自稱前朝老進士白髮已短
村非長羣龍在廷翊昌運疲蹇豈足迫騰驥乞還山
林養餘齒歌頌 聖德傳無疆近臣上 殿爲陳情
天語特許歸其鄉是時海國風雨涼道士莊下初
栽秧故山農事不可緩歸興倏與高帆揚從容進退
遂所願 帝恩甚大誰能量嗟余相逢恨若晚忽去
未免私心傷明朝相憶望於越江水東逝何洋洋

送證上人住持道場

訢公昔年住寶坊龍象蹴踏騰毫芒袈裟曾侍玉座
傍萬衆闐聽講仁王弟子如雲來四方朝鐘暮鼓鳴
高堂西歸蔥嶺今幾霜鉢傳曇師道彌昌叢林主教
遇 聖皇紫衣朝 闕隨班行上人繼吐三葉芳朮
中長繫摩尼蒼人間萬念俱已忘獨好遊戲談文章
我來京師寄禪房每邀看月開修廊手橫繩拂坐繩
床竹間風吹煮茗香侍僮觸屏睡欲僵高殿宿鳥驚
琅璫詩成金磬韻尚揚清才未必慙支湯有時夜煎

園韭嘗燈懸西齋雨浪浪人生聚散不可常翩然東
遊主道場道場乃在雲水鄉碧瀾堂前去路長江湖
寒縮蛟唇藏楓柏正赤橙柑黃烟銷日出聞漁榔洲
渚宛轉山低昂蕭然瓶錫隨經囊畱宿肯戀林中桑
兵餘莫嗟梵宇荒勝景未遂樓臺亡寺門無人閉夕
陽芋栗收作山中粮好說千偈恢禪綱麾斥佛祖誰
敢當我方無用糜太倉叨逐劔珮趨 明光醉譎欲
覓玄真狂懷 恩未得尋歸航明朝舉首空相望雲
飛笠澤天茫茫

送王孝廉由京省其父待制後歸金華

君來金陵自金華遠道犖驅行車空山北風正多
雪歲晚何事穿泥沙君言省覲敢辭苦况是日下非
天涯問安已畢起稱壽白門酒香還可賒明燈客窗
共夜語便覺春意廻寒槎余亦切 恩在京國早踏
青鼓聞初撾日斜歸來就空屨索寞不異投林鴉家
人千里望未至虛聽簷鵲鳴查查羨君父子此相見
喚起歡笑忘咨嗟異鄉逢人即可樂况爾骨肉誰能
加汝翁文章擅當世片語落紙爭傳誇身登 昌朝

列侍從日曳珮玉趨南衙捧函當 殿曉進史秉燭
鎖院宵書麻觀君才氣已略似青海異種多騶駟絲
編便可令世掌胡爲趣別東還家阿婆在堂待調膳
計日敢使歸期差往來兩地慰親念如君孝意誠堪
嘉勞勞亭下冬日短江水未解魚難又送君挥手忽
已遠烏巾獵獵風中斜重闌歸拜想無恙故園正見
開梅花

穆陵行

永穆陵宋理宗陵也在會稽元至元初西僧

楊發輦眞住請發宋請陵許之既取其殉寶
復以理宗頂骨爲飲器後藉入官以賜帝師
天兵克元 詔求得之命有司歸葬焉

樓船載國沉海水金槌畫入吾泉裏空中玉馬不聞
嘶日落寢園秋色起魚燈夜滅隨戶開弓劔已出空
幽臺髡胡暗識寶氣盡六陵松柏悲風來 玉顱深
注駝酥酒誤比戎正月支首百年帝魄泣穹廬醉骨
飲冤愁不朽幸逢中國 眞龍飛一函雨露江南歸

環珮重遊故山月冬青樹死遺民非

世傳有土嘗竊諸帝骨埋屏處

樹冬青
為識
千秋誰解鋼南山世運興亡覆掌間起輦谷

前馬蹄散白草無人澆麥飯



介鳴集卷之八

古吳 高啓季迪 著

同里 拂雲居士 校

七言古體 詩一十三首

天閑青驄赤驃二飲馬

漢家諸將開經濟列宿儲精降人世天遣同成一代
功亦有房星化騏驎青驄剪髮高作花赤驃洒汗微
成霞人間何處得奇種恍惚西至踰流沙年來百戰
從 天子曾逐烏騅到江死不慙飽食玉山禾 天

廢時清少鞭使周王八駿去不來唐帝六馬應凡材
何如二龍總超絕蹴踏四海荆榛開園官雙鞵頻廻
顏萬里長楸恐驚鶩嘶處秋生閭闔風浴時曉動昆
明霧一匹前牽一匹騎馳道每出隨 龍旗態間步
穩識上意不敢搖頓黃金羈昨看 巡狩還都邑鏡
吹聲催移仗急羽林萬騎從如雲追逐飛塵豈能及
嗟哉此馬不異人乘時際遇蓋有神請看垂耳鹽車
者那 昂藏八尺身

同謝國史遊鐘山逢鐵冠先生

日日城中望鍾山孤塔縹緲峰孱顏山靈嘲我不一
到但命俗駕趨塵闕 聖恩今朝許休沐得與謝客
同躋攀出郭未至景已好松風一派連清灣空林無
人遇釋子知有曲徑通禪關舉頭見寺去尚遠鐘磬
響落浮雲間登高不知已幾里但怪力盡愁辛艱衆
山雜沓總在下如擁劔珮趨朝班時當嚴冬雪始霽
古木寒瘦泉流慳梁僧遺墓臥殘碣宋帝廢塚埋深
菅六朝陳蹟不可間但見石老莓苔頑豪華歇盡形
勝在劫火幾度燒空殷鐵冠先生有道者徃徃人見

騎黃斑相迎爲指幽絕處淪茗畱坐聽潺湲莫言痴
客暮未返日墮江水鴉飛還欲營一遊豈易得長來
不比山僧閒

喜家人至京

家人遠來如我歸骨肉已是鄉園非妻羸女病想行
苦塵土覆面風吹衣裝車日暮解牛輓呼燭買酒敲
隣扉客懷乍見不得語一室相對情依依憶昨初蒙
使者徵遠別田舍來京畿小臣微賤等蟣蝨 召對
上 殿瞻 天威詔從太史校金匱每旦珥筆趨彤

閣春遊禁苑侍 鶴駕冬祀泰時隨 龍旂有時青
坊坐陪講官壺滿賜霑 恩輝草茅被寵已踰分不
才寧免誦貞譏海鳥那知享鍾鼓野馬終俱遭籠鞿
江湖浩蕩故山遠歸夢每逐鴻南飛常時出院就空
館僮僕愁對語者稀知君在舍亦岑寂歲莫雨雪吟
蚺臠今宵得見信可樂如獲美饌飽我飢但憂兄姊
尚遠隔言笑未了仍歔歔何當乞還棄手版重理吳
榜尋漁磯門前親種一頃稻婢供井臼妻鳴機秋來
租稅送縣畢村酒可醉雞豚肥誰言此願未易遂

聖澤甚沛寧終違

客舍雨中聽江卿吹簫

客中久不聞絲竹此夕逢君吹紫玉斷猿哀雁總驚
啼我亦無端淚相續數聲嫋嫋復嗚嗚散入寒雲細
欲無愁望洞庭空落木夢遊秦苑總荒蕪曲中只訴
君心若不道人聽更悽楚關山燈下歎羈臣江浦舟
中泣嫠婦憶昨聞門費酒貲玉人邀坐弄參差彩霞
深院花闌處明月高樓雀去時如今忽在他鄉外風
雨寒窗兩憔悴浪無百斛金陵春同上鳳皇臺上醉

始知空谷枯篁枝中有人間無限悲願君袖歸挂高
壁身更用逢容易吹

北山觀稼

黑衣公子何嫋娜飛挂枯枿不愁墮幾迴呼下白雲
閒拋 賜曾嘗內園果家鄉何處是巴西回首烟蘿
望欲迷料得孤舟江上客月鳴少聽一聲啼

謝友人惠兜羅被歌

蠻工細擘冰蠶蠶織得長衾謝縫剪蒙茸柳絮不愁
吹鋪壓高床夜香軟朔風入關凋白榆塞寒此物時

當須明燈熾炭夕宴罷薦寢宜共紅氍毹海客揚帆
遊萬里得自崑崙國中市歸未遺我見遠情重似鴛
鴦合攏綺詩人鶴骨欺霜稜曾直 禁署眠青綾自
從身退得閑臥只愛擁紙同山僧今朝得此何奇絕
屢覆不憂兒踏裂便思清夢伴梅花靜掩寒窗聽風
雲越羅蜀錦安可常洞房美女謾薰香誰知一幅春
雲煖卽是溫柔堪老鄉

題美人對鏡圖

曉院鹿盧鳴露井玉人夢斷梨雲冷起開粧閣笑窺

奩月裏分明見蛾影自對猶憐况主家春風一面惱
腸花何由鑄入青銅內不遣秋霜換娥翠

會宿成均汲玉兔泉煮茗諸君聯句不就因戲

呈宋學士

白兔如嫌桂宮冷走入杏花壇下井姮娥無伴每相
尋水底亭亭落孤影曾搗秋風玉白霜至今泉味帶
天香玉堂仙翁欲飲客鹿盧夜半響空廊齋燈明滅
茶烟裏醉魂忽醒松風起識愁詩就失彌明殘雪滿
庭寒似水

送曹生歸新安山中

黃山西來九華連，岩洞翕忽通雲烟。
白鶯嶺下煉丹處，瑤草獨秀今千年。
三十六峯在青天，仰面歷數舉馬鞭。
高林雜樹多未識，風雨一過俱蔥芊。
山深何物尤可憐，秋禽幽鳴巧如絃。
路廻澗阻似無地，中有蒔藥千家田。
雲間雞犬隔流水，居人彷彿皆神仙。
我欲窮遊久無緣，羨君忽去尋歸船。
猿聲兩岸溪幾曲，白沙明月相泐泐。
到時西峯草堂前，應有携酒來華顛。
山人不喜說朝市，但話久別情依然。
塵埃舊褐便可

晚濯費十斛，山中泉爲余淨掃。
石上葉早晚有意來高眠。

曉出城東門聞櫓聲

城門朝開路臨水，人語烟中近魚市。
誰搖飛檣入蒼茫，帶夢驚見柳邊起。
過處寒波動拍沙，遠聞嘔軋復啞啞。
征夫車轉山頭阪，工女機鳴竹外家。
我身本是江湖客，偶墮黃塵曉行役。
此聲空憶舊曾聽，舟中酒醒東方白。

詠苑中秦吉了

不獨能言異凡鳥最愛佳名呼吉了雕籠幾度學雞
鳴驚起烟花六宮曉 駕來別院未知迎先聽遙呼
萬歲聲願把春風一杯酒從今莫聽上林鶯

夏珪風雪歸莊圖

江雲粘波晚模糊青山忽失如亡逋乾坤瑩淨冰作
壺春意散入千林枯野橋古渡行人無清響瑟索鳴
殘蘆江天萬里一老夫短簑如蟻舟如鳧魚寒入泥
不上窰歸來遠識漁村孤柴門夜叩聞大呼逕竹壓
折誰相扶山妻自炊稚子沽不羨炙肉圍紅爐嗟余

客遊歲屨徂詩囊隨驢走髯奴長安何處覓酒徒飛
花撲頭帽不烏旅舍無夢還江湖慙對風雪歸莊圖
始歸江上夜聞英生歌因憶前歲別時

前年月夜聞君唱秋蒲蘆花此江上一聲離思水茫
然雲逐孤帆共搖颺驚魚噴浪栖鶻飛木葉散落風
吹衣蓮歌盡歇松陵浦漁笛還沉笠澤磯停杯數到
臨終拍露下無聲斜漢白滿船相送盡悽然况我當
爲遠行客解綬今年別 紫宸歸舟江上又逢君一
尊重聽當年曲相對渾疑夢裏聞東方欲曙餘聲絕

悲喜盈襟竟誰說願長把酒聽君歌從此天涯少離別

長短句體 詩一十八首

登陽山絕頂

我登此山顛不知此山高但覺羣山總在下坐撫其
頂同兒曹又見太湖動我前洶湧三十萬頃烟波濤
長風吹人度層嶂不用仙翁赤城杖峴秋礙海鶴
飛日出夜聽天雞唱中有一泉長不枯乃是蜿蜒神
物之所鄩老藤陰森洞府黑樹上不敢畱栖鳥常年

禱雨車來此投金符靈旗風轉白日晦馬羣一滴雲
三吳岩巒蒼蒼境多異樵子尋常不曾至探幽歷險
未得歸忽聽鐘來澗西寺此時望青冥腕畧塵世情
白雲冉冉足下起如欲載我昇天行古來名賢總何
有只有此山長不朽欲呼明月游上來照把長生一
瓢酒浮丘醉枕肱洪崖笑開口秋風吹落浩歌聲地
上行人盡回首

張節婦詞

靈壽張明府嫡母早寡守志

誰言妾有夫中路棄妾身先殂誰言妾無子側室生
兒與夫似兒讀書妾辟纊空房夜夜聞啼鳥兒能成
名妾不嫁良人瞑日黃泉下

與客飲西園花下

一壺酒正滿一樹花仍新傾壺對花樹日暮西園春
不愛枝上花愛此花下人相逢莫學花無賴明日分
飛隨路塵

吳中逢王才隨朝京使赴燕南歸

江南草長蝴蝶飛白馬新自燕山歸燕山歸不堪說

易水寒薊門雪朝邸空隨使者車禁闕不受書生

謁一杯勸君歌莫哀歸時應過黃金臺不見荒基秋
來土花紫伯圖已歇昭王死千載無人延國士

戎王追竦圖

前騎脫兔奔後騎驚鴻急火燒秋草獵場空一竦窮
追執難及大小當戶左右賢單于勇銳闕支妍雕戈
白羽謾爭發衆中得雋知誰先君不見天榮將真天
子馳一馬殪四豕

茅山陳道士臥雲所

不逐雲渡海寧隨雲出山但

網緇枕席潤晡靄房櫳閒聽松閣

雲應睡起

贈醉樵

川釣已遭獵野畊終改圖不如山中樵醉臥誰得呼
采山不采松松花可爲酒酒熟誰共斟木客爲我友
木客已去空石床舉杯向月邀吳剛借汝快斧斫大
桂要令四海增清光林風吹髮寒擁耳獨枕空尊碧
岩裏此時忘却負薪歸猛虎一聲驚不起世間萬事
如浮烟看棊何必逢神仙青松化石鶴未返酒醒又
是三千年

雷雨護嬰圖

兒衣寒母衣溼風雨蒼黃歸意急雷忽鳴兒忽驚抱
兒與兒同死生樹聲吹迴水聲注田家尚遙無避處
看圖誰念亂離人白日青天棄兒去

青丘子歌

江上有青丘余徙家其南因自號青丘子閒
居無事終日苦吟間作青丘子歌言其意以

解詩淫之嘲

青丘子臞而清本是五雲閣下之仙卿何年降謫在
世間向人不道姓與名躡屩厭遠遊荷鉏嬾躬耕有
劔任羞澀有書任縱橫不肯折腰爲五斗米不肯掉
舌下七十城但好覓詩句自吟自酌賡田間曳杖復
帶索傍人不識笑且輕謂是魯迂儒楚狂生青丘子
聞之不介意吟聲出吻不絕呶呶鳴朝吟忘其飢暮
吟散不平當其苦吟時兀兀如被醒頭髮不暇插家
事不及營兒啼不知怜客至不果迎不憂回也空不

慕猗氏盈不慙被寬褐不羨垂華纓不問龍虎苦戰
鬪不管烏兔忙奔傾向水際獨坐林中獨行斲元氣
搜元精造化萬物難隱情冥茫八極遊心兵坐令無
象作有聲微如破懸蝨壯若屠長鯨清同吸沆瀣險
比排崢嶸靄靄晴雲披軋軋凍草萌高拔天根深月
窟犀照牛渚萬怪呈妙意俄同鬼神會佳景每與江
山爭星虹助光氣烟露滋華英聽音諧韶樂咀味得
大羹世間無物爲我娛自出金石相轟鏗江邊茅屋
風雨晴閉門睡足詩初成叩壺自高歌不顧俗耳驚

欲呼君山老父攜諸仙所弄之長笛和我此歌吹月
明但愁歛忽波浪起鳥獸駭叫山搖崩天帝聞之怒
下遣白鶴迎不容在世作狡獪復結飛珮還瑤京

醉贈宋卿

勸君歸來休莫作澹蕩遊黃雲已蔽燕國晚白露正
滿梁園秋千石酒萬戶侯請君論此誰當優吳門日
出花滿樓小婦喚客不解羞君畱綠綺琴我脫紫綺
裘今朝春好能飲否東風吹散江南愁

潘隱君月樓歌

樓高高月皓皓容月多得月早初看西墮江夕見東
生島我歌鳥飛向穹昊樓中之人須醉倒人長閒月
長好月中藥成人不老

約諸君看范園杏花不果後偶獨遊而杏已盡
落惟桃數樹感聞感而有賦因寄諸君

久欲與君往那期成獨來參差二月暮過却杏花開
杏花雖好今無在識有桃花笑相待杏白桃紅何淺
深春還不負看花心看花心君更劇莫爲不來空歎
息世間萬事盡如花着意相尋應不得

番人移帳圖

懸爾壺韜我弓拔帳何徙榆林東顧語勿驅日暮中
野兒未十歲不能騎馬

夜聞謝太史誦李杜詩

前歌蜀道難後歌偃仄行商聲激烈出破屋林鳥夜
起鄰人驚我愁寂寞正欲眠聽此起坐心茫然高歌
隔舍與相和雙淚迸落青燈前李供奉杜拾遺當時
鳳落俱堪悲嚴公欲殺力士怒白首江海長憂飢二
子高才且如此君今與我將何爲

贈金華隱者

我聞名山洞府三十六一一靈踪紀真籙金華秀出
向東南遠勝陽明與勾曲樓臺縹緲開煙霞天帝賜
與神仙家靈源有路不可入但見幾片流出雲中花
子房之師赤松子三千年前亦居此飛行恍惚誰解
尋漫說至今猶不死松花酒熟何處遊瑤草自綠春
岩幽羣羊臥地散如石老鹿耕田馴似牛聞有隱君
子乃是學仙者自從入山中不曾到山下世人莫知
其姓名以山呼之不敢輕樵夫忽見苦未識只疑便

是黃初平嗟我胡爲在塵網遠望高峯若天壤茯苓
夜煮倘許殮鐵杖來敲石門響

登金陵雨花臺望大江

大江來從萬山中山勢盡與江流東鍾山如龍獨西
上欲破巨浪來長風江山相雄不相讓形勝爭誇天
下壯秦皇空此瘞黃金佳氣蔥蔥至今王我懷鬱塞
何由開酒酣走上城南臺坐覺蒼茫萬古意遠自荒
烟落日之中來石頭城下濤聲怒武騎千羣誰敢渡
黃旗入洛竟何祥鐵鎖橫江未爲固前三國後六朝
草生宮闕何蕭蕭英雄來時務割據幾度戰血流寒
潮我生幸逢 聖人起南國禍亂初平事休息從今
四海永爲家不用長江限南北

春日客園無花偶感

荒園多青草而無一樹花東風吹春來只向何人家
南池舊日花滿烟美人夜彈蜀國絃亂板迷琅婦不
得醉帶月露花陰眠無花雖足歎無酒更可悲如今
但得一壺滿何用紛紛紅紫爲

白下送錢判官岳

白門有垂楊復有春酒香此地逢君誰乃是錢少陽
相逢既沽白門酒相送還攀白門柳下向公車更上
書却趨官署初垂綬日落淮水頭送君去悠悠梁王
苑裏花飛盡明日相思過汴州

五言近體

詩四十一首

詠夏水

寒妝凝凍井晚薦納涼宮抱潔存天質銷炎奪化工
氣蒸金盃潤色映玉盤空弱藻含猶在緘塵隔未通
非山寧可倚是水復常融照夜何須月驚秋詎待風

製屏應不穩作珮定難攻容貌清誰並仙肌瑩自同
宜涵筠簟素愁逼桂爐紅願解行人時分貽道路中

題黃鶴山人書

何處畫相同湖南與峽東江寒落日外山出杪秋中
綠桂騷人宅青蓮釋子宮鐘鳴樵谷暗船散市橋空
風樹驚猿落烟蕪去鳥通平生遊楚興對此轉無窮

賦得履送衍上人

穩稱遊方脚新編楚岸蒲滑欺峯頂石危怯世間途
輕曳愁妨蟻高飛咲化鳧上堂聲每衆度嶺影還孤

著處朝行道拋時夜結跌空山欲相訪落葉去踪無

閨蛙

何處多啼蛤荒園暑潦天股跳泥活活形蔽草芊芊
野遠呼相應窪深樂自專斜陽漁罩外細雨客燈前
莫問官私地聊占水早年時思蒲葉渚涼憶稻花田
高士聽空愛迂人食未便酒灰誰解去安我夜窗眠

效唐人贈邊將

翩翩越騎將負勇出山西射虜誇猿臂封侯賭馬啼
候烽河外暗伏幟草中低欲雪憑陵耻須禽左谷蠡

送董湖州

五馬貴專城花兼赤綬明政條民乍譏賦籍吏初呈
山籠輪茶至溪船摘芡行非將茗雪水誰比使君清

晚次西陵館

匹馬倦嘶風蕭蕭逐轉逢地經兵亂後歲盡客愁中
晚渡迴潮急寒山舊驛空可憐今夜月相照宿江東

送顧別駕之邊郡

故人雖盡別相去獨君賒淥路雲千埃臨邊樹一家
渡江舩載馬到館燭驚鴉莫歎孤城廢春來尚有花

送僧恬歸靈

遊方應未久柳色變新年在路逢春雪還山訪冷泉
鐘催投寺錫燈照泊江船法意休多問無言卽是禪

江上寄王校書行

寥落舊歡違江邊獨掩扉鄰家聞暮笛客舍試春衣
宿鳥歸山亂行人渡水稀相思比花絮斜日繞城飛

送越將罷鎮

楚客解吳鴻臨邊最有功讀書圍壁裏賭酒射堂中
旆出莎城雨笳吹柳浦風越人相感意應與暮潮東

送王積赴大都

至正庚子作

王郎歌莫哀且酌姑蘇臺獨客自傷別諸侯誰愛才
關河千里去宮闕五門開未宥輕齊虜新從下上來

送孫主簿之德清孫善棊

山水匝秋城君行思已清道逢迎吏拜田雜戍人畊
地遠知邊信家貧稱縣名應携一棊去相和長官鳴

畱別李侯

梅發津亭北春隨使節迴線多遊子服酒滿故人杯
鍾送橫江雨車盤出峽雷平生感知已臨別更徘徊

寄熹公

禪居紫閣陰欲去問安心野岸隨流曲山門隱樹深
千燈燃雨塔一磬出風林想見跏趺處雲多不可尋

送王才歸錢塘

南歸猶落魄北上已蹉跎草草官亭酒勞勞客路歌
親知今日少山水故鄉多七首空畱在耐恩竟若何

送長洲周丞陞吳縣令

青山隔苑橋改邑去非遙官食新添俸民傳舊布條
稻花迎午放荷葉待秋凋寂寞長洲路空聞五袴謠

冬至夜喜逢徐七

君來同客館把酒夜相看動是經年別能辭盡夕歡
雪明窗促曙陽復座銷寒世路今如此懸知後會難

送中丞之海門史淮東

黃茅連霧雨此地久荒涼日出嶠夷邇江通渤海長
改官非謫宦到邑是還鄉海上遙聞說婦人已裹糧

夜訪芭蟾二釋子因宿西澗聽琴

深夜獨幽尋岩扉落葉深許攜陶令酒來聽穎師琴
人醉月沉閣鳥啼風滿林應畱西澗水千載寫餘音

錢塘送馬使君之吳中

樟亭離席散遙發畫幡車飛雉新阡麥啼鶯故苑花
望山登郡閣行水到田家莫道疑香句前人獨可誇
與劉將軍杜文學晚登西城

木落悲南國城高見北辰飄零猶有客經濟豈無人
鳥過風生翼龍歸而在鱗相期俱努力天地正烽塵

和周山人見寄寒夜客懷之作

亂世難爲客流年易作翁百憂尋歲暮孤夢怯山空
門掩雲峯裏燈明雪竹中無因乘夜訪相慰一尊同

哭臨川公

身用已時危衰殘况病欺竟成黃犬歎莫遂白鷗期
東閣圖書散西園草露乘無因奠江上應負十年知
過胡博士郊居胡善筮

頭白蘭陵客幽居共一村老來吟力退貧去告身存
夕吹鳴梨葉秋泉注稻根時因來問筮獨叩樹問門
草堂夜集

山家具雞黍夜與故人期暫喜逢歡會都忘在亂離
火寒移坐密燭盡得詩遲莫聽高城角明朝別又悲

送茅侯

欲知難別意孤棹去還停候吏分遙邇離人雜醉醒
城臨秋水渡樹帶夕陽亭後夜看吟燭憐君宿郡聽

孤雁

衡陽初失伴歸路遠飛單度隴將書怯排空作陣難
呼羣雨外急弔影月中殘不共鳧鷖宿兼設夕夕寒

曉步園地

髮隨秋葉落心共曉雲舒稍改新題在注意注筆書
林爭移樹鳥池響食萍魚無限悠然意涼注獨步餘

次韻過建平縣

縣雖三戶小地僻罷兵防茶市逢山客楓祠祭石郎
雲埋鳴澗斧沙膠度溪航應愛青山好經過駐旅裝

送姚架閣

芳晨悵別筵新柳驛亭前客散春城酒人登暮雨船
江樓先見日郡界遠臨邊到後安民俗應知從事賢

送胡鉉遊會稽

山水獨行遍茗溪仍劍溪衣逢新火減舟度雜花迷
黃絹尋碑讀紅裙賭墅携清遊不能共腸斷聽猿啼

月夜遊太湖

欲尋林屋隱還過洞庭遊
遠水初涵夜長天盡作秋
湖如青草濶月似白蓮浮
萬壑風傳笛三更斗挂舟
葉應隨鳥散山欲趁波流
浩蕩吾何適鴟夷不可求

送陳則

挾策去誰覲候門不禮賓
愁邊長夜雨夢裏少年春
樹引離鄉路花驕失意人
一杯歌短調相送欲沾巾
暮春送陳郎中出守醉李

出幙方爲郡行車動画輪
圖書歸省吏風俗問州人

塘水龍鱗細城槐兔日新
莫言花已盡君到自陽春

送楊從事從軍

南風黥燕麥送子悵如何
迢遞戎車役淒涼橫笛歌
天籠平野迴山繞古關多
莫笑書生怯能當曳落河

送王員外遷崇教

崇教典官

能書青公子清宦稱高情
海樹潮帆遠江風夏服輕
官從三省去僧出萬山迎
誰說簪纓累名林得按行
吳中送顧生歸滄陵

涼風初變柳歸典片帆孤
家向三秋到田經幾歲蕪

舊音猶帶楚新夢未離吳明日江南北相思有雁無

園中

席暖林中憩衣涼水上歸腐瓜蟲食徧空樹鶴巢稀
邂逅幽尋得參差薄願違喜無來往者秋草沒園扉

城西客舍送周著作

客中寒食後惆悵送君蓮花隱歸城旆風吹渡水衣
夜窗炊黍散春苑鬪茶誇誰念西齋雨相思獨掩扉
兵後出郭

俯仰興亡異青山落照中民歸憐樹在兵去壘烟空

城角猶悲奏江帆始遠通昔年荆棘露又滿闔閭宮

缶鳴集卷之九

古吳 高啓季迪 著
同里 拂雲居士 校

五言近體

詩一百一十首

聖壽節早朝

天啓 聖圖昌流虹叶夢祥飛龍起江左戰馬放山
陽御柳乘閭闔仙桃熟建章遠人陳貢篚近侍浥爐
香金鏡千秋錄瑤池萬歲觴小臣歌拜手 堯日正
舒長

洪武二年十月甘露降後庭柏樹 上出示侍
從臣啓獲預觀嘉瑞因賦詩頌之

和氣融爲液中宵墜碧天光溥高柏上瑞發內庭前
見日朝還滋經風晚盡堅芳穠蜂蜜滑的皪蚌珠圓
厚澤歌難喻沉疴飲易痊願言同 聖德濡沃遍周
垸

冬至直駕南郊

駕動百靈訶齋宮午夜過禮行因日至樂奏合雲和
配 祖崇周典祈年陋漢歌瑩陳孤月滿燒發衆星

羅秩秩威儀盛穰穰福祉多慶成應預喜四海沐恩
波

禁中雪

君王元尚儉臺殿忽瓊瑤環素凝宮沼飛花綴苑條
坊雞驚曙早仗馬喜寒驕金扇開時看丹墀掃後朝
台司呈賀表樂部奉仙謠須信陽光近都先別處銷
封建

親王賜百官宴

漢運初興日周藩並建年辨方分社土當陞列宮縣

上相傳金冊中官闕綺筵誓期山作礪 恩瀉酒如
川仙季千枝茂天潢幾派連百僚咸醉喜拜舞赤墀
送安南使者杜舜卿還國應制

安南初入貢朝廷遣翰林學士張呂寧齎詔
冊其主爲王及境而薨其世子遣舜卿來告
哀且請命及還 命朝臣賦詩送之

南粵知文化來庭喜最先地書通漢日貢紀入周年
號冊纔臨境容衣忽掩泉使蒙 天語唁嗣許國
傳曉 闕晴飛鳳炎溪晚墮鸞往來時物異存歿

聖恩全 詔去盟蠻霧帆歸望海天但修忠順節世
業自綿延

送高麗賀正旦使張子溫還國

丹鳳雲中闕玄菟海外城新陽初獻歲還使盡朝京
卉服充 玉貢珠旒仰 聖明花飛舜上國日出指
歸程車餞都亭曉帆開島嶼晴莫辭頻入賀寶曆萬
年盈

送鮑修撰出官關中

辭朝西入陝車發動征塵小麥行時熟啼鶯別處頻

關前周故尹灞上漢遺民直院青綾舊臨川赤組新
山連樂遊苑樹繞富平津君去方少少還能論過秦
送恩公還江心寺

上人居寶地勝處似金山樓閣開天界波濤隔世寰
鐘聞孤嶼外剎出亂雲間螺女晨修饌龍君夜叩關
遊方來暫會辭闕去難扳舊業菱生沼離程柳映
灣衣霑爐氣出船載磬聲還施貝來江估持經化島
蠻諸緣除未早半仍悟猶艱安得如康樂登臨此共
閒

喜揚榮陽赴召至京過宿寓館

忽作天涯會渾銷歲暮哀高城三鼓動虛館一尊開
隣馬嘶空廡江鴻過廢臺飲餘寒色退談絕而聲來
涉患功名倦忘歸故舊猜闕前新應召須讓子
雲才

早春侍皇太子遊東苑池上呈青坊諸公

銅鞮出紆徐春宮晝講餘戟煩郎將衛簡授大夫書
草長園鳴鹿水開沼躍魚從遊伴商皓忝竊愧何如

謝賜衣

臚呼遙捧賜服拜望蓬萊香帶烟烟下光迎扇月開
奇紋天女織新樣內工裁被澤徒深厚慙無奪錦
才

西清對雨

楚臺雲起遠漢苑雨來微曉溼宮城旆寒霑陛楯衣
溝中隨葉墮爐畔帶烟飛坐詠西清暇君王召對
稀

夜宿太廟齋宮

鳥散廟堦空清香肅闕宮太常齋禁密列祀享儀

崇井叩銅瓶月墀鳴玉珮風聽鐘候車駕庭燎
燿燿

送秦主客遷侍儀使

蕃客來曾識衣冠上國風承恩趨北闕罷直出南
宮導駕爐烟裏催班漏點中時清多奏頌還向閣
門通

春日退直呈禁署諸公

待詔直東華歸休每日斜職連詞客苑俸入酒胡
家簷網長縈絮庭磚欲過花知君未出院應草侍中

麻

送張司勳赴寶慶同知

乍出司勳幙還乘別駕車按圖猶漢地輸布盡蠻家
山熱蛇懸樹江晴鶴浴沙郡樓回首處北斗近京華

寓天界寺

雨過帝城頭香凝佛界幽果園春乳雀花殿午鳴
鳩萬履隨鐘集千燈入鏡流禪居容旅跡不覺久淹
留

送前進士夏尚之歸宜春

淒涼庾開府老去復如何故國歸鴻少新朝振鷺
多蒯荒應自歎麥秀竟誰歌相送堪愁思蕭蕭楚水
波

早出鍾山門未開立候久之

開吏收魚鑰趨朝阻向晨忘鳴雞睡熟倦立馬嘶頻
析靜霜飛堞鐘來月墮津可憐同候者多是未開人
雪夜宿翰林院呈危宋二院長

偶伴王摩詰寒宵宿禁林院鈴風外靜宮漏雪中沉
絳蠟銷吟燭青綾擁賜衾明朝陪賀瑞銀闕曉光深

白天界寺移寓鍾山里

移寓鍾山里開軒見翠微寺僧違乍遠隣父識猶稀
愛讀明開牖防偷固設扉誰言新舍好畢竟未如歸
夜逢故郡賀冬至使胡普二博士同宿

會宿本無期忻逢兩舊知問年驚別久候曉畏朝遲
寒澀高城漏陽迴上苑枝明朝使事畢歸騎又天涯
至夕夜坐客館

久客漸忘家今宵忽感嗟旅踪猶泊使陽氣又吹葭
巷屋門封雪鄉關路遠沙閨中想逢節也解憶京華

送鮑翰林遷官陝右

鑿坡初罷直西去惜離羣載筆唐供奉褰帷漢史君
濁流河驛雨高樹岳祠雲公暇應懷古登臨賦夕曛
送曾主簿之平樂

路出桂江東鄉音想未通蛇飛山苦霧鴈運海多風
木魅長欺客花蠻少學農縣廳何處在椰葉晚陰中
桓簡公廟

荒林慘淡中石馬欲嘶風功在山畱碣威存廟挂弓
飢鴉迎祭客走鼠駭巫童千載宣城道人憐內史忠

送前國子王助教歸臨川

去國獨依依，羈臣淚滿衣。
夢中燕月遠，望裏楚山微。
世變人驚老，身全詔許歸。
舟前楓葉落，應到故園扉。

送潘巡檢之閩中

京師到閩海，秋色幾程餘。
莎柵山兵守，榕林島戶居。
曉衙雞應鼓，晚邏騎隨車。
清世元無盜，將軍好讀書。

送思上人

名林雖盡廢，南去只隨緣。
野飯晨畱鉢，城鐘夜到船。

虎馴應畏法，鳥喚不驚禪。
它日期相見，高峯舊塔前。

宴王將軍第

流水通侯第，行雲傍妓臺。
雨催牙仗散，風引雨觴來。
曲學移聲按，詩隨得韻裁。
莫令遊宴歇，次第過花開。

送朱從事之吳興

釋褐方從宦，青山故郡隣。
草深湖帶雨，花暗驛藏春。
鼓聚祈蠶女，舟逢射鴨人。
幙中應待久，從此惜離辰。

和友人過采石

山暝斷磯頭，猿聲雨岸愁。
柳間娼女酒，月下估人舟。

白鳥集 卷九
擒虎嗟橫渡騎鯨憶醉遊停撓正懷古風急葦花秋

詭柳

何恨苦長鞦纖姿嫵媚春慣愁行路客羞比舞筵人
亂葉斜斜雨狂花袞袞塵殘蟬來噪日應落漢潭濱

無題

顧影出中堂長眉學內粧本爲戚里婦不是狹斜娼
扇撲園中蝶箏彈陌上桑相逢不敢笑只恐斷君腸

京師寓解三首

誰言舊隱非靜里且相依綠樹城通苑青山寺對扉

官閒休直早客久夢還稀是物春來典唯存舊 賜
衣

幾夜頻聽雨經春不見花靡蕪青渚燕楊柳白門鴉
拙宦危機遠工吟癖性加閒坊車馬少不似住 京
華

寂寞過芳時幽懷只自知袖無投相刺篋有寄僧詩
鼠跡塵凝帳蛙聲雨到池疎慵堪置散不敢怨名卑
送舒徵士考禮畢歸四明

寄語關門吏休輕尚布衣叔孫聊應召周黨竟辭歸

赤日京塵遠蒼烟海樹微送君還自歎老却故山薇
送周復秀才賦行李中一物得紈扇

不画乘鸞女應憐素質新霜機驚落早風塵讓揮頻
席上曾歌怨窗間或掩頻何如爲君子遠路障埃塵

送流人

漢條應偶觸蠻俗未能諳海近風多颶山昏瘴似嵐
行衡哀甸虎食畏蠱家蠶鄉國何年返縣知老日南
贈張雀郎

漢署早爲郎長遊鳳沼傍雞知壺水候馬識火城光

每載趨曹筆時熏直省香邊書無一羽冠蓋得翱翔

送瀚公住靈岩

離宮遊路絕名寺道場開我昔題詩去師今說法來
茱萸垂澗戶齒菴發池臺興壞俱空幻登臨不用哀
送宿衛將出守鄧州

中郎身領仗宿衛在承明舊射雙鵬落新乘五馬行
紅雲遙魏闕白水近穰城好勸諸年少春來賣劔
耕

甘露寺

勝地江山壯名林歲月遙
剝藏京口樹鐘送海門潮
月黑龍光發天清蜃氣銷
何當尋狼石閒坐話前朝
送張羽後夜坐西齋

閉齋聽鐘坐憂緒悵多端
鳴雁雨中急離人江上寒
秋燈下水葉夜艇隔風湍
別後情蕭索方知舊會歡

徐山人別墅

茶香孤墅發竹色四隣分
掃地侵蟲字開窗散鳥羣
樹涼池過雨苔潤石生雲
我出無車馬偏宜訪隱君
客館秋懷

獨臥愁空館墻陰野豆開
暑將潮氣斂秋與竹聲來
身賤多違志時清少棄材
慙非張仲蔚門戶有蒿萊
秋夜宿周記室草堂送王才

相別還相戀秋宵暫對床
人情貧後見客况醉中忘
池柳疎含吹江雲薄護霜
離舟待明發愁思劇茫茫
江上雨

冥冥衆樹昏浩浩一江渾
急有廻有韻輕無入霧痕
鳥啼叢竹嶺人臥落花村
門巷春泥滑誰來共酒尊
送賈二進士歸省

少年擅詞華曾看手八叉晨裝歸路雨春酒別筵花
馬帶雲過嶺人同燕到家罷官趨覲好不是謫長沙

贈演師

石橋尋禮罷歸住白雲層法悟經慵讀年衰塔倦登
青苔生砌錫黃葉翳龕燈我欲相依老前身恐是僧

送錢氏兩僧度嶺

吏送投荒去應歸下瀨營一家十口散萬里兩身行
洞獠欺商市山魃喚客名江邊南望泣不盡涓陽情

送客歸閩省覲

秋城聞暮砧歸思忽盈襟客久依人遍親衰念子深
青山多嶺路紅荔到鄉林菽水還堪樂何須季子金

圓明佛舍訪呂

憐君不出院結夏與僧同陰竹行廊遠香花掩殿空
飯分齋鉢裏書寄藏函中茶宴歸來晚西林一畧風

答宗人廉夜飲王氏池亭見懷

遙聞池上酌涼夜失炎兵酒碧傾當竹衣香坐近蓮
泂波人弄月翻樹鳥鳴烟座上誰相憶唯應是惠連

賦得蟬送別

疎槐細柳中涼占一枝風蛻出形猶弱驚飛響未終
雨來林館靜日下驛門空離管尊前發悽涼調正同
何隱君小墅

移家營別墅一徑竹扉開泉滿疏渠放花多借地栽
壁間田器挂窗裏浦帆來自戀幽居樂誰言是棄材
贈張明府

聞道彈琴處門前柳帶沙海珍通估市湖稅減漁家
暮港迷荷葉秋田間豆花亂來無此地君正亦堪誇
送唐博士肅移家醉李

揚柳發初齊春陰廢苑西故人乘醉別新鳥傍愁啼
舟重全家去詩多一路題杏花開北郭誰復共招提
贈妓

樂籍小名收侯家舊主謳笑能撩客喜醉肯逐人畱
蝶識熏香氣鶯慙度曲喉更憐諧酒令少日住揚州
送顧倅之錢塘

之官卽勝遊送別漫多愁草色荒宮燕槐陰達遠驕
湖通朝汲井潮動夜眠樓早向臨平過荷花已欲秋
答高廉同飲後見寄

竹林清暑宴客散獨歸時愁寄歡餘別醒慙醉後詩
蟬催科景急鳥度廣川遲何事聞鐘處勞君尚遠思
沈徵士鉉野亭

清時猶在野獨臥見高情移艇聞烟唱釣簾看雨畊
清晴雙鶴下樹晚一牛鳴回首徒相憶柴車不入城
題醫師王隱墓表後

孤舟別楚水容髮已蒼蒼竟賦招魂些虛傳續命方
悲風柏隴小積雨藥園荒生滅雖能悟看碑亦感傷

贈朱山人

老來嫌衆累依澗獨開房積雨苔生桁迴風葉滿床
學僧持淨律避客錄奇方若問塵中事無聞不是忘

溪上

秋色共溪長遊人語笑涼萍開天倒影蓮墮水流香
漁笛和星漉禽且帶雨張從今遙桂棹不必問瀟湘

次韵楊儀冒雨中

雨中池閣曉清簾薦文漪陰恐晴期遠寒疑暑候遲
荷高擎欲折柳重舞難欹應阻陪高詠開簾看散絲

寄錢塘諸故人

年少客名都狂遊每共呼荷深箏在舫竹靜矢鳴壺
明月潮千里殘陽雨半湖故人能念否歡意近來無
送烏程馮明府

青山若下南一騎入晴嵐縣治棊聲古泉香酒味甘
竹欄春護鴨箏箔夏分蠶大小馮君後傳家爾最堪
喜了上人見過

幾時西澗別忽喜過家園澹泊林間供虛空世外言
豆花零晚架瓜蔓絡秋垣莫厭頻相過衡門久息喧

病目

閉目洗黃連深窗坐兀然未忘聽鳥興暫絕看花緣
問女知簷日暝奴畏竈烟願因無見處得證定心禪

病目不飲

患目未全明鑿教謝麴生暫從彭澤止恐學左丘盲
壁下蘭尊掩林間藥臼鳴坐聽連日雨何物慰閒情
賦得蟹送人之官

吐沫亂珠流無腸豈識愁香宜橙實晚肥過稻花秋
出籩來深浦隨燈聚遠洲郡齋初退食可怕有監州

江上早發

蒼蒼汀霧起何處望高城游子曉初發居人寒未耕
犬鳴林月落魚躍浦風生已有先行者烟中聞棹聲
客舍喜姪庸至

客裏逢人喜相過况阿宜遠遊驚歲晚多難惜門惜
帆落江橋近鐘來野店遲一杯燈下語渾似在家時

哭周記室

萬里一羈臣悲歌楚水春漫期重會而竟作永傷神
主祭惟孤姪收詩有故人獨揮聞笛淚斜日下西隣

過永定廢寺

亂後僧何去門閒落葉時書帙半空老齋粥千無
罷說傳心法猶看賜額碑不知瓊瑤埋來此豈無悲

楓橋送丁夙

紅葉寺前橋停君晚去梳醉應忘世難歸不計程遙
山隱初沉日風催欲上潮離魂來此處還似灞陵銷

論發漢侍中許或墓

古冢竟誰穿虛傳銅最堅玉魚宵已出石獸曉猶眠
長夜俄看日幽臺不掩泉須知摸金者亦到漢陵前

過海昌贈李侯

閒廳晝下簾秋色滿疎髯久戍殘兵老多貧長吏廉
陰風潮動郭晴日地生鹽三老相逢說年來戶贖添
送易從事祖飲南堵

疎楊映老荷別處最秋多送客年年
霞明添醉色風急驟離歌莫爲官
霞明添醉色風急驟離歌莫爲官

題張靜居畫

楚客寫荆岑秋雲隔浦陰人
亂後清遊歇愁邊遠色深
亂後清遊歇愁邊遠色深

夜懷王校書

燈暗獨吟餘疎桐月滿除蟲寒初入戶鼠餓欲侵書
河漢三更望江河兩地居相思無去夢今夜恨何如

答陳則見寄

何由慰遠思獨詠寄來詩行路方難日清秋欲盡時
江多驚雁火樹少宿鳥枝早晚如相見應憐有鬢絲

煮藥

葉燥井泉清山窗藥在鑪燈前看火候枕上聽潮聲
味熟吟方就香來病已輕何時采芝木養得羽翰成

夜投西寺

江月上秋夜來敲遠寺扉
栖禽驚客至睡僕訝僧歸
鐘度行廊盡燈畱浴院微
非無招旅館禪寂願相依

送石明府之崑山

茂苑行春罷攜琴又向東
潮聲數里外山色半城中
帆帶桃花雨衣翻柳葉風
島夷聞善政爲有船船隨

過城西廢塲

亂前遊最熟亂後問都迷
園散栽花戶林荒采菊蹊
廢泉流圃淺斜日下城低
唯有烟中鳥迎人似舊啼

送范架閣赴嘉禾兼簡李史君

陸相祠前路孤舟欲上時
空江難晚別荒郡易秋悲
月送潮生早雲隨雁去遲
幙中知有子太守只題詩

喜呂人見過江館

非君憐夙契誰宥顧柴門
日短清江路風高大樹村
交呈新著稿同發舊藏尊
莫便尋歸棹心懷未盡論

贈隣友

同居一塢中只隔水西東
林近書燈露溪廻酒舫通
放鳧長合隊移竹每分裝
只恐君徵起難期作兩翁

宿道王蘭若

借榻到僧扉雖安未是歸暝禽愁雪意夜篠助風威
燈盡思燃帶衾寒起覆衣不知孤棹去明夕更何依

與詩客七人會飲余司馬園亭

居皆在北郭

情與酒兼和園亭駐晚珂家同榆社近人比竹林多
短景催長宴醒吟雜醉歌亂離歡易失無厭數相遇

登西澗小閣

層檻構雲牢清寒灑客袍石稜添澗險閣勢借峯高
風竹驚栖鳥霜藤縋飲猿欲題因境勝不敢易揮毫

江上答徐卿見贈

烟樹近松陵扁舟曉獨乘江黃連渚霧野白滿田水
往事愁人問虛名畏客稱無才任蕭散敢望鶴書徵

除夕客中與家兄守歲

雨雪遠村中猿鳴旅館空守爐銷夜漏停燭待春風
有恨能催老無文解送窮却憐今夕酒還得弟兄同

南溪晚歸

流水出雲根遙通古寺門山深僧少俗人靜市如村
馬渡知長淺魚行見不渾多情溪上月歸路照黃昏

丁孝廉惠冠巾

知試山人服冠巾遠寄重佳名因子夏舊製學林宗
裘映秋吟髯歆宜曉醉容朝簪今已解期上華陽峯

西園閑興二首

看到竹過隣園林獨臥身鳥聲閒似野人意倦如春
殘雨驚池樹斜陽照隙塵如何堂上客不及燕來頻
當路闕追攀端居自掩關聽鐘知近寺看回憶登山
曉櫛風林下宵吟雨閣間天應憐我嬾獨與少年閒

送謝恭

涼風起江海萬樹盡秋聲搖落豈堪別躊躇空復情

帆過京口渡砧響石頭城爲客歸宜早高堂白髮生
步至東皋

斜日半川明幽人每獨行愁懷逢暮慘詩意入秋清
鳥啄枯楊碎虫懸落葉輕如何得歸後猶似客中情
郊墅雜賦十六首

江水舍西東隣家是釣翁路痕深草沒井脉暗潮通
籬隔蔬邊雨門開竹下風不因時賣畚何事入城中
其二

此鄉堪避地亂後戶翻增俗美嫌欺客年豐愛施僧

帶星耕處輒照雪紡時燈且作求田計元龍豈我能

其三

幽事向誰誇孤吟對晚沙浣衣江動月繫艇岸垂花
行蟻如知路歸鳥自識家一尊茅屋底隨意荅春華

其四

春泥桑下路孤策自扶行身賤知農事心閒見物情
魚鳴風欲起牛飯月初生漸喜無人識何煩易姓名

其五

移家到渚濱沙鳥便相親地僻偏容嬾村荒却稱貧

大隨春儘女雞喚曉耕人願得無愁事閒眠老此身

其六

紛紛謝人役寂寂戀吾居細雨春雩後斜陽社飲餘
岸花飛趁蝶池葉墮驚魚好了公事事休令吏到廬

其七

路迂橋斷處門靜獨眠時孤墅藏羣柳誰田灌一陂
僮閒春作少婦嬾午炊遲誰道花源好還令太守知

其八

虛閣近鳴湍應宜把一竿雨傷春麥爛風折晚蒲乾

抱甕臨江汲携書入寺看自慙吾獨幸世難此儉安

其九

亂渚交交白平蕪漫漫青賣薪沙店遠祠穀水祠靈
密雨侵蓑重微風過網腥江邊多酒伴春去不曾醒

其十

入夜潮侵戶經秋雨壞垣里人淳少訟田父醉多言
稻蟹燈前聚莎虫機下喧自應耽野趣不是忘鄉園

其十一

欲沽嗟市遠烟火隔江波客到寒齋少人歸晚渡多

汗書燈燼落驚枕櫓聲過豈敢愁荒寂時危免負戈

其十二

野色迥蒼蒼開門葉滿塘僧來雙屐雨漁臥一船霜

靜裏修香傳閒中錄酒方平生當世意到此坐成忘

其十三

紅樹江南近青山北郭遙江清目渺渺林冷髮蕭蕭
食鱸知晨釣聽歌識暮樵尋常送歸客不過水西橋

其十四

何處可徘徊林間共水隈夜歸家犬識春睡野禽催

有地唯栽藥無村不見梅興來慙獨飲時喚老農陪

其十五

狂多愛出遊日日問江頭小草皆春意遙山自晚愁
酒中時有得物外復何求不詠騷人調靡蕪任滿洲

其十六

居似臨邛宅耕非鄠杜田已償輸稅米未覓賣文錢
把卷憐長日看花愧少年翛然閉門處楊柳桔槔邊

答胡博士畱別二十韵

世緒名臣後聲華俊士前棘場曾中的芹水舊鳴絃

遠道秋風褐空齋夜雨瓊倦遊驚齒暮多難喜身全
孤客愁王粲諸生老鄭玄未應心戚戚還是腹便便
杜曲無歸業成都有卜錢我方辭闕下君尚隱江
邊久語燈催剪頰過榻解懸擇隣欣得地結友愧忘
年牧逕依門轉漁梁近渡連舊盟尋白鳥餘奉買烏
犍流水空塘樹疎林破屋烟詎憂窮作祟但欲醉成
仙政爾交歡密俄然別恨牽湖山入苑路雞犬載家
船離索方堪歎分携益可憐殊鄉難託主薄俗易輕
賢寒浦通湖處春城罷雪天梅花未宜折持送只詩



卷九
篇

缶鳴集卷之十

古吳 高啓 李迪 著

同里 辨雲居士 校

七言近體

詩一百首

大駕親祠方丘選射齋宮奉次 御製韻

奠璧方壇曉祝釐豹竿風動從靈祗獻符多士哥昌
運扈蹕諸蕃觀盛儀郊射貫侯初復古汾祠獲鼎未
云奇山川效靜年多穀神 皇心定有期

奉迎 車駕享 太廟還宮

鳴蹕聲中曉仗廻，錦裝馴象踏紅埃。
半空雲飲看旗動，滿道天香識駕來。
漢酌祭餘清廟閉，舜衣垂處紫宮開。
禮成海內人皆慶，獻頌應慙自乏才。

晚登南岡望都邑宮闕二首

落日登高望，帝畿龍蟠山下見。
龍飛雲霄雙闕開，黃道烟樹三宮接。
翠微沙苑馬閒秋，獵罷天街車響晚。
朝崱叫胡欲獻昇平頌，還逐仙班入瑣闥。
秦金不厭氣佳哉，紫蓋黃旗此日開。
殘雪已銷鳩鵲觀，浮雲不隱鳳皇臺。
山如洛下層層出，江自巴中渺

渺來六代衣冠總成土，幸逢昌運莫興哀。

奉天殿進元史

詔預編摩辱主知，布衣亦得拜龍墀。
書成一代存殷鑒，朝列千官備漢儀。
漏盡秋城催伏早，燭光曉殿卷簾遲。
時清機務應多暇，閣下容幸一披。

九日陪諸閣老食賜糕次謝授經韻

叨陪講席接詞曹，曉禁霜花素袍院。
貯圖書西掖靜雲連，宮殿北山高故園。
莫憶黃花酒內府，初嘗赤棗糕最愛鳳毛。
今復見便令池上一揮毫。

送沈左司從汪參政分省陝西汪由御史中丞
出

重臣分陝去臺端賓從威儀盡漢官四塞河山歸版
籍百年父老見衣冠函關月落聽雞度華岳雲開立
馬看知爾西行定回首如今江左是長安

吳僧日章講師赴召修蔣山普度佛事旣罷
東歸送別二首

萬人擁座聽潮音寶刹曾迂玉駕臨佛法曉敷三
三藏秘帝恩春及九原深鐘山坐處花頻雨練浦

歸時樹欲陰擬問楞伽嗟已別楚江飛錫暮沉沉故
鄉未解識清容却在金陵闕下逢中禁曾分齋鉢
飯上方時叩講筵鐘一帆細雨迢迢浦半塔斜陽靄
靄峯相送師歸忽多感飛雲亦戀舊依松

清明呈館中諸公

新烟着柳禁垣斜杏酪分香俗共誇白下有山皆繞
郭清明無客不思家卞侯墓上迷芳草盧女門前映
落花喜得故人同待詔擬沽春酒醉京華

金陵喜逢董卿併送還武昌

台明集 卷一
兵後匆匆記別離兩年音問不相知武昌樓下初來
日幙府門前忽見時上國花開同醉少大江潮落獨
歸遲莫嗟握手還分手此會從前豈有期

送易左司分省廣西

朝廷特念遠氓深画省分官出桂林油幕乍開依漢
節卉衣時到貢蠻金四時花發山多暖半日嵐開市
尚陰虞帝祠前黃竹裏相思莫聽鷓鴣吟

送王檢校錡赴北平

半年同舍客京華看遍龍河寺裏花纔進史書朝

目下便紆官綬去天涯平蕪遠塞秋驅騎衰柳遺宮
晚噪鴉莫道竊邊成久別待君歸草玉堂麻

京師秋興次謝太史韻

柳外秋風起 御河京華客子意如何伎同北郭知
應濫俸比東方愧已多梁寺鐘來殘月落漢官砧斷
早鴻過不材幸得同趨 闕幾度珊珊候曉珂

送祠江瀆使者

源發岷峨萬里通山香迢遞問齋宮神馳白馬靈光
近祝奉玄牲禮秩崇驛下換船潮湧日廟前沉璧水

迴風重煩使者徼多福南國無 黍稌豐

送葉判官赴高塘時使安南遊

銅柱崖前使節過貢隨歸騎入京多一官暫遣陪成
瑁片語曾煩下趙佗曉拜賜衣辭 絳闕秋催征棹
渡黃河政餘好賦登臨咏聞說州人最善歌

衍師見訪鍾山里第

風雨孤舟寄一僧遠煩相覓到金陵青山愧逐塵中
馬白拂看麾座上蠅事去南朝猶有恨夢歸北郭已
無憑文章何用虛叨祿只合從師問上乘

寄題安慶城樓

層構初成百戰終憑高應喜楚氛空山隨粉堞連雲
起江引清淮與海通遠客帆檣秋水外殘兵鼓角夕
陽中時清莫問英雄事回首長烟滅去鴻

送鄭都司赴大將軍行營

上公承 詔出蓬萊立馬風烟萬里開賜履已分無
棣遠舞戈還見有苗來牙前部曲多收績幙下賓僚
更倚才後夜軍門知子到郎星應是近三台

送朱謝二博士進賀冬至表赴京師聽 宣諭

畢還吳

驛騎雙馳捧祿章
都門逢舊喜洋洋
小儒方幸瞻天近
遠使初來賀日長
仗下丹墀晴雪盡
朝回紫陌曉塵香
承宣歸去難畱駐
乞報平安到鄉

送丕上人還四明育王寺

解夏還尋舊寺栖
滿船黃葉過長溪
袈裟影入秋山遠
舍利光懸夜塔低
鸞識講時常繞聽
猿知定後不驚啼
却慙擾擾塵中客
覺路如今去尚迷

送吳生赴汴省其父指揮

都亭槐雨淨朝埃
彩服逢秋試剪裁
定遠未歸雙節在
孝廉初去一船開
城依梁苑烟中閉
河繞隋堤樹裏來
家慶拜餘尋舊跡
夕陽騎馬過繁臺

客舍夜坐

樓角聲殘鎖禁城
燈花半落夜寒生
啼鴉井上驚風散
殘雪窗前助月明
清世莫嗟人寂寞
中年漸怯歲呼聲
酒杯詩卷吾家物
客裏相親倍有情

送鄭山人聽宣諭歸東陽

閭門傳詔山人拜
清曉蓬萊望彩霞
布褐朝天

纔赴闕蒲帆帶雨又還家沈侯詠罷樓沉月婺女粧
殘廟掩花無限 朝廷仁恤意殷勤歸向老農誇

春來

各愁擬向春來減春到愁翻倍舊時走馬已無年少
樂聽鶯空有故園思日光晶晶濃熏草風力颺颺緩
墮絲辟歷溝南酒家路共誰來往問花枝

送賈文學以郡薦赴禮部試畢歸吳

匹馬都門候曉開英公新薦賈生來郡中方待傳經
業闕下先稱射策才寒食杏花江店雨春衣柳絮驛

程埃慙子東掖叨陪講難把長竿送別杯

休沐日期衍公遊北山不果獨臥齋中

休沐欣逢一日閒擬邀禪客共登山兩筇未許尋蘿
徑孤枕應須掩竹關歷歷遠峯墜土外蕭蕭深屋草
乘閒安眠却勝清遊樂覺看斜陽燕子還

送內兄周誼還江上

憶奉 綸音趣赴朝曾煩遠送過楓橋雲山方恨成
睽阻雪夜俄來伴寂寥英苑疎鐘沉晚樹楚江歸榜
逐寒潮情親海內如君少敢惜離魂爲一銷

夜聞吳女誦經

雲窗月帳散花多閒讀金經夜若何嬌舌乍彈鶯學
語芳心已定井銷波尼師曾教青蓮偈女伴徒爲白
苧歌聽處若迷空色相應須愁殺病維摩

送趙使君致仕歸別業

久仕長湖白髮長今年得許乞身章吏收封印朝辭
郡人賀懸車晚在鄉家篋已添新著稿官衫未歇舊
熏香南風別墅初歸處應坐肩輿看種秧

遊南峰寺有支遁放鶴亭

每向人間望碧峯石門今得問幽踪路緣風磴冷
策寺隔烟蘿杳杳鐘窗下鳥來多墜果亭前鶴去只
高松一龕願借依香火莫道詩人非戴顓

送隣僧淡雲歸笠澤

往來海上獨離羣雅稱身名是澹雲經院葉深秋講
散香臺鳥下午齋分坐間山僧曾同說別後隣鐘不
共聞笠澤到時尋舊業菱池漠漠雨紛紛

次韵楊署令雨中臥疾

雙桐分蔭曉池清乍喜新晴覺病輕蛛曳林風吹欲

斷鷺經沙雨洗偏明吟多稍怯臨窗寫臥久渾忘出
市行不道歸踰一月起聞歌鳥尚疑行

送呂秀才入道

學禮茅君便入山黃冠初著稱清顏杏園不羨龍頭
貴蓬島應思鶴背閒窗下棄檠辭婦去壇前受籙拜
師還白雲知勝青雲好揮手從今謝世間

送胡簿之陽朔

幾年桂管去人稀白髮憐君獨遠違過海定尋廻佑
舶出京纔脫舊儒衣祠羞荔子傳巫語縣閉榕陰

吏歸亦欲居移嗟未得漫看鴻鵠向南飛

謁甫里祠

衣冠寂寞半塵絲想見江湖獨臥時遁跡虛煩明主
詔感懷猶賦散人詩釣魚船去雲迷浦闌鴨闌空草
滿池芳藻一杯誰爲奠鼓聲只到水神祠

送恩禪師弟子勤歸開元寺

寺有二石佛
自海上浮至

山衲經寒補雜繒白雲高寺遍尋登法身已見浮來
佛宗旨曾傳化去僧歸過江城誰施飯定依舊院自
懸燈明朝應恨千峰阻欲問楞伽已不能

送何記室遊湖州

暮雨關城獨去遲，少年心事劔相知。
故人當路輕貧賤，倦客逢秋惡別離。
疎柳一旗江上酒，亂山孤棹道中詩。
水嬉散後湖亭廢，此去煩君弔牧之。

江上寄丁校理昆季

望裏烟生是子家，草堂應近脊令沙。
江汀每恨無舟渡，野墅空憐有酒賒。
半雨暮成風外雪，孤梅春動鴈中花。
相思尚隔前村遠，獨倚柴門數去鴉。

送顧軍咨歸梁溪

新柳休攀短短條，離愁似雪未能銷。
春迴廢苑還芳草，人渡空江正洛潮。
德曜宅前今獨去，平津門下舊相招。
重來莫在花開後，擬聽狂歌醉幾朝。

白蓮寺次韵杜進士喜余見過話舊之作

不辭鳴棹遠相尋，欲向江齋伴旅吟。
百事未成年已長，幾時纔別夏將深。
螢畱倦蝶連池綠，樹帶殘鶯滿寺陰。
恐被老僧嫌滯礙，舊遊休說更傷心。

期徐七遊雲巖

憶與青山別幾時，雲僧應恨鶴歸遲。
少知學道貧非

病閒愛談禪偈是詩女浣曉江烟森森人行暮苑麥
離離明朝風雨還同往恐負高僧石上期

賦得寒山寺送別

楓橋西望碧山微寺對寒江獨掩扉船裏鍾催行客
起塔中燈照遠僧歸漁村寂寂孤烟近官路蕭蕭衆
葉稀須記姑蘇城外酒烏啼時節送君違

聞朱將軍戰歿

二浦戈船赤幟稀孤軍落日陷重圍鏡中蛇墮占應
驗牙上梟鳴事已非殘卒自隨新將去老親空見舊

如歸聞雞此夜誰同舞西望秋雲淚灑衣

送何明府之秦郵

何淮東人已
爲三縣令

馬前風葉助離聲楚驛都荒不計程一令尚淹三縣
事幾家曾見十年兵夕陽遠樹烟生戍秋雨殘荷水
繞城父老不須重嘆息君來應有故鄉情

過野寺次韵徐廉使琰舊題

使節城東按部廻曾將從吏到香臺秋林數騎蕭蕭
去晚澤孤鴻噉噉來蘿雨濕衣溪路轉柏風吹燭殿
門開當年物色雖畱與題壁慙無子美才

送榮公行邊

風卷雙旌雪覆韉
遠騎白馬出行邊
兵馳空壁三千
戢客宴高堂十萬錢
屏裏舊圖魚復陣
燈前新著豹
韜篇功成他日論
諸將只有荀郎最少年

登涵空閣

滾滾波濤漠漠天
曲欄高棟此山顛
置身直在浮雲
上縱目長過去
鳥前數杵秋聲荒
苑樹一帆暝色太
湖船老僧不識興
亡恨只向遊人說往年

婁江寓舍喜王七偶見過却送還郭

送君只過孝廉橋
不似君來訪我遙
路未同歸鴻杳
杳門方孤掩竹蕭
蕭遠愁忽與鐘聲
至殘醉微兼燭
盡銷莫道扁舟難
重過寒江日日有
迴潮

送葉卿還隴西公幙兼簡周軍容

落日關城動鼓笳
遠遊憐汝尚無涯
壯身謾託三公
府歸夢難尋萬里
家投驛暮山燈照
葉待潮秋渡棹
粘沙軍中記室如
相問只說愁吟對
菊花

西塢

空山啄木聲敲鏗
花落水流復縱橫
松風吹壁鶴翎

墮梅雨過溪魚子生尚有人家棧杵遠更無塵土衣
棠輕斜陽已沒月未出樵子歸時吾獨行

過海雲院贈及長老

衲擁寒雲老一丘遊方無夢轉悠悠茶香吹過前林
晚菜葉流來別澗秋舊拂講餘懸壁上殘經定後落
床頭紫藤塢裏歸逢雪煨芋曾煩慰客愁

送錢塘守

繁華莫嘆異昇平到郡初煩露冕行幙下吏書催署
宇湖中妓舫歌歌聲潮來兩渡皆侵岸日落諸山半

入城休沐南屏煩一到松間尋我舊題名

張山人見訪畱宿草堂

夕陽欲沒靜沙墟喜子能來慰索居生事蕭條慙客
裏交情契濶歎其餘買魚急喚臨江艇炊黍深開映
竹厨屈指故能幾在莫辭同醉臥田廬

陪臨川公遊天池

騎馬尋幽度嶺遲老僧不識使君誰門開紅葉林間
寺泉浸青山石上池殘果已收猿食少枯松欲折雀
巢危壁間不用題名字無限蒼苔沒舊碑

客舍歲暮

空江寒雨送淒涼
離舍無多卽異鄉
井臼尚勤慙
曜音書未至
憶平陽
心輕別歲
憑年少
夢喜還家
夜長自笑病來詞賦拙
嬾從枚叟客遊梁

江上晚眺懷王著作

渡頭西望足離情
晚水寒山雪後清
鷗立斷水流漸
遠鴉隨殘照去
還明漁人笛過風生浦
估客帆廻樹
絕城范蠡祠前春意動
思君欲放酒船行

答徐七記室病中作

空齋孤枕積書間
清瘦憐君變舊顏
累少亦憂今日
亂病多應賴此身
閒朝辭隣友看花去
晚候家僮買
藥還知是苦吟
猶未廢水邊深樹掩柴關

遊雲岩值雨

深殿幽廊映竹開
鳥聲忽斷雨聲催
蘚生偏上題詩
壁花落還臨說法
臺林下聞鐘諸客散
礪邊汲水一
僧來晚晴更好看
山色西閣憑闌獨未廻

送張徵君南遊

故人多去不堪留
况復看君更遠遊
流落正逢搖落

京亂離還值別離愁夕陽亭上匆匆酒寒雨江邊渺
渺舟此後衡門應獨掩詩篇寂寞有誰耐

宿張氏江館

極浦荒雲一棹行遠投江館駐宵程客中得酒啣悲
喜亂後逢人說死生木葉未空寒鳥聚海潮欲上曙
雞鳴政憐此地無驚擾歸夢如何又入城

再遊南峯

放鶴亭前落葉重吟身獨上夕陽峯遠村近浦分諸
樹後嶺前山應一鐘高閣倚殘暈歸鳥過空林行盡老

僧逢支公駿馬嗟何處石上莓苔沒舊踪

送李使君鎮海昌

州有雙廟

海風千里卷雙旌按轡初聞屬部清人雜島夷爭午
市潮隨山雨入秋城鳴狐不近睢陽廟突騎猶屯廣
利營宵掃帳中容我醉夜深燃燭臥談兵

賦得惠山泉送客遊越

云液流甘漱石牙潤通錫麓樹增華汲來時冷和山
雨飲處春香帶澗花合契老僧煩每護修經幽客記
日誇送行一斛還堪贈徃試雲門日注茶

寄題張著作菁山隱居

霞映青山似赤城，歸樓聞已謝時名。
半湖殘雨收虹影，幾樹斜陽帶鳥聲。
竹下逢僧投杖揖，蘿間候客抱琴行。
平生應笑王夷甫，末路方言少宦情。

送胡孝廉布東遊

春色偏傷楚客心，日斜芳草鷓鴣吟。
山遮故國千里影，雲度長江一片陰。
少婦白挑燈下錦，諸侯誰贈索中金。
送行只恨華觴淺，不似同袍別意深。

雲岩訪蟾公值雨畱宿次周記室壁間韵

日暮松間兩屐過，嬾殘不出近如何。
鐘聞下界歸人少，燈照空林落葉多。
別後有思還是妄，定中無想不成魔。
山靈盡意相畱客，暗雨斜風滿薜蘿。

送任兵曹赴邊

少年耻着惠文冠，幙下時時把劍看。
官燭未銷雞送曉，軍笳忽動馬嘶寒。
關連遠樹征途迥，塞接霜蕪戰地寬。
見說長平門下客，奇材唯有一任安。

秋日江居寫懷七首

每看搖落卽成悲，况在漂零與別離。
爲客偶當鱸美

處思見正值雁來時天邊暝爲秋陰早江上寒因歲
閨遲莫把風姿比楊柳愁多蕭颯恐先衰

葭莢連秋渺渺長歸舟猶歎滯江鄉客衣欲冷隣機
急農事初成野飯香千里斷雲隨雁鶩半村殘照送
牛羊有愁不解登高賦空使頻廻宋玉腸

舌在休誇術未窮且將踪跡託漁陽芙蓉澤國瀟浩
雨禾黍田疇掩冉風身計未成先業廢心懷欲說舊
交空楚雲吳樹無窮恨都在蕭條隱几中

風塵零落舊衣冠獨客江邊自少歡門巷有人催稅
到隣家無處借書看野蟲催響天將夕籬豆垂花雨
稍寒終臥此鄉應不憾只憂飄泊尚難安

桑苧翁家次近居人烟沙竹自成墟移門欲就山當
榻補屋唯防雨濕書貧爲湖田長半沒拙因世事本
多踈當時亦有求名意自喜年來漸已除

喪亂將家幸得全客中長耻受人憐妻能守道同王
霸婢不知詩異鄭玄借得種蔬傍舍地分來灌菊別
池泉却欣遠跡無相問一棹秋風笠澤邊

秋塘門掩竹穿沙爲客隣酷未易賒閒裏壯年慙白

日愁中佳節負黃花
漁村靄靄綠江暗
農徑蕭蕭入圃斜
薄俗相輕吾敢怨
魯人猶自笑東家

寄倪隱君元鎮

名落人間四十年
綠簑細雨自江天
寒池蕉雪詩人
前午榻茶烟
叟禪四面荒山高閣外
兩株疎柳舊莊前
相思不及鷗飛去
空恨風波滯酒船

與杜進士寅登白蓮閣對雨

遠愁高樹共離離
風逆潮聲上浦遲
海客市中烟起處
江僧閣外雨來時
船歸杳靄唯聞榜
店隱蒼茫不

見旗回首南朝今
幾寺可堪重詠牧之詩

喜宋山人見過

攜棹遠赴渡江船
煩覓幽踪浦樹邊
別久忽看梅又發
話長應讓雁先眠
一冬多暖天無雪
半夜初寒月有烟
回首舊遊君莫念
歸來好共種吳田

與侄常遊東菴

水樹圍菴綠幾層
陰中敲戶晝登登
十年重到猶爲
客半日纔閒且訪僧
舊履塵生跌後席
亂幡風颭供
餅燈高齋對作忘
言坐此事堪憐
汝亦能

謝周四秀才送酒

不忍醒愁只欲眠
幾日花發自江邊
欲沽百錢未易得
忽送一壺真可憐
梳頭好鳥語窗下
洗盞流水到門前
今朝得醉已無恨
不使春光空一年

上元有懷

春寒渾未減
征衣愁對佳辰坐
掩扉江上琴書畱
滯久水邊車馬袞
除稀闕園細雨梨
花落廢苑平蕪燕
子飛欲覓蘭亭會
中友幾人遷謫未
能歸

徐記室賁北歸見訪南渚復送還城

初辭楚澤到吳村
訪舊嗟君古道存
欲治匆匆歸後計
難畱欸欸坐中論
雪遲似讓梅先白
月早如愁樹已昏
此別終非前別遠
孤舟江上莫銷魂

被召將赴京師畱別親友

長送遊人作遠行
今朝還自別鄉城
北山恐起移文誚
東觀慙叨議論名
路去幾程天欲近
春來十日水初生
只愁使者頻催發
不盡江頭話別情

過故將軍第

甲第如雲紫陌東
當年得邊功
美人笑容登樓

上假子將兵衛閭中深計漫圖三窟固遊魂難返九
原空門前車馬今誰到零落槐花向晚風

雨中寄劉沈二別駕

漠漠春寒水繞城誰家可作看花行一杯不得三人
共二月都能幾日晴夢逐鶯聲風外斷愁兼草色雨
中生画船載妓南湖上不似年時放浪情

丁校書見招晚酌

正坐羈愁不自聊遠煩舟楫暮相邀江懸落日猶三
尺風折垂楊定幾條流水入花村杳杳幽人對酒屋

滄脩此鄉不得君同客應是春來更寂寥

杜二年四十鬚已多白戲作是詩

覽鏡憐君感歎深年來領下忽霜侵未衰自計方強
仕早白應緣只苦吟雖失家中嬌婢喜還招座上遠
朋欽到頭此物須當見好染虛銷買藥金

梅花九首

瓊姿只合在瑤臺誰向江南處處栽雪滿山中高士
臥月明林下美人來寒依疎影蕭蕭竹春掩殘香漠
漠苔自去何郎無好詠東風愁寂幾回開

編竹相逢半是仙平生水竹有淵緣
蔞疎尚密微經雨似暗還明遠在烟薄
暝山家松樹下嫩寒江店杏花前
秦人若解當時種不引漁郎入洞天

翠羽驚飛別樹頭冷香狼籍倩誰收
騎驢客醉風吹帽放鶴人歸雪滿舟
澹月微雲皆似夢空山流水獨成愁
幾看孤影低徊處只道花神夜出遊

淡淡霜華濕粉痕誰施綃帳護香溫
詩隨十里尋春路愁在三更挂月村
飛去只憂雲作伴銷來肯信玉爲魂
一尊欲訪羅浮客落葉空山正掩門

雲霧爲屏雪作宮塵埃無路可能通
春風未動枝先覺夜月初來樹欲空
翠袖佳人依竹下白衣宰相住山中
寂寥此地君休怨回首名園盡棘叢

夢斷揚州閣掩塵幽期猶自屬詩人
立殘孤影長過夜看到餘芳不是春
雲暖空山栽玉徧月寒深浦泣珠頻
掀蓬岡裏當時見錯愛橫斜却未真

獨開無那只依依宵爲愁多減玉輝
簾外鐘來初月上燈前角斷忽霜飛
行人水驛春全早啼鳥山塘晚半稀
愧我素衣今已化相逢遠自洛陽歸

最愛寒多最得陽
仙遊常在白雲鄉
春愁寂寞天應老
夜色朦朧月亦香
楚客不吟江路寂
吳王已醉苑臺荒
枝頭誰見花驚處
嫋嫋微風簌簌霜

斷魂只有月明知
無限春愁在一枝
不共人言唯獨笑
忽疑君到正相思
歌殘別院燒燈夜
粧罷深宮覽鏡時
舊夢已隨流水遠
山窗聊復伴題詩

辭戶部之

命東還始出都門有作

詔貳民曹出禁林
陳辭因得解朝簪
臣材自信元難掩
聖澤誰言尚未深
遠水江花秋艇去
長河宮樹

曉鐘沉還鄉何事
行後自有區區戀
闕心

歸吳至楓橋

舊有塔今廢

遙看城郭尚疑非
不見青山舊塔微
官秩加身應謬得
鄉音到耳是真歸
夕陽寺掩啼鳥在
秋水橋空乳鴨飛
寄語里閭休復羨
錦衣今已作荷衣

送徐山人還蜀山兼寄張靜居

我因解紱遠辭京
君爲修渠暫入城
偶爾相逢春酒熟
飄然忽去暮烟生
山頭學嘯猶聞響
世上留詩不寫名
西碕煩詢張靜者
年來註易幾爻成

寄題內弟周思敬野人居

野人何處是幽栖
聞在天隨舊宅西
半屋圖書春落
蠶一村花柳盡鳴雞
分泉自給烹茶水
待雨惟耕種
桑畦日暮扁舟欲相訪
恐驚鷗鳥過前溪

雷鳴集卷之十一

五言絕句

詩九十首

觀軍裝十詠

胄

黃金冒虎頭
乍兔走豪酋
還有從容處
綸巾接壘遊

鎧

絲弗縷文銀
高城日照麟
擐來曾攪陣
一鎩不傷身

古吳陸高啓季迪 著
同里 拂雲居士 校

壽縣

髮亂野牛驚神專大將營師行當禡祭壇下戮番生

刀

大食購千金妖精泣太陰燈前看開匣看無限許君心

弓

燕角號良材樓煩擘未開秋風懸臂出何處一鷁來

箭

流星遂飛羽鏃利能穿孔三發定邊歸箠中休滿插

麾

彩帛曳長虹悠悠卷塞風三軍齊陷陣應在一揮中

矛

畫幹似蛇長誰論半段槍日斜親鬪罷高宴卓沙塲

袍

鵬錦剪花團三邊總認看尋常不肖著風零念兵寒

馬

羅帕覆春風連鞍賜有功蹄高騎得稱身出萬軍中

題雜畫十二首

空山萬株木靄靄秋多晦屋在白雲中人歸白雲外

其二

欲尋江寺僧渡口孤帆發落日浦風生不畏春潮濶
其三

鼓蒲亂石間水急魚難罩欲去尚殘陽看山一停棹
其四

風急楚江波佳人罷采荷離舟孤宿處淚少夜猿多
其五

孤柳影娑娑路入秋溪暮誰家繫榜來應待婦人渡
其六

驢影夕陽催空山不見梅愁腸如客路一日幾縈迴
其七

夕陽數峯遠靄靄江南思烟外有鐘聲山僧獨歸寺
其八

橋迴綠水斜春樹隔烟霞隱處誰云淺千峯只一家
其九

日出溪霧黃風迴不成雨何處趁虛人侏儻並沙語
其十

遠岫淡烟光斜陽在釣航衆漁婦已盡獨自過寒塘

其十一

柳葉散空塘菊花明廢苑日暮聞垞南舟行何近遠
其十二

山禽欲定栖竹風苦難靜殘雪墮驚梢脩脩一窗冷
效陰常侍

滿江烟水綠幾里把巴州音書不堪寄一寄一沉浮
歎墻下草

青青墻下草經霜未枯槁雖是見春遲還免逢秋早
草堂梵僧

禮塔老番僧唐言已漸能夜無還國夢石室坐懸燈

新月

纖纖掛柳西斜影低窺閣黃昏難久看初生是將落
尋胡隱君

渡水復渡水看花還看花春風江上路不覺到君家
淵源堂夜飲

懸燈照清夜葉落堂下雨客醉已無言秋蛩自相語
和陳左司夜泊桐江

月出釣臺樹長灘秋更喧渾如宿巫峽唯少一聲猿

過師子林

雨餘身語涼斜陽竹深見頻來非看花借讀高僧傳
薔薇露盥手

西陂

蠻估海帆廻銀鬕玉汞開盥餘香滿手恰似折花來
芳草水東西春風路欲迷歸時不覺晚山與夕陽低
園中梨花唯開一枝

闌外見春遲朝來雪一枝不知初發處誤道已殘時
江上酒家

門戶映垂楊春槽酒聲瀉幾度望高帘歸帆雨中下
過舊送別處

前時送畫船西港柳株邊別處愁猶在鴛鴦不肯眠
懷陳寅山人時居西山昭明寺

聞看西澗月秋閣與僧開正是相思夜鐘聲君處來
畧上人房竹

聞雁

幽篠半梢橫山窗颭月明上人禪定久不怕有秋聲
江寒月黑夜定宿蒹葭裏叫叫過燈前卻是誰驚起

晚坐水上

潭島去何深斜陽樹半陰偶來臨水坐非有羨魚心
聞謝恭夜詠詩

我非李太白君是謝楊兒夜半江樓雨高眠聞咏詩

天平山五丈石

勢危撐月直影瘦倚雲平彷彿峯頭井蓮花一半生

別呂隱君

孤舟晚溪口欲去重回首不忍別青山况此山中友
林下

國涼山意秋雲澹川光夕林下不逢人幽芳共誰摘
不寐懷徐記室

齋寒掩孤燭城遠沉雙杵憶爾忽長吟驚散床頭鼠
雪中自雲岩晚歸西村客舍二首

乍與諸僧別還依一叟隣柴門閉風雪誰候暮歸人
隔浦烟墟遠侵沙雪樹稀行人緣底事不及鳥先歸
立春前十日寄會稽周軍容

的的玩芳樹依依懷遠人千山雖隔郡十日共逢春

柳燕圖

柳上銜虫立春風似有情和枝吹裊裊方覺爾身輕
隔簾聞歌

葉逐散聲飛湘雲隔妓衣誰能偷卷看認是小鼓非

訪張司馬不仁書 亭壁

亭午鶴鳴雨果園花已稀偶來因忘去非待主人歸

壺中挿緋碧桃花旣而碧桃先落

白嫩倚紅嬌朝看訝獨飄應緣霞氣暖烘得雪先銷

優人李州僑乞米二首

曾稱富貴客粉墨尊前面憔悴立窮途渾非舊時天

戲場鼓笛靜人無太平樂爾莫怨飢寒梨園亦零落

黃氏延綠軒

葱葱溪樹暗靡靡江蕪濕雨過曉開簾一時放春入

燒筍

幽人嗜燒筍出土不容長林下孤烟起風吹似竹香

端午席上詠美人綵索釵符二首

臂頭長命縷百結更雙蟠怕有痕生肉教依玉釧寬
靈篆貯紗囊薰風綠鬢傍從今能鎮膽不怯睡空房

江寺雨中訪杜二

幾日纜歸舟同君野寺遊舊懷言未盡不是雨相留
喜從兄遠歸

聞汝歸舟到相迎只恐遲方當見時喜還憶別時悲

寒夜與家人坐語憶客中時

屋夜燈青竹庭寒雪白不對室中人依然去年客

題楞伽山寺壁

惆悵空山裏寒梅應自開雪中何處覓須待雪晴來
贈僧本空

了性本來空遊方不復東月明秋澗靜趺坐一山中

聞叢

初訝驚沙過復疑陳葉落寒霰夜聞時窗空人寂寞

江上漫成

春色到江濱江花樹樹新行吟憔悴客誰道亦逢春
雨中過玉遮山二首

松頭急風迴飛雨不到面何處豁清愁千山一人見
尋鐘入蒼茫一澗復一崦落葉去方深山扉雨中掩

画花鳥

語倦立還欹花垂裊裊枝美人粧閣靜斜日下簾時

種瓜

縣縣花蔓縈颯颯風烟灑秋來子正多不似黃臺下

摘瓠

輪困臥霜露秋曉摘初歸自笑詩人骨何由似爾肥

得家兄在遠消息

江上有歸舟傳兄在石頭知安雖暫喜念遠更成愁

懷蜀山人

靄靄衆山暝秋禽鳴澗竹知君高咏餘聽鐘掩窗宿

諸君會宿崔瓢山房題画賦詩余將赴召不

得預明日補題其上

偶趨蘭省召不預竹林歡山水圖中景明朝在路看

山中夜行

登隴日已沉出谷月初上夜行畏虎聞無奈車聲響

赴京道中逢還鄉友

我去君却歸相逢立途次欲寄故鄉言先詢上京事

泐禪師室中晚坐

綠陰欲滿寺禽鳴春雨餘聊因簡牘暇窗下閱僧書

白葵花

素彩發庭除涼滋玉露深誰怜白衣者亦有向陽心

馬氏東軒

陽和受最多爽氣看應少晞髮此窗前雞鳴海天曉

得家書

未讀書中語憂懷已覺寬燈前看封篋題字有平安

期陳則不至聞宿清隱蘭若

幽禽雨中響門掩春塘綠思君暮不來應伴山僧宿

碧筩飲

綠觴卷高葉醉吸清香度酒蕩正何如風傾曉盤露

曉發山驛

風殘杏花曉馬上聞啼鳥茅店未闌門山多任人少

焚香

斜霏動遠吹暗馥畱微火心事共成灰窗間一翁坐

榴花

日炙態常醺香生若自焚夜來端午宴淡却美人裙

爲外舅周隱君題雜画五首

斜陽榜釣船秋色滿江天彷彿吾家近沙村落雁邊
白雀忽飛還松杉靄然暝明月出溪橋照見支筇影

風雨過蒼嶠秋色渺江海白鷗期不來沙頭人相待
落葉帶回吹荒筠冒幽石池上鳥鳴時閉齋掩秋夕
山深嵐氣寒高齋掩窗臥林間踏葉聲知有樵人過
階前苔

莫掃雨餘綠任滿閒堦路畱藉落來花春泥免相汙

題李迪畫犬

護兒偏吠客花下臥晴莎莫出東原獵春來兔乳多
僧舍訪呂隱君爲學上人題墨竹

山房竹雨過簾影靄春雲得與幽人會何殊見此君

題孫卿家小畫二首

高嶺冒層嵐疎竹逗殘照何處覓孫登雲間聽長嘯
前林遠杵歇別院疎鐘起行人與居人同在秋雲裏
久別幼文偶見其畫遂題

幾疊蜀山雲秋林半夕曛畫中藜杖者相見只疑君
叢竹圖贈內弟周思敬就題

窈窕復蒙茸千山萬竹中幽人夜驚起秋雨共秋風
題張來儀畫贈張伯醇

風起澗聲亂景寒雲氣深山人歸臥晚詩意滿秋林

次韵及禪師懷王水曹二首

千峯一寺遠雲滿跣趺處無客伴孤禪懸燈照深樹
鍾動雲磴冷雀歸人不歸應思躡金策同向海天飛

夜聞雨

窗燭冷殘夜聞蛩更聞雨秋館總多愁猶勝在羈旅

題方壺小画

夕陽數峯遠靄靄江南思烟外有鐘聲山僧獨歸寺

大痴小画

溪水雖多曲舟行不憚賒山山秋樹赤猶復似桃花

扇上竹枝

寒梢雖數葉高節傲霜風寧肯隨團扇秋來怨篋中

外舅周隱君齋竹

秋思與秋聲閉齋對夕清幽人夢回處烟鳥月中鳴

又齋前芭蕉

叢蕉倚孤石綠映閒庭宇客意不驚秋瀟瀟任風雨

吳仲圭枯木竹石

叢篠倚喬柯秋陰雨尚多風霜莫搖落畱蔭石邊莎

題倪雲林画贈因師

舍暉峯下路樹石盡垂藤欲認莓苔迹相尋行道僧

題徐山人畫贈內弟周思恭

復澗兼重嶺雲嵐處處生君家還可認爲有讀書聲

訪因師而師適詣余兩不相值

我去尋幽院師來訪小園休言不相見相見本無言

題張校理畫

寒色初凝野秋聲忽在林遙山不能見祇爲晚烟深

題畫贈別

扁舟暮歸去別路江南樹愁指楚山遙明朝望君處

龍門飛來峯

風吹峨眉雲東依此山住我來不敢登只恐還飛去
待渡

渡子未廻舟立傍沙頭樹天寒雪欲來莫滯人歸去

西澗訪衍上人

日暮冒餘雪望烟西澗陰不因師住遠何事到山深

送人遊湘中

離恨掛帆檣隨君遠入湘飛花蕩春影江水不勝長

蔡村田家

田中未聲歇烟火西林起獨立候歸人柴門夕陽裏
夢中作

悠悠衆擾去寂寂孤寧歇雨過滿窗涼高林上明月
七言絕句 詩五十二首

馬周見太宗圖

封事朝聞夕拜官新豐無復客衣寒書生未有鳧肩
相只說君臣際會難

聞舊教坊人歌

渭城歌罷獨淒然不及新聲世共憐今日岐王賓客

盡江南誰識李龜年

山中別寧公歸西塲

一上香臺看落暉沙林孤樹晚依微老僧不出青山
寺只有鐘聲送客歸

秋柳

欲挽長條已不堪都門無復舊氍毹此時愁殺桓司
馬暮雨秋風滿漢南

送賈麟歸江上

別淚紛紛逐斷猿貧交無贈只多言離愁正似蘼蕪

草一路隨君到故園

秋夜同周著作宿婁浦

小屏寒依竹浦雲酒闌相對說離羣一聲新雁詎先
聽今夜江南我共君

方屋師画

画圖忽見白雲峯茶屋香臺樹幾重身若在師行道
處晚來唯訝不聞鐘

送陳秀才歸沙上省墓

滿衣血淚與塵埃亂後還鄉亦可哀風雨梨花寒食

過幾家墳上子孫來

送呂卿

遠汀斜日思悠悠花拂離觴柳拂舟江北江南芳草
遍送君併得送春愁

答陳校理尋花已落之作

君來春去不相期空有新愁繞舊枝總得花看能幾
日最難畱惜是芳時

與諸君飲吳別駕園

春來幾度醉無涯不似今朝向汝家四海弟兄俱在

座好風吹出棣棠花

舟中聞歌

水柵孤燈照客舟江南誰解唱甘州尋常醉賞尊前
曲何事今朝聽得愁

題画雨竹

巫峽雲連湘水低行人路滑畏深泥不見朝陽鳴鳳
至春陰日日鷓鴣啼

挽楊隱君

纔歌招隱又招魂故老于今有幾存他日我來應下

馬寒山流水竹間墳

春思

愁兼楊柳一絲絲客舍江南暮雨時自入春來才思
減杏花開過不題詩

入郭過南湖望報恩浮屠

雨過春陂柳浪香布帆歸緩怕斜陽漁人爲指江城
近一塔船頭看漸長

廢宅芍藥

昔年花發要人催今日無人花自開猶有園丁憐國

色時容闕客借看來

登江閣遠懷徐記室與杜進士同賦

憑闌兩客怨斜曛此日同吟只欠君
江閣雖高猶不見幾重山水幾重雲

夏夜宿西園酒醒聞雨二首

飛蟲繞燭夢迴遲荷葉齊鳴雨一池
不爲素紈猶在手定疑秋夜乍寒時
人睡蕭蕭院落空未秋愁已怯梧桐
夜長猶幸西軒雨一半聽時在醉中

靈岩琴臺

美人玉琴何處遊遺譜寫入風泉秋
落葉無人登舊榭滿山明月烏啼夜

出笛

橫吹纔聽淚已流寒燈照雨宿江頭
憑君莫作關山曲亂世人人易得愁

慰周著作悼

笑披紗扇憶當年只有卿卿最得隣
今日料應花不住夜燈相伴室中禪

山寺冒雨還西郭

栗葉翻翻滿寺秋
出門風雨未全收
自慙騎馬非閒客
可是山僧不解留

蘇李泣別圖

丁零海上節毛稀
幾望南鴻近塞飛
泣盡白頭相別淚
少卿畱房子卿歸

江上偶見

阿姬不畏晚寒多
綠舫紅衣柳下過
滿浦秋荷已零落
如何猶唱采蓮歌

過保聖寺

隔江烟霧隱樓臺
遠近鐘聲放艇來
亂後不知僧已去
幾堆紅葉寺門開

王七招飲余遊紫藤島值雪失期

孤舟山水雪晴時
看到梅花一萬株
東崦題詩西崦醉
等閒忘却故人期

江上送客

春風江上蕩舟過
垂柳垂楊拂浪波
惆悵今年頻送客
長條欲折已無多

期諸友看范園杏花風雨不果

欲尋春去怕春休又值春陰不得遊寂寞西園風雨裏杏花比客更多愁

宮女圖

女奴扶醉踏蒼苔明月西園待宴迴小犬隔花空吠影夜深宮禁有誰來

逢張架閣

花落江南酒市春逢京婦騎帶京塵一盃相屬成知己何必平生是故人

山中春曉聽鳥聲

子規啼舌百舌鳴東窓臥聽無數聲山空人靜響更切月落杏花天未明

與親舊飲散出抵城西客舍賦寄

吳王廢苑草青青一騎今朝發野亭誰道別君行路遠去時人醉到時醒

過山家

流水聲中響緯車板橋春暗樹無花風前何處香來近隔崦人家午焙茶

雲山樓閣圖

碧樹香臺錦繡連
畫師應見亂離前
如今風景那堪
寫
巖寺空山鎖暮烟

始自西山移寓江渚夜聞雨有作

客身移宿浦
雲東孤館殘燈
與舊同
夜靜空江無落
葉
雨奔驚不似山中

曉過浦西橋

春水何長春日短
沙鴨交眠綠莎暖
曉過橋西不見
人
野梅零落江雲斷

歎庭樹

偶移弱質傍庭皋
風露離離已便高
翻笑園中栽樹
者
十年猶未出蓬蒿

雨中春望

時在園中

郡樓高望見江頭
油壁行春事已休
落盡棠梨寒食
雨
只應啼鳥不知愁

夜齋見螢火

拂竹綠莎復點苔
夜窗無月見飛來
舊書亂後都拋
却
嬾就微光更展開

湖上見月憶家兒

望月思兄意轉迷孤帆應宿楚雲西夜深愁向湖邊
立爲有寒鴻相並栖

逢吳秀才復送歸江上

江上停舟問客踪亂前相別亂餘逢暫時握手還分
手暮雨南陵水寺鐘

送劉將軍

朔風吹沙復吹雪笑解吳鉤初欲別酒酣擊筑和悲
歌將軍出關車騎多

次韵春日謾興四首奉酌外舅達翁

老去風情似樂天恨無張態抹朱絃一春酒病稀遊
賞啼鳥鶯花共悵然

水邊簾幙遠籠花遊女時時出浣紗記得橫塘沽酒
處画船明月載琵琶

雨多池館草萋萋酒色寒銷舊舞衫燕子似憐花落
地殷勤常帶軟泥喃

菖蒲葉老芷華新池暖鴛鴦護水紋不上高樓無遠
恨江南春盡草如雲

回文

風簾一燭對殘花
薄霧寒籠翠袖紗
空院別愁驚破
夢東闌井樹夜啼鴉

春日憶江上二首

一川流水半村花
舊屋南隣是釣家長
記歸逢載春
醉雲籠殘照雨鳴沙
新蒲正綠亂鳧鳴
水沒魚梁宿雨晴
看近清明沉種
日野人何事不歸耕

醉仙圖

酒滿長生癭木瓢
花開仙館宴春宵
飛瓊何事堅辭
飲應恐清都謾早朝

觀奕圖

錯向山中立看碁
家人日暮待薪炊
如何一局成千
載應是仙翁下子遲

江村即事

野岸江村雨熟梅
水平風軟燕飛回
小舟送餉荷花
鉢遠旆招沽竹醞醅

偶睡

竹間門掩似僧居
自豈花疎片雨餘
一榻茶烟成偶
睡覺來猶把讀殘書

舟歸江上過斜塘

漫漫村塘水沒沙
清明初過已無花
春寒欲雨歸心
急懶駐扁舟問酒家

西齋庭前海棠

寂寥銀燭與金盤
睡足簾前怯曉寒
不是詩人賞幽
獨雨中深院有誰看

次韵張仲和春日漫興

蘇小墳前柳似烟
秋千人靜夕陽天
獨騎款段尋詩
去嬾逐看花衆少年

與內弟周思敬晚過雁蕩僧舍

同過溪橋日欲晡
遠林殘葉似栖烏
照公院裏堪畱
宿已有梅花有酒無

白傅湓浦圖

相逢淪落總天涯
舟泊湓江近荻花
逐客青衫自多
淚傷心不用怨琵琶

陶穀驛亭圖

酒闌使騎趣歸時羞殺江南一曲詞借問驛亭相見者風流何似党家兒

客夜聞女病 時在錢塘

歲盡歸期尚杳然不知汝病復誰憐隔隣兒女燈前笑客舍愁中正獨眠

秋江晚渡圖

鷓鴣飛盡一洲蘋帆帶秋雲度遠津底事愁看畫中景昨朝曾送渡江人

夜中有感二首

少壯無歡似老時身窮寧坐苦吟詩臥思三十年來事一半間關在亂離

倦僕厨中睡已安吹燈呼起冒霜寒酒醒無限悲歌意不覓書看覓劒看

徐記室謫鍾離歸後同登東丘亭

同上高亭一賦詩喜逢君是謫歸時不然此日登臨處應望天涯有遠思

將赴金陵始出閭門二首

烏啼霜月夜寥寥回首離城尚未遙正是思家起頭

夜遠鍾孤棹宿楓橋
烟月籠沙客未眠
歌聲燈火酒家前
如何纔出闔門
宿已似秦淮夜泊船

舟次丹陽驛

沽酒來尋水驛門
隣船燈火語黃昏
今朝始覺離鄉
遠身在丹陽郭外村

缶鳴集卷之十

岳鳴集卷之十二

古吳 高啓季迪 著

同里 拂雲居士 校

七言絕句 詩七十六首

正月十六日夜至 京師觀燈

天街爭唱落梅歌 絳闕珠燈萬樹羅
莫笑遊人來較晚 春風還似昨宵多

夜聞雨聲憶故園花

帝城春雨送春殘 雨夜愁聽客枕寒
莫入鄉園使花

落一枝畱待我歸看

早至 闕下候朝

月明立傍御溝橋半啓宮門未放朝
騶吏忽傳丞相至火城如晝曉寒銷

春日寄張祠部

烏衣巷口燕來時楊柳風多颭酒旗
遠客金陵遊伴少看花慙比去年遲

送哲明府之新淦

花落春衫試剪裁石頭城下楚帆開
憑誰爲報清江

吏麥雉鳴時縣令來

左掖作

小殿珠簾散柳絲 東宮初退講筵時
不材未敢修封事把筆閒題應教詩

雨中登天界西閣

青山樓閣楚江東身在蒼茫晚色中
故國自遙難望見不關春樹雨溟濛

吳中親舊遠寄新酒

雙壺遠寄碧香新酒內情多易醉人
上國豈無千日

釀獨憐此是故鄉春。

爲念春來客思悲欲教一醉對花枝那知飲量新來減不似江亭看妓時

宿圓明寺早起

客起燈前夢尚迷滿城殘月曉峯西應知野寺非山店只聽鐘聲不聽雞

寄丁二侃

江頭斜日草初曛日斷歸鴻隔楚雲舊宅因君相近住每思家處卽思君

題虞文靖公書所賦鶴巢詩後

玉堂罷直髮如絲華蓋岡頭戴笠時丁令去來滄海變人間零落鶴巢詩

逆旅逢鄉人

客中皆念客中身唯汝相逢意更親不向燈前聽吳語何由知是故鄉人

送葛省郎東歸

金陵女兒踏春陽金陵客子正思鄉一盃况復送君去目斷飛花江水長

桃葉渡頭聞唱歌孤帆欲發奈愁何君歸是我來時
路山水無多離思多

四月朔日休沐雨中

送春風雨苦潺潺得告今朝免綴班臥聽鳩啼花落
盡此身如在故園閑

戴叔鸞入江夏山圖

歸隱初筵薦辟章西風黃葉滿車箱青牛只識山中
路不是無心向洛陽

客中憶二女

每憶門前兩候歸客中長夜夢魂飛料應此際猶依
母燈下看縫寄我衣

晚晴遠眺

楚天無物不堪詩登眺唯愁動遠思秋樹江山人別
後夕陽樓閣雨晴時

寄徐記室

徐久客京師余至已東還

惆悵江東日暮雲我來君去苦離羣不知此日君思
我還似當時我憶君

寄家書

時客越城

底事鄉書累自修路長唯恐有浮還憂得到家添
憶不敢多言客裏愁

聞人唱吳歌

楚人不解聽吳歌我獨燈前感慨多記得通波亭下
路画船歸去雨鳴荷

雨中過山

春雲掩霽澗奔渾風雨行人過一村不似山家深竹
裏乳鳩啼午未開門

題画

落日青山影在沙鏡湖波淨過荷花雲間樹底叅差
屋借問誰家是賀家

得故人書知未入京因寄

曾約春深到鳳臺君今不到只書來滿械離恨床頭
放一度相思一展開

題王翰林所藏画蘭

春到懷王舊渚宮沙棠舟去水烟空孤叢不有幽香
發應沒江邊百草中

不見花

看花無計作閒身塵土餘杭暗度春不見花開莫惆
悵花飛還見免愁人

寒食逢杜賢良飲

楊柳無烟江水長隣家風雨古餉香逢君共把金陵
酒忘却今朝在異鄉

風雨早朝

漏屋雞鳴起溼烟寒驢難借強朝天却思春水江
南岸閒聽蓬聲臥釣船

讀韋蘇州詩

掃閣焚香畫卷惟綠槐疎雨夏初時客憂何物能消
遣一帙蘇州刺史詩

晚過青溪

史言隋人殺張麗華於此

王謝池臺兩岸空水禽爭唳夕陽中麗華妖血流難
盡化作荷花別樣紅

黃荃子母兔

陽坡日暖眼迷離芳草春眠對兩兒誰道姮娥曾作
伴廣寒孤宿已多時

西園卽事

綠池芳草滿晴波
春色都從雨裏過
知是隣家花落
盡菜畦今日蝶來多

吳別駕宅聞老妓陳氏謠

白髮相邀出後廳
莫辭爲唱雨霖鈴
如今人盡憐年
少誰肯同來特地聽

出郭舟行避雨樹下

一片春雲雨滿川
漁簑欲借苦無緣
多情水廟門前
樹遮我孤舟半日眠

巴西初度

時年二十四

風雨空齋誦蓼莪
今年初度客中過
人生七十古來稀
壽未過還憐一半多

二喬觀兵書圖

共憑花枕倦新粧
王女陰符讀幾行
銅雀樓前春
色解將奇策教周郎

期袁卿見過因出失值寄詩謝之

非關遠出負幽期
自是江邊枉棹遲
恨切未應如我到家時

宿蟾公房

一禽不鳴深樹烟
明月下照高僧禪
獨坐空齋清
夜秋河欲墮山蒼然

陌上見梅

陌頭一樹帶風沙
零落寒香日欲斜
車馬紛紛誰暇
看當年只合種山家

東歸至楓橋

故人當日送登畿
此地亭舟醉落暉
慙愧臨河舊學
柳凋青眼看人歸

江行

家家魚網映迴橋
春水初生沒樹腰
客路江南烟雨
裏綠蕪芳草恨迢迢

戲和徐七見寄臥聞隣槽酒聲之作

春瀉隣槽入夜聞
遠疑泉響隔松雲
題詩爲問醒眠
客幾滴還能醒得君

見燕至

初來如報社前春
好宿茅簷伴客身
莫入江南舊庭
院杏花風雨總無人

背面美人圖

欲呼回首不知名背立東風幾許情莫道画師元不見
傾城雖見画難成

對梨花

素香寂寞野亭空不似秋千院落中臥對一枝愁病
酒清明今日雨兼風

和楊余諸君在謫中憶往年西園聽歌

花落名園罷醉遊故人無復舊風流異鄉莫歎無歌
聽若使聞歌意更愁

重過南寺尋悟公不值

我是鈞天夢覺人憶來松下似前身老僧何去袈裟
在落葉斜陽滿室塵

過北塘道中四首

未得看春愁不禁此日聊復試幽尋行人入村花宛
宛吠犬隔水樹深深

春水滿田如一湖入田放艇看鸞雛女郎祠下野花
雜老子門前沙樹孤

苦欲看春春色稀亂後何處有芳菲晚鶯啼歇野寂
寂雙樹家邊人獨歸。

渺渺一逕兩陂間楊柳初發水潺湲驚魚忽散人影
近啼鳥時來春意閒

夜雨江館寫懷二首

愁解尋人不得辭小窗疎竹雨來時江湖今夜全家
客猶勝飄零兩處思

漠漠春寒水遶村有愁無酒不開門青燈画角黃昏
雨客共梅花併斷魂

金徵士玫雨中見過雷宿二首

夜窗同聽雨中後風物淒涼異故園舊事堪愁今懶

說相看不是解忘言

莫辭同宿掩書幃亂後蕭條故舊稀預恐明朝風雨
歇滿江春水送君歸

過流通院二首

僧嬾開門見客遲空林流水日斜時欲畱詩句知曾
過我後來看竟是誰

橘柚林中薜荔垣幽尋幾度入秋園雖然老衲無聞
見猶勝相逢俗客言

送丁孝廉之錢塘就簡張著作方員外

江邊同客亂離餘，遠別那堪近歲除。若見故人詢旅況，知君解說不煩書。

遊幻住精舍

寒扉斜向竹間推，此日重來是幾迴。行遍空林僧不見，慰人憐有一枝梅。

效香奩二首

青瑣初空別恨長，綉茸畱得唾痕香。簾前月出無人拜，只有秋千影過墻。

開過東窗百葉桃，琵琶塵滿鏤金槽。欲呼小字敲粧

閣，誰出相迎教剪刀。

江上逢舊妓李氏見過四首

玉箏紅燭艷春羅，慣向高堂聽汝歌。今夕相逢爲重唱，孤舟江冷月明多。

多謝停舟共一卮，石州歌罷各低眉。南園舊日同聽客，零落如今定有誰。

誰識能哥舊散聲，愁中聽處尚分明。玲瓏酒罷休催去，月落江湖尚未平。

平常歌舞不能閒，多在宜春甲第間。借問年來還到

否朱門風雨幾家關。

東皋林下

荒逕空林落葉平尋常唯有野人行如何授簡梁園
客詩句時來此處成

九月八日對菊

預向籬邊把一杯黃花多意已能開不憂風雨明朝
阻嬾逐時人闢折來

舟行晚過張林

望山幾欲去尋幽此口雖來不暇遊一棹黃昏過山

下疎燈絡緯滿林秋

送藥山人

歲晚麻衣冒雪寒高歌欲去醉長安山瓢行負知何
在半是詩丸半藥丸

冬盡無雪連日大風苦寒

枯桑鳴曉北風乾舊曆闌珊欲罷看幾日凍眠猶望
雪野人憂麥敢憂寒

慰徐叅軍喪子

天上麒麟去莫羈千秋亭上夕風悲勸君不用情鍾

其卽是當年未有時

看梅漫成三首

江草初生江水流便覺春色惱人愁
雪晴家家叩門去不見梅花應不休

江邊寺裏一梅樹幾度勞人相候開
無情今日未肯發有興明朝還看來

野人不省愛梅好棄在荒籬荆棘邊
細雨東風欲零落我來相見一潸然

夜至陽成田家

東津渡頭初月輝南陵寺裏
巡鐘微主人入夜門未掩
蒲響滿塘鶯鴨歸

六言 詩八首

夫差女瓊姬墓

夢別芙蓉殿頭墮釵零落誰收
土昏清鏡忘曉月冷珠孺恨秋麋
鹿昔來廢苑牛羊今上荒丘香魂若怨
亡國莫與西施共遊

江村樂四首

荷浦張弓射鴨柳塘持燭又魚天
隱子宅同里陶朱

公祠近居

一犬行隨餉盞羣蛾飛繞縵車江邊女去摘芡城裏
人來賣茶

罾掛漁郎舍外船維酒媪橋邊烟波五湖朝渡風雨
孤村晝眠

日斜深塢牛臥潮落平沙蟹行秋社未開綠醞夜炊
初確紅粃

讀道旁舊冢碣上題口宋黃澹翁先生之墓

古路斜陽廢城斷碑荒草殘塋莫嗔童豎樵牧不識

先生姓名

楊氏山莊

斜陽流水幾里啼鳥空林一家客去詩題柿葉僧來
供煮藤花

陶秘書廣陵送別圖

暮雨潮生瓜步春山樹繞蕪城惆悵離舟欲發江南
烟寺鐘聲

聯句 詩五首

舞劍聯句

與會稽張憲夜飲觀銅臺季壯士舞劍而作

晚陌息鳴鑣憲 秋城起嚴柝登高欣有會啓 願座歎

無樂豪賓奉觴壽憲 壯士掉箭作韻生飈拂鐔啓 文

綴星輝鏘拭土色纔動憲 映火光轉爍寒瀉走澗泉

啓 明懸灑簷澤徒誇力瑩膏憲 謾詫七淬藥腥疑人

血乾啓 威攝鬼踪鑠雄聞莊子說憲 醉想王郎斫聯

翩倏鴻騫啓 奮迅仍雀躍來如龍出淵憲 去若蛇赴

壑疾驚雷破山啓 怒訝風卷漠初馳帆縱張憲 忽注

弩弛曠陰陽變開闔啓 潮汐隨進却高步赴節同憲

奇形分狀各斜迴象翼蔽啓 曲踊肖拏攫歛驚西方

帝憲 凜怖東海若屋翻影紛綸啓 地殷勢揮霍亂思

突騎奔憲 低見飢隼掠旁分萬矢斷啓 前拉千槍拓

出堪劫齊壇憲 立可當蜀閣澤聞蛇嫗啼啓 路遇猿

翁搏斬關豁然判憲 擊柱鏗爾著陸疑濤涌床啓 宵

駭虹闖幕警栖已翻翻憲 墜槁俄索索顛旭曾悟書

啓 俠軻記爭博目花匪酒涵憲 膚粟似裘薄忠義氣

盡張啓 奸邪膽俱落不從玉玦計憲 欲定銅臺約未

數大娘強啓 終勝處女弱季路袖手欽憲 斐旻汗顏

作疾視誰敢當啓不成我慙學勇夫怒生癭憲恐僕
戰成瘡功收刺虎奇啓志敢聞雞惡暫停月徘徊憲
既罷天寂寞崆峒詎必倚啓氛祲衍可廓馘妖正思
今憲斷佞猶慕昨會合固有期啓死生良欲託寧憂
武庫灾憲但俟凶門鑿慷慨勿悲歌啓淋漓且酣酌
憲

病柏聯句

與青城杜寅郊郡徐賁遊白蓮寺見病柏而
作

抱質雖輪囷託根何坎珂寅死色見已深生意存猶
頗啓老枿焦半身餘葉禿偏髻賁恩謝漢陵春灾非
陸渾火寅柯傾痺待扶節漏瘡思裴啓下窾封虬蟬
上穴綴螺龜賁風欺聲告哀而冒汗憎顛寅蟄空虺
喜容攀脆猿愁墮啓將斲豈中梁欲剗詎宜躬賁蓋
瘁缺青葱梢枯絳猗攤寅乏子供爐焚無陰比床坐
啓靈盡啄鳥飢巢傾頭雛跛賁矐形慘若庭突腹腫
如果寅藤纏偶假粧蘇剝每慙裸啓主惜覲匠頗樵
窺避僧邏賁土瘠力易衰岩危執難爰寅殺惧若霜

仍鑿期甘露可啓成器未爲福不材反逃禍貞依林
尚支撐亞石猶磊砢寅閱歲失貞姿承陽愧纖朶啓
掠辜孔語稱名負杜吟播貞敢要秦樹封孰效禹梅
鎖寅蟠深漫欲踞架重寧堪荷啓氣同生固均數異
測誠叵貞膏乾燃不明屑墜掃還夥寅客伶弔賦悲
僮棄培功惰啓終護竟煩誰今看幸遭我貞

風雨聯句

與會稽張憲在報恩佛寺遇風雨而作

盲風簸天興憲凍雨翻海瀉魚蝦落半空啓蛟龍聞

中野勢吞九河黃憲功潤千里赭怒疑決沙囊啓振
訝摧屋瓦橫行天兵駛憲大笑電女哆乾坤發生多
啓道路暘死寡潦漲濤涌川憲早去烟滅冶谷號竟
誰嘘啓木撼不自把神靈真恍惚憲造化非苟且初
占月離畢啓又駭泗沒社必變其聖乎憲弗迷唯舜
也陰岑氣如炊啓高葉聲若打陽烏韜不見憲乾鵲
噤皆啞重翳晦復明啓餘點歇還灑雖悅灌園人憲
應愁渡江者侍王笑楚賦啓久我慙周雅避思泰山
顛憲戰憶昆陽下雄夫七易失啓吝士蓋難假旣霑

想大田憲廣庇思巨厦桔槔向晚停啓紈扇未秋捨
亂號官私蛙憲莫辨來去馬臥驚浪喧耳啓歸恐泥
沒踝勿憂奉茅屋憲且喜蕙蘭若民期歲有登啓國
荷天錫嘏沛澤宜載歌憲新篇試姑寫啓

虎丘聯句

與潯陽張羽太原王行郊郡徐賁遊虎阜用
壁間顏魯公韻作

山遊期屢阻風雨過今春羽偶遂林泉賞仍聞里閭
親行樹重迷卓午花盡謝芳辰啓事往非前代僧逢

是故人賁金精銷虎氣寶藏衛龍神羽妖魄伶埋玉
仙詩看勒珉行年登厨有供村遠寺無隣啓池古寒
泉定林暄夏果新賁井名猶記羽樓姓尚題陳羽步
策方循澗廻橈已待津行緣雖喧寂異妄本去來均
啓摩壁追高韵應慙繼後塵

蓮房聯句

與金華宋璩張孟兼作

露冷鏡湖秋璩波涼練塘曉盤翻綠雲稠兼錦破朱
霞少新苞顆微綻啓餘葩莖尚嫺瘦繭綴寒蚕璩尖

喙啄青鳥下惟玉龍眠兼中有瓊絲裊擎重柄欲析
啓舍深晴尚宵璣孤懸類覆杯兼雙立疑擢表啓初
成欣雨滋兼漸老怯風掉啓多子同根榮啓獨婦專
房悄璣粧卸失娉婷啓歌來逢窈窕璣剖心效諫忠
兼並頭呈瑞兆啓裏蹄密竅剗璣魚目微光皎啓珠
珥落槃多啓瑤軼貯囊小璣空實外莫辨甘苦中自
了剝殘星滿地采盡香餘沼啓雕筵釘戢戢玉虫攢
擾擾送看出小艇薦喜對清醪兼新嘗勝江芡遠覓
逐水蓼寒芳想夏初啓感物傷秋杪聊茲發吳詠啓

一覽烟水渺璣

